

হেম-হার।

স্বপ্ন, অদ্ভুত প্রতাপকার, অদৃষ্ট, সংসার ও সন্ন্যাস, লোক-চেনা

দেখর মঙ্গলময়, মঙ্গল ও অমঙ্গল, পূর্ণচন্দ্র,

ভক্তি ও ভল এবং যমুনা ।)



শ্রীহারাগচন্দ্র রক্ষিত প্রণীত ।



প্রকাশক—শ্রীহেগচন্দ্র বসু,

১৯ নং কর্ণওয়ালিস্ ষ্ট্রীট, কলিকাতা ।



ফাল্গুন, ১৩০২ ।

মূল্য ৥০ আট আনা ।

କଳିକାତା

୨୦ ନଂ ସୁକୌରୀ ଷ୍ଟ୍ରିଟ, କାଳିକା ଘଡ଼େ

ଶ୍ରୀମଦ୍‌ଚନ୍ଦ୍ର ଚକ୍ରବର୍ତ୍ତୀ ଦ୍ଵାରା ମୁଦ୍ରିତ ।

পরম প্রীতিভাজন, স্বহৃদয়

শ্রীযুক্ত বাবু হীরেন্দ্রনাথ দত্ত

মহাশয়কে,

ভদ্রীয় দরিদ্র বন্ধুর

এই সাহিত্য-সম্মল

“হেম-হার”

আন্তরিক প্রীতিসহকারে

উপহার

ঐদত্ত হইল।



হেম-হার

স্বপ্ন ।

(১)

আজ কয়েক বৎসরের কথা বলিতেছি,—ভাগীরথীতীরস্থ দেবীগ্রামে রাধারমণ রায়ের বাড়ী ছিল। বাড়ীটি প্রকাণ্ড অট্টালিকা হইলেও পুণ্যবানের অট্টালিকা ছিল না। এখন সে অট্টালিকার অস্তিত্বও নাই।

ভাগীরথীতীরের নিকটবর্তী, তৃণপুস্পসমৃদ্ধ একখানি সুন্দর মাঠ। মাঠের এক প্রান্তদেশে রাধারমণের এই বাড়ী অবস্থিত। এই মাঠে কখন কোনরূপ চাষ হইত না,—বরাবর ইহা এই ভাবে পড়িয়া থাকিত। গ্রামের বালকেরা বেলাবসানে, এই প্রীতিপ্রদ সুন্দর মাঠে সমবেত হইয়া, নানাপ্রকার ক্রীড়া করিত, গান গায়িত, গল্প বলিত। বালকগণের আনন্দকোলাহলে প্রতি অপরাহ্নে, সে মাঠ পরিপূর্ণ হইত। সন্ধ্যাগমে, সকলে গৃহে ফিরিত। নিঃস্রজন মাঠের মাঝে দাঁড়াইলে, ভাগীরথীর শ্রুতিমধুর জলকল্লোল শুনা যাইত।

একদিন একটি বালক, সেই মাঠের পার্শ্বে, ভাগীরথীর কূলে বসিয়া, বড় আকুলপ্রাণে কাঁদিতেছিল। তখন সন্ধ্যা উত্তীর্ণ হইয়া গিয়াছে। শ্রাবণের মেঘাচ্ছন্ন আকাশে অতি কষ্টে চতুর্থীর চন্দ্র উঠিয়াছে। পৃথিবীর গায়ে ঈষৎ, অক্ষুট জ্যোৎস্না পড়িয়াছে। আর কোথাও কেহ নাই, একাকী এই বালক ভীরে বসিয়া কাঁদিতেছে। শ্রাবণ মাস, ভাগীরথীর কূলে কূলে জল। বৈকালে বৃষ্টি হইয়া গিয়াছে,—পথ বড় পিচ্ছিল।

অনেকক্ষণ বসিয়া বসিয়া, বালক কাঁদিল। চক্ষু মুছিয়া একবার চারিদিক চাহিল। কেহ কোথাও নাই। গঙ্গার পানে একবার দেখিল,—অতি দূরে যেন একখানা পান্সীর মত কি ভাসিতেছে। ভাবিল, তাহার দাদা ফিরিয়া আসিতেছে। একাকী থাকিয়া একটু ভয় হইতেছিল, এখন সে ভয় টুকু কমিল।

বালক ভাবিতে লাগিল, “আমি দাদার কি করিয়াছি? আমাকে কেন তিনি ভাল বাসেন না? আমি ত তাঁহাকে এত ভাল বাসি, তবে কেন তিনি আমার উপর এত রাগ করেন?”

বালক আবার কাঁদিল। কাঁদিতে কাঁদিতে আবার ভাবিল, “দাদা আমাকে কত মারিয়াছেন, আমি পায়ে ধরিয়া ক্ষমা চাহিয়াছি! তাঁহাকে ত আমি কখন কিছু বলি নাই। তবুও তিনি আমাকে দেখিতে পারেন না, কাছে গেলে তাড়াইয়া দেন। তাঁহার সঙ্গে খেলিতে চাহিলে, খেলেন না। কোথাও যাইলে আমাকে ডাকেন না,—আমি ত কিছুই করি নাই! আমার মা নাই,—দাদার কাছে না যাইয়া কার কাছে যাইব? দাদার কাছে না গুইলে আমার ঘুম হয় না,—দাদা কিন্তু কাছে

শুইতে দেন না। পান্সী করিয়া বেড়াইতে গেলেন, আমাকে সঙ্গে লইলেন না। আমাকে একেলা রাখিয়া চলিয়া গেলেন। বাবা কেন আমাকে দাদার সঙ্গে পাঠাইলেন ? আমার যে বড় ভয় করিতেছে ! কৈ, দাদা ত এখনও এলেন না ? সে পান্সীই বা কোথায় গেল ? মাগো, তুমি কোথায় ?”

উচ্চৈঃস্বরে বালক কাদিয়া উঠিল। হঠাৎ তাহার বড় ভয় হইল। বড় ভয়ে মাতৃহারা শিশু কাদিয়া উঠিল,—“মা, মা, কোথায় তুমি ? কোলে তুলিয়া নাও মা ! আমার যে বড় ভয় করিতেছে !”

কাদিতে কাদিতে বালক গৃহাভিমুখীন হইয়া দৌড়িল। কিচুঁদ্র গিয়া পিচ্ছিল পথে একবার আছাড় খাইল। তারপর কষ্টে সে স্থান হইতে উঠিয়া এক বটবৃক্ষতলে আশ্রয় লইল।

(২)

শ্রাবণ মাসের সেই ভরা গঙ্গাকূলে, নির্জন মাঠ করুণকণ্ঠে পূর্ণ করিয়া, ভীতিবিহ্বল বালক আছাড় খাইয়া এক বটবৃক্ষতলে আশ্রয় লইল। ভয় আরও বাড়িল। তখন একেবার জ্ঞানশূন্য হইয়া, সে, মৃতবৎ সেখানে পড়িয়া রহিল।

অনেকক্ষণ এই অবস্থায় গেল। সেই অবস্থাতেই বালক ঘুমাইয়া পড়িল। ঘুমাইয়া ঘুমাইয়া এক অদ্ভুত স্বপ্ন দেখিল।

বালক দেখিল, আকাশে বড় মেঘ, বড় অন্ধকার। সেই অন্ধকারে হঠাৎ বড় একটা বিদ্যুৎ দেখা দিল। বিদ্যুৎ তখনই নিবিয়া গেল না। বালক হাসিয়া উঠিল। দেখিল, সেই বিদ্যুতের

ভিতর একটি ছোট,—খুব ছোট,—বড় সুন্দর বালিকা বাহির হইয়া, বালকের কাছে আসিয়া দাঁড়াইল। তাহার কি সুন্দর মুখ! বালক বিস্মিত হইয়া, সেই অদৃষ্টপূর্ব বালিকার মুখপানে চাহিয়া চাহিয়া বলিল, “তুমি কে? আমার সঙ্গে খেলা করিবে?” বালিকা বড় মধুর হাসি হাসিয়া ঘাড় নাড়িল। তখন হাতে হাত দিয়া বড় প্রফুল্ল প্রাণে বালক বালিকা সেই গাঢ় অন্ধকারাবৃত পৃথিবী মাঝে, সেই মেঘচ্ছন্ন আকাশতলে খেলিতে লাগিল। বালিকার চঞ্চল কেশদাম বায়ুতরে উড়িতে লাগিল, সুন্দর রূপের ছটা অন্ধকার আলো করিল।

এইবার বিদ্যাং নির্ভয়া গেল। বালক দেখিল, সে যেন একখানি ক্ষুদ্র নৌকা করিয়া বাত্যান্দোলিত বিশাল গঙ্গাবক্ষে ভাসিতেছে,—বালিকা তাঁরে দাঁড়াইয়া তাহার অপেক্ষা করিতেছে। বালিকা কাতরকণ্ঠে বলিল, “সাবধানে এস, বড় ঢেউ উঠিয়াছে!” নৌকা ফিরিল না, গঙ্গাগর্ভে ডুবিয়া গেল।

চৌংকার করিয়া বালক জাগিল। চক্ষু মুছিয়া উঠিয়া বসিল। পৃথিবী অন্ধকারে ঢাকিয়া গিয়াছে, আকাশে একটু একটু করিয়া অনেক মেঘ জমিয়াছে, শীতল বাতাস বহিতেছে।

(৩)

সকলেই বলে, রাধারমণ রায় লোক ভাল ছিল না। পরের সর্বস্ব অপহরণ করিয়া, সে বড়মানুষ হইয়াছিল। সে কথা ঠিক কি না, আমরা বলিতে পারি না; তবে শুনিয়াছি, রাধারমণের লক্ষ্মীস্বরূপিণী, সতী সাক্ষী ভার্যা স্বামীর আচরণে

বাখিতা হইয়া, অতি অকালে ইহলোক ত্যাগ করিয়াছেন। গ্রামের লোকে বলিয়া থাকে, এমন পাষণ্ড স্বামীর হাত এড়াইয়া, সতী জুড়াইয়াছে।

রাবারমণের দুইটি মাত্র পুত্র। যখন তাহারা মাতৃহারা হইয়া, তখন তাহাদের বয়সক্রমে ষষ্ঠাক্রমে সাত ও পাঁচ বৎসর মাত্র। অন্যান্য আত্মীয়বর্গে গৃহ পূর্ণ ছিল, কিন্তু মাতৃহারা শিশু দুইটির কেহ বড়-একটা বন্ধ লইত না। পিতা নিজেই যখন তাহাদের মুখপানে চাহিতেন না, তখন অপরে কেন চাহিবে ?

ক্ষুধায় কাতর হইয়াছে, তবু তাহারা মুখ ফুটরা সে কখন কথা কখন বলিতে পায় নাই,—বলিলেও কাহারও না-কাহারও কাছে ধমক খাইয়াছে! কোন জিনিসে যদি কখন অভিলাষ হইয়াছে, সে অভিলাষ মনেই লুকাইতে হইয়াছে। কাহার কাছে বলিবে ? কে দিবে ? এমনই অবস্থায় তাহারা বঞ্চিত হইতেছিল।

তাই কি ছাই বড়টি ছোটটির মুখপানে চাহিত ? কে জানে কেন, সে, ছোট ভাইটিকে দেখিতে পারিত না। ছোটটির আর কে আছে ? দাদাকে ভিন্ন সে আর কাহাকে জানে ? কিন্তু দাদার আচরণ বড় নিষ্ঠুর। পাঠক, পূর্বেই তাহার আভাস পাইয়াছেন।

বড় হইয়া জ্যেষ্ঠ মন্থ পিতৃ-স্বভাব প্রাপ্ত হইল। তাহাতে সে, পিতার বড় মেহের পাত্র হইয়া উঠিল। নানো প্রকার কুসংস্কারিত আমোদ-প্রমোদে তাহার দিন কাটিত। পিতার পরামর্শ লোকের সম্পত্তি অপহরণ করিয়া, মোকদ্দমা চালাইত; হিংস্র বশবস্তী হইয়া কাহারও গৃহ দখল করিয়া দিত, কাহারও পুত্র

কত্তাকে কুলত্যাগিনী করাইয়া, কুলে কালি দিত । লেখা পড়ার কাছ দিয়া সে কখনও যায় নাই ।

ছোট ভাই প্রমথ অতি নিরীহ ভালমানুষ । বয়োবৃদ্ধির সহিত তাহার সে নিরীহ প্রকৃতির শোভা বড়ই মনোহারিণী হইল । পিতার অমৃত্রে তেমন কিছু লেখা-পড়া শিখিতে পান নাই, বি তাহা হইলেও স্বাভাবিক সরলতায় তিনি সকলকে মুগ্ধ করি তেন । তবে তাঁহার বড় ছেঁখ, একদিনের জন্তও তিনি পিতা কি অগ্রজের মেহ-আশীর্বাদ পান নাই । অনেক সময় মমথ প্রমথকে কষ্টে দিয়াছে ; কিন্তু গ্রামের লোক কখন বলে নাই যে, প্রমথ সে জন্ত জ্যেষ্ঠের প্রতি ভক্তি বা শ্রদ্ধাশূন্য হইয়াছে ।

যথাসময়ে রাধারমণ, জ্যেষ্ঠ পুত্রের বিবাহ দেন । বিস্তর অর্থ পাইবার লোভে তিনি এই কার্য্য করিয়াছিলেন । এক সঙ্গতিপন্ন বিধবার একটি মাত্র কন্তা ছিল ; তাহার সম্পত্তি বাহা কিছু ছিল, সে সকলই এই কন্তার । রাধারমণ সেই কন্তার সহিত জ্যেষ্ঠ পুত্রের বিবাহ দিলেন ।

(৪)

কনিষ্ঠ প্রমথ এই সংসারে থাকিয়া কখন সুখী ছিলেন না । তিনি দেখিতেন,—দেখিয়া বৃষিতেন, তাঁহাদের সংসার পাপে ভরা । সে জন্ত তিনি সর্বদাই ম্রিয়মাণ থাকিতেন । দিন দিন কেমন হইতে লাগিলেন । যেন বড় ব্যাধিগ্রস্ত ; যেন আর অধিক দিন বাঁচিবার আশা নাই । তাঁহাদের সংসার সুখ-শান্তিহীন,

পাপের পসারা,—হুতরাং তিনিও লক্ষাশুভ, মাশাশুভ, বড় হুংখী ।
তাহার অন্তরের কথা সেই অন্তরের দেবতাই জানিতেন ।

আর একজন ছিল, সেই জানিত । একটি অনেক দিনের
বন্ধ ভূতা ছিল । প্রমথকে সে বুড়া বড় ভাল বাসিত । সে
কোলে পিঠে করিয়া, ভাই ছুটকে এত বড় করিয়াছে । বড়টি
এখন তাহাকে সামান্য ভূতের আয়ই অবজ্ঞা করে, ছোটটি কিন্তু
তাহাকে পিতার আয় ভক্তি ও সম্মান করে । সেই নিরক্ষর
ভূতা,—ভগবান্ বলিতে পারেন, সে রক্তমাংসের দেহের ভিতর
কি অমূল্য হৃদয়ই তিনি দিয়াছেন,—সেই নিরক্ষর ভূতা আপন
পুত্রের আয় প্রমথকে বুকে করিয়া রাখিত । বন্ধ মনে করিত,
তাহার বুকের ভিতর রাখিলে, বুদ্ধি, শাপসংসারের পাপ উদ্ধাপ
প্রমথকে স্পর্শ করিতে পারিবে না !

এই সময়ে রাধারমণ কনিষ্ঠ পুত্রেরও বিবাহ দিলেন । প্রমথ
অনিচ্ছা সত্ত্বেও বিবাহ করিলেন । কিন্তু বিবাহ করিয়া বুদ্ধি-
লেন, ভালই করিয়াছেন,—পাপের সংসারে তিনি পুণ্যের মুক্তি
দেখিলেন । অন্ধকারময় জীবনে তিনি ক্রবনক্ষর দেখিতে পাই-
লেন । সেই অনেক হুংখের মাঝেও দুই জনে দুই জনার মুখ
চাতিয়া বুদ্ধিতেন, সংসারে এমন কি হুংখ কষ্ট আছে, যাহা
আমরা সহ করিতে না পারি !

মনমথের ভাগ্যে কিন্তু অগুরূপ হইল । তিনি যে ধাতুর লোক,
উচ্চার ভাৰ্য্যা সেরূপ হইলেন না । পুণ্যে ভক্তি, পাপে
অশ্রদ্ধা, সর্বজনে প্রীতি, স্বার্থে ঘৃণা,—পতি-পরায়ণা সতী সাধবী
মনমথের চক্ষুশূল হইল । পাপিষ্ঠ বিনা কারণে সরলা সহ-
দর্শিনীকে কষ্ট দিত । এই সময়ে রাধারমণের মৃত্যু হইল ।

(৫)

রাধারমণ কোন প্রকার উইল করিয়া যান নাই। তাঁহার শ্রাদ্ধাদি সমাপনাতে একদিন মন্থণ, প্রমথকে ডাকিয়া বলিলেন, “এ সংসার এখন আমার। বাবা আমাকে সব দিয়া গিয়াছেন। আমি যাহা করিব, তাহাই হইবে। এখান হইতে তোমার অন্ত্রজল উঠিল। এখন তুমি পথ দেখ।”

প্রমথ ষষ্ঠ বর্ষ বয়সে, শ্রাবণে, ভাগীরথীকূলে, মেঘাচ্ছন্ন আকাশতলে, অন্ধকার পৃথিবী বক্ষে, আছাড় খাইয়া, বক্ষতলে পড়িয়া একদিন বে স্বপ্ন দেখিয়াছিলেন, জীবনে একদিনের জগৎ তাহা ভুলিয়া যান নাই। আজ তাহা মনে পড়িল। আজও যেন দেখিলেন, আকাশে বড় মেঘ, বড় অন্ধকার! বড় জোরে তাঁহার একটি নিশ্বাস পড়িল।

তখন নিজগৃহে গেলেন। দেখিলেন, দারদেশে এক স্বর্গভ্রষ্টা, পোম প্রতিমা, মোহিনীমূর্ত্তি দাঁড়াইয়া আছেন। অতীতের সেই অঙ্গদৃষ্ট বালিকা-মূর্ত্তি মনে পড়িল।

বড় ক্রোধে বভক্ষণ ধরিয়া দম্পতিযুগল কাঁদিলেন। শেষে স্থির করিলেন, এ পাপ-পুরী ত্যাগ করাই শ্রেয়ঃ। প্রমথ ভাবিলেন, “অর্থই কি এত বড় হইল? মার-পেটের ভাই হইয়া যদি একজন আর একজনকে অন্তর হইতে অন্তর্হিত করিতেই পারে, তবে তাহার চক্ষুঃশূল হইয়া ভোগস্বখে লিপ্ত থাকা অপেক্ষা, ভিক্ষায় দিনযাপন করা সহস্র গুণে ভাল।”

সেই দিনই অসাহায়ে, নিক্রপায়ে, একটি চারি বৎসরের পীড়িত শিশু লইয়া, দম্পতিযুগল গৃহ হইতে নিষ্ক্রান্ত হইলেন।

অন্ধকার রাত্রি । পৃথিবী নীরব । পেচক ডাকিয়া উঠিল,—
দম্পতিদ্বয়ের চরণে কে যেন বাধা দিতে লাগিল ।

মাঠ পার হইয়া সেই গঙ্গাকূলে আসিলেন । কল্লোলিনীর
কি মনোরম মূর্তি ! সেই অনন্তবিস্তৃত আকাশতলে, সেই নীরব
রজনীতে, চারিদিকে প্রকৃতির কি শান্ত মূর্তি ! সব সুন্দর, সব
শোভাময় !—হার, নর-হৃদয় কি কুংসিত !

প্রমথনাথ পিছনে চাহিয়া দেখিলেন, কে আসিতেছে ।
আগন্তুক নিকটে আসিলে চিনিলেন, সেই বৃদ্ধ ভৃত্য ।
বিস্মিত হইয়া ভয়স্বরে প্রমথনাথ জিজ্ঞাসিলেন, “কে ?—তুমি !
কেন আসিয়াছ ?—কোথায় যাইবে ?”

বৃদ্ধের চক্ষে জল । সে কথা কহিতে পারিল না । পীড়িত
চারি বৎসরের শিশুটিকে তাহার মাতার কোড় হইতে লইয়া
আপন বক্ষে রাখিল । শিশু-মাতা জিজ্ঞাসা করিলেন, “বাবা, তুমি
কোথায় যাইবে ?”

এবার বৃদ্ধ শাশনয়নে রুদ্ধকণ্ঠে কহিল, “মা লক্ষ্মী আমার !
তোমরা কোথায় যাইবে ? আমি যে সব গুনিয়াছি ! আমাকে
এই নরকের ভিতর রাখিয়া তোমরা যাইতেছ ? মা, তোমরা
যেখানে যাইবে, আমিও সেইখানে যাইব !”

পতিব্রতা, গদগদকণ্ঠে পতিকে কহিলেন, “স্বামিন্ ! আমরা
আজিও পিতৃহীন হই নাই ।”

বৃদ্ধ, তখন হাউ হাউ করিয়া কাঁদিয়া ফেলিল । বলিল,
“চল মা ! হৃৎখের উত্তাপ হইতে আমি বুক দিয়া তোমাদিগকে
রক্ষা করিব ।”

(৬)

দেবীগ্রামের কিছু দূরে ক্ষুদ্র কুটীর বাধিয়া, প্রমথ স্ত্রী-পুত্র লইয়া বাস করিতে লাগিলেন। পাপের বাতাস সেখানে কখন বহিত না ; পুণ্যের স্নিগ্ধকিরণে সে কুটীর শান্তিময় ছিল। প্রমথ স্বপ্ন-বিবরণ মনে করিয়া ভাবিলেন, “বিদ্যা এখনও নিবে নাই।”

ভূমাদিকারীর নিকট হইতে কিছু জমি লইয়া, প্রমথ তাহাতে চাষ করিতেন, বৃদ্ধ সেই চাষের শস্তাদি লইয়া বাজারে বিক্রয় করিত। তাহারই আসে ক্ষুদ্র পরিবারের ক্ষুদ্র সংসার সূত্রে চলিত। পীড়িত শিশুটি কিন্তু কি পীড়া লইয়াই আসিয়াছিল,— সে আর বাঁচিল না।

১২৯৫ সালে একবার তিন দিন ধরিয়া অবিশ্রান্ত বৃষ্টি হইল। মাঠ জলে ভরিয়া গেল। চাষ-বাস সব মাটি হইল। প্রমথনাথ সে জল-বৃষ্টি না মানিয়া আবার দ্বিগুণ উৎসাহে সেই মাঠে অক্ষুরিত শস্ত-বীজ রোপণ করিলেন। অত্যন্ত পরিশ্রমে ও অত্যন্ত কষ্টে তিনি পীড়িত হইয়া পড়িলেন।

সে বৎসর বঙ্গের গ্রামে গ্রামে মন্বন্তর হইয়াছে। দোকানী দোকানপাট বন্ধ করিয়াছে। চারিদিকে হাহাকার। “হা অন্ন বো অন্ন” রবে বঙ্গভূমি প্রতিধ্বনিত হইতেছে। ভিখারী ভিক্ষা পায় না। চোর-ডাকাতের উপদ্রব দিন দিন বাড়িতে লাগিল।

পীড়িত প্রমথনাথের আর পথ্য চলে না ; অবস্থা এমনই দাঁড়াইল। তখন সেই বৃদ্ধ ভৃত্য, গ্রামান্তরে, তাহার এক আত্মীয়ের নিকট হইতে কিছু কর্জ করিয়া আনিল এবং সেই টাকা কয়টি প্রভু-পত্নীর হস্তে দিল।

এত কষ্টেও গৃহলক্ষ্মীর মনে অশান্তি নাই। পীড়িত স্বামীকে

সর্বদাই তিনি প্রকৃত্ত রাখিতেন। কোন অভাব জানিতে দিতেন না। এমন কত দিন গিয়াছে,—নিজে না খাইয়া, চাল কটি তুলিয়া রাখিতেন, পরদিনের ভাবনা ভাবিতেন।—সে চাল কটির বিনিময়ে স্বামীর পথ্যসংগ্রহ করিতেন।

হায়! তবুও ত স্বামী রক্ষা পাইলেন না। মৃত্যু-শয্যা শয়ন করিয়া, সহধর্ম্মীকে ডাকিলেন। অন্তরের ব্যথা অন্তরে চাপিয়া, চিরানন্দময়ীবেশে সতী, স্বামীর শয্যাপাশে বসিলেন। স্বামী সে কোমল হাতখানি আপন হাতে রাখিয়া, অতীতের সেই অপূর্ব স্বপ্ন স্মরণ করিয়া ক্ষাণকণ্ঠে বলিলেন,—“প্রাণাধিকে! আর লুকাইও না। আমি তোমার ঐ করুণ আঁখির ভিতর দিয়াই বুঝিতেছি, তোমার অন্তরে কি যন্ত্রণাই হইতেছে! সতি! আমি দেখিতেছি, আজ সে বিদ্যৎ নিবিয়াছে। আমি বাত্যা-ন্দোলিত বিশাল গঙ্গাবক্ষে ভাসিতোছি, তুমি তীরে দাঁড়াইয়া আমার পানে চাহিয়া আছ!”

সতী, বাষ্পগদগদকণ্ঠে বলিলেন, “স্বামিন্! ভয় কি! আমি বড় দুঃখিনী, কিন্তু বিধাতা আমায় চরণে রাখিবেন!”

আবছায়া দিবালোকে, ছিন্ন মেঘের কোলে, ক্ষাণ বিদ্যতেও মত একটু স্নান-হাসি হাসিয়া স্বামী কহিলেন, “হায়! সেই বালিকামুর্তিও তীরে দাঁড়াইয়া একদিন বালিয়াছিল,—‘সাবধানে এস, বড় ঢেউ!’ প্রাণাধিকে! তোমাতেও আজ সেই মূর্ত্ত দেখিতেছি!—তোমার স্বরেও আজ সেই স্বর শুনিতেছি!”

* * * * *

নোকা ডুবিল! সতী মূর্চ্ছিতা হইয়া পড়িলেন।

(৭)

আশ্রয় নাই, সহায় নাই, কোনরূপ অবলম্বন নাই,—
হুঃখিনার দিন কাটে কিরূপে ? কুটীরে একাকিনী তিনি কেমন
করিয়া থাকেন ? অনেক দিন থাকিয়াছেন, আর থাকিতে
পারেন না ! পিশাচের কুটিল নয়ন কাঙ্গালিনীর সেই কুটীর
প্রতি শ্রুস্ত হইয়াছে।—

বৃদ্ধ বলিল, “চল্ মা ! তোমার স্বপ্তর-গৃহে যাই। আমাদের
এ হুঃখের দশায়, তাহাদের দয়া হইবে।”

“বাবা, যাহাকে লইয়া স্বপ্তর-গৃহ, তিনি ত আর নাই,—
কাহার কাছে যাইব ? পোড়া জঠর-জালা কি এত গুরুতর ?”

“না মা, বাচিতেই হইবে ! যখন সময় আসিবে, সকলেই
যাইব। আত্মহত্যা কাহারও অধিকার নাই। আমি কি মা
জানি না, সেখানে আর তোমার সুখ নাই ? সুখ ত মা, তোমার
গিয়াছে !—তোমার সিংখীর সিঁদূরের সঙ্গে সঙ্গে তোমার সকল আশা-
ভরনাও গিয়াছে।—তা জানি।—চল্ মা, তবু তোমার স্বামীর
গৃহ,—আমি আছি, তোমার কোন ভয় নেই মা !”

“বাবা, যখন তুমি বলিতেছ, তখন আমি যাইব। কিন্তু
সেখানে বাইতে আমার পা সরিতেছে না। কি জানি, আমার
কেমন ধারাপ মন,—মন্দটা আগে মনে জাগে। বুঝি—বুঝি
বাবা, সেখানে গেলে আমি আর ফিরিব না—তা চল যাই,
ভবিষ্যৎ ত রোধ করিতে পারিব না।”

তারপর আপন মনে মৃত স্বামীকে উদ্দেশ করিয়া কহিলেন,—
“প্রভু, তুমি এখন স্বর্গে আছ। সেই স্বর্গ হইতে আমার
নাশাধর্ম রক্ষা করিও।”

(৮)

মন্মথনাথ সস্ত্রীক দেশভ্রমণে যাইতেছিলেন । গঙ্গাবক্ষে সুন্দর নৌকা সজ্জিত । গঙ্গালহরীর তালে তালে নৌকা হেলিতেছে, ছলিতেছে, নাচিতেছে ।

সকলেই নৌকায় উঠিয়াছে । মন্মথ উঠিবার সময় শুনিলেন, তাঁহার বিধবা ভ্রাতৃজায়া, সেই বৃদ্ধ ভ্রাতার সহিত তাঁহার নিকট আসিতেছেন । ব্যাপারখানাকি, জানিবার জন্ত, তিনি তাঁরে একটু অপেক্ষা করিলেন ।

অবগুণ্ঠনাবৃত্তা রমণী কিছু দূরে গঙ্গার উপকূলে দাঁড়াইয়া রহিলেন । ভৃত্য, অগ্রসর হইয়া সকল কথা নিবেদন করিল ।

মন্মথনাথ ইতিপূর্বেই সব শুনিয়াছিলেন । তিনি বলিলেন, “আমার গৃহে উইঁার স্থান নাই । আমি এখন সস্ত্রীক দেশভ্রমণে যাইতেছি । ফিরিয়া আসিয়া কিছু ভিক্ষা দিব ।”

ভৃত্য কাঁদ-কাঁদ-মুখে কহিল, “বড় বাবু, এ ছদ্মিনে কিছু ভিক্ষা দিন ! আপনার ভ্রাতৃবধু আজ অনাথিনী, পতি-পুত্র-শোকাতুরা আজ পথের ভিখারিণী ! ছুঁখিনী মার-আমার দে কিছু নাই, প্রভু !”

কর্কশ কণ্ঠে, ব্যঙ্গস্বরে মন্মথ কহিল,—“কেন, বিক্রয় করিবার জিনিস ত আছে ?”

বৃদ্ধ, কণ্ঠে আশ্রয়সংবরণ করিয়া কহিল, “মার আমার কি আছে ?—কি বিক্রয় করিব ?”

নরকের আগুন জলিয়া উঠিল । চারিদিকে বিষের বাতাস বাহিল । অগ্নানবদনে মন্মথ কহিল, “কেন, তোমার মায়ের দেহ আছে, রূপ আছে, যৌবন আছে,—তাহাই বিক্রয় কর !”


হঠাৎ খুব বড় একটা তরঙ্গ আসিল। যে তরঙ্গ-ভঙ্গ-বাপী-
তটে অবগুণ্ঠনাবৃত্তা রমণী দাঁড়াইয়া,—প্রচণ্ড তরঙ্গ-তুফানে সে
মুক্তিকাথও জলে ভাসিয়া পড়িল। সঙ্গে সঙ্গে সে সতী-প্রতিমাও
ডুবিয়া গেল !

পাষণভেদী “মা মা” স্বরে দিগ্বাণল কাঁপাইয়া বৃক্ষও জলে
কাঁপ দিল !

স্বপ্ন ফলিল।

সমাপ্ত।





অদ্বুত প্রত্যাশকার ।

পরোপকারের তুল্য ধর্ম আর নাই। এ ব্রত কখন নিফল হয় না। উপকার করিলেই তাহার প্রত্যাশকার আছে। পৃথিবী যতই কেন পাপভারে আক্রান্ত হউক না, মানুষ যতই কেন অকৃতজ্ঞ ও নীচাশয় হউকনা, উপকারীর প্রত্যাশকার স্বয়ং জগৎ পিতা জগদীশ্বরই করিয়া থাকেন। ইতিহাস পর্যালোচনা কর, সহজেই এ কথা সার্থকতা পরিলক্ষিত হইবে। উপস্থিত আখ্যায়িকায় এই ভাবের বিশিষ্ট প্রতিপাদক একটি চিত্র পাঠক দেখিতে পাইবেন।

(১)

কোন গ্রামে এক ধর্মভীরু দরিদ্র ব্রাহ্মণ ছিলেন। ইহসংসারে তাঁহার একটি মাত্র পুত্র ব্যতীত আর কেহ ছিল না। ব্রাহ্মণ মৃত্যুর সময় সেই পুত্রকে এই উপদেশ দিয়া যান যে, স্মৃথে দুঃখে, সম্পদে বিপদে যেন ধর্মের প্রতি তাহার অচলা ভক্তি থাকে ; আর এক মাত্র পরোপকারই যেন তাহার জীবনের ব্রত হয়। অধিকন্তু পুত্রকে আশ্বস্ত করিয়া বলেন, “এই ভাবে সংসারক্ষেত্রে

বিচরণ করিলে, তোমার ভাবী জীবন অতি সুখময় হইবে ; এবং কোন একটি বিশেষ কার্যের জন্য ধর্মজগতের ইতিহাসে, তোমার নাম অক্ষয় অক্ষরে খোদিত থাকিবে ; ইহা আমি দিব্য চক্ষে দেখিতে পাইতেছি ।”

পুত্রকে কাদিতে দেখিয়া বৃদ্ধ ব্রাহ্মণ সন্নেহে সাহসনাবাক্যে কহিলেন, “বৎস, কাদিও না, পৃথিবীর নিয়মই এই ! চিরদিনের জন্য কেহ এখানে থাকিতে আইসে নাই । ধর্ম্যে নতি রাখিও, সাধ্যানুসারে পরোপকার করিও । বাবা ! অনেক কষ্টে বংকিঞ্চিৎ সঞ্চয় করিয়া রাখিয়া গেলাম, গৃহের নিম্নে তাহা প্রোথিত আছে । তাহার উপসত্ত্ব হইতে কষ্টে-মৃষ্টে, কোন রকমে সংসার যাত্রা নির্বাহ করিও । পরলোকে তোমার মঙ্গল হইবে ।”

যথা সময়ে ব্রাহ্মণ অনন্ত নিদ্রায় অভিভূত হইলেন । যথা-বিহিত অস্ত্যোষ্টি-ক্রিয়া ও নিদিষ্ট দিনে শ্রাদ্ধ-শাস্তি সম্পন্ন করিয়া পুত্র অশৌচ হইতে মুক্ত হইল । বিশ্ব সংসারে এখন আর তাহার ‘আপন’ বলিতে কেহ নাই । কোন প্রকার বন্ধন নাই, অথচ গার্হস্থ্য আশ্রম তাহার নিকট বড়ই অশাস্তিময় ও বিরক্তিকর বোধ হইল । মনপ্রাণ সদাই হু-হু জ্বলিতে থাকে ! শিশু বয়সেই তাহার প্রাণ উদাস হইল, মনে বৈরাগ্যের ছায়া পড়িল । তাহার মনে মনে শেষে সন্ন্যাসধর্মের বাসনাই বলবতী হইল । অদম্য সঙ্কল্প শেষে কার্য্যে পরিণত হইতে চালিল । স্বর্গীয় পিতার উপদেশানুসারে, বালক, গৃহের নিম্নদেশ খনন করিল । তন্মধ্যে প্রোথিত দুই শত টাকা পাইল ।

সেই দুই শত টাকা লইয়া যথাসময়ে সেই সংসারবিরাগী বালক সন্ন্যাসীবেশে স্বদেশ হইতে চিরদিনের মত বিদায় গ্রহণ

করিল। অশ্রুজলে বক্ষঃস্থল প্রাণিত হইতে লাগিল। জ্যোৎস্নাময়া গভীর রজনীতে কাহার উদ্দেশে উৰ্দ্ধপানে চহিয়া মনে মনে কি প্রার্থনা করিল ; সে ব্যক্তিও যেন তাহার প্রার্থনা শুনিল, ইঙ্গিতে যেন কি আশ্বাসও দিল। বালকের হৃদয়ে তাড়িত প্রবাহ ছুটিতে লাগিল, দেহে বল আসিল, তাহার মন প্রাণ শাস্তি-রসে পরিপ্লুত হইল। আহা, ধর্ম্মভীরু দরিদ্রজীবন কত সুন্দর, কত মনোহর !

(২)

বিরাগী বালক পথ অতিবাহিত করিয়া চলিতে লাগিল। বহুদূর অতিক্রম করিয়া বালক এক ভাষণ শ্রাশানের সম্মুখীন হইল। তথায় একটি লোকবিগর্হিত লোমহর্ষণ ঘটনা দর্শনে তাহার হৃদয়ে ভয় ও বিশ্বয়ের আবির্ভাব হইল ; মনে যুগপৎ ক্রোধ, ঘৃণা ও বিরক্তির ভাব উদয় হইতে লাগিল। বালক শ্রাশান মध्ये প্রবেশ করিয়া দেখিল, কয়েক জন লোক একটি শব দাহ করিতে আসিয়াছে। চিতা প্রজ্বলিত, কিন্তু তাহাতে শব নাই,—সে শব ভূমে পড়িয়া আছে, এবং শবদাহকারী ব্যক্তিগণ সেই শবদেহ লইয়া অতি নিষ্ঠুর পিশাচের ভ্রায় কাব্য করিতেছে। কখনও শ্রাশানস্থ আত্ম-কঙ্কাল দ্বারা শবের বক্ষঃস্থলে বিদ্ধ করিতেছে ; কখনও অতি দুর্গন্ধময় গালিত মাংসপেশী ও মলমূত্র প্রভৃতি গৃদ্ধারজনক অপবিত্র বস্তু তাহার মুখাববরে প্রবেশ করাইবার চেষ্টা পাইতেছে, কখনও বা কঠিন বংশধও দ্বারা শবের সন্ধাঙ্গে অতি প্রচণ্ডরূপে প্রহার করিতেছে ! এই হৃদয়-বিহীন নরচন্দ্রাবৃত পণ্ডাদগের অতি বীভৎস পৈশাচিককাব্য

দর্শনে বালকের হৃদয় ব্যথিত হইল, কম্পিত ও ভীতকণ্ঠে বালক পিশাচদিগকে জিজ্ঞাসা করিল, “তোমরা কে?—আর এই মৃত ব্যক্তিই বা কে? অকারণ কেন এ মৃত-দেহের প্রতি একরূপ গহিতাচরণ করিয়া ইহাকে অপবিত্র করিতেছ?”

রোব-কব্যায়িত লোচনে, অতি কৰ্কশস্বরে তাহাতে এক ব্যক্তি উত্তর করিল,—“তুমি কে হে বাপু! বাও, এখানে মিছে ফ্যাছ্ ফ্যাছ্ ক’র না।”

বালক সন্ন্যাসা উত্তর করিল, “বলিতে যদি কোন আপত্তি না থাকে, তবে অনুগ্রহ করিয়া আমার কোতুহল নিবৃত্তি করুন।”

দ্বিতীয় ব্যক্তি কহিল, “গুনবে?—তবে শোন! এই ব্যক্তি আমাদের খাতক ছিল। বেটা জীবিতকালে আমাদের নিকট হইতে দুই শত টাকা ধার লয়; কিন্তু তাহা পারিশোধ করিতে পারে নাই। টাকা গিয়াছে, আর তো তাহা পাইবার কোন উপায় নাই। এখন এই রকমে টাকার শোধ তুলি।”

এই বলিয়া সেই নরপিশাচগণ পুনরবার সেই শবদেহোপরি সেইরূপ গহিতাচরণ করিতে লাগিল।

তৃতীয় ব্যক্তি প্রহার করিতে করিতে শবের উদ্দেশে কহিল, “বেটা, এই রকম নাস্তানাবুদ করবার জন্তেইত ঘরের পয়সা খরচ ক’রে তোরে সংস্কার করতে এনেছি! এখন ফলভোগ কর।—কেমন বেটা!”

চারিদিক হইতে সেই শবদেহের উপর আবার প্রহারবাট হইতে লাগিল। বলা বাহুল্য, হতভাগ্যের আত্মীয়-স্বজন আর কেহই ছিল না।

দয়াজ্জচিত, উদার-হৃদয়, সেই শিশু সন্ন্যাসী এই কথা শুনিয়া

দারুণ বেদনা অনুভব করিল। ব্যথিত হৃদয়ে, ভগ্নস্বরে কহিল,
“ভাই সব, ক্ষান্ত হও—ক্ষান্ত হও! নিরর্থক ‘মড়ার উপর খাঁড়ার
ধা’ দিবার আবশ্যক কি? উহাকে নিগ্রহ করিলে টাকা তো
আর ফিরিয়া আসিবে না। আচ্ছা, ইহার পরিবর্তে আমি
তোমাদিগকে দুইশত টাকা দিতেছি। এখন তোমরা ইহারা
যথাবিহিত অন্ত্যেষ্টিক্রিয়া সম্পন্ন কর।”

এই বলিয়া সেই মহাশয় পিতৃদেব দীক্ষিত পরোপকারব্রতাব-
লম্বী সেই বালক তাহাদিগকে সেই সঞ্চিত পিতৃধন দুই শত
টাকা প্রদান করিল।

(৩)

সমস্ত রাত্রি পর্যটন করায় অত্যন্ত ক্লান্তিবোধ প্রযুক্ত ঠিক
প্রদোষ সময়ে সেই শিশু সন্ন্যাসী এক শ্রোতবৃত্তা, তীরে বসিয়া শিথিল
প্রাতঃসমীরণ সেবন করিতে লাগিল। পশ্চাতে নিবিড় বন। এই
সময়ে সেই মহারণ্য ভেদ করিয়া, দিম্বগুল কাঁপাইয়া অপূর্ব তান
লয় গৌতিধ্বনি তাহার কর্ণকুহরে প্রবেশ করিল। গভীর উদার-
ভাবপূর্ণ সাধনসঙ্গীতে বিমোহিত হইয়া সেই ভক্ত প্রাণ বালক
অরণ্যের মধ্যে প্রবেশ করিল। কিছু দূর গিয়া জানিতে পারিল যে,
একটি সাধু সন্ন্যাসীর শ্রীমুখ হইতে উক্ত সাধনসংগীত গীত হই-
তেছে। সন্মুখীন হইয়া বালক গীত সমাপ্তির অপেক্ষা করিতে
লাগিল। যথা সময়ে গান থামিল। সন্ন্যাসী বালকের যথাবিহিত
স্বাগত কুশল সংবাদাদি জিজ্ঞাসা করিলেন, উভয়ের অনেক কথা
হইল। পরস্পরের প্রতি পরস্পরের ভক্তি ও স্নেহের উৎস খুলিয়া

গেল। অতি অল্পকালের মধ্যে উভয়ের প্রণয় অতি গাঢ় হইল।
যেন উভয়েই উভয়ের কতদিনের পরিচিত! বয়সের বিশেষ
পার্থক্য থাকিলেও প্রাণের টানে উভয়েই যেন এক প্রাণ হইল।

(৪)

এক বিস্তীর্ণ মাঠের ধারে বসিয়া এক বৃদ্ধা শতধারে আপন
বুক ভাসাইতেছে, এমন সময় আমাদের সেই সন্ন্যাসীদ্বয়, সহসা
তথায় উপস্থিত হইলেন। আমরা এখন হইতে ইহঁদিগকে সত্য-
ব্রত ও সত্যসখা নামে অভিহিত করিব। সত্যব্রত—সেই অরণ্যস্থ
বদ্ধ সন্ন্যাসী, আর সত্যসখা—আমাদের আখ্যায়িকার শিশু
সন্ন্যাসী। বৃদ্ধার পায়ে একটি অতি তীক্ষ্ণ কণ্টক বিদ্ধ হইয়া-
ছিল। সত্যব্রত ইহা জানিতে পারিয়াই তৎক্ষণাৎ স্বীয় ভিক্ষার
ঝুল হইতে একটি ঔষধ দিলেন। দিবা মাত্রই ঔষধের আশ্চর্য
শ্রুতি তৎক্ষণাৎ কণ্টক বাহির হইয়া গেল। বৃদ্ধা স্তম্ভ হইয়া
কৃতজ্ঞতা সহকারে কতই অনুনয় বিনয় করিতে লাগিল; শেষে
কৃতজ্ঞতার চিহ্ন স্বরূপ আপন কাষ্ঠের ঝুড়িটা সন্ন্যাসীদ্বয়কে
উপহার দিতে ইচ্ছা প্রকাশ করিল। সত্যব্রত ঈষৎ হাসিয়া
তাহা হইতে, কি একটা গাছের কাঁচা ডাল—অবশ্য কোন
অলৌকিক গুণবিশিষ্ট জানিতে পারিয়া, তুলিয়া লইলেন; এবং
কিছুদূর গিয়াই একটা মৃত পাখীর পাখা কুড়াইয়া লইলেন।
সত্যসখা হাসিতে হাসিতে জিজ্ঞাসা করিলেন, “কি ভাই, এই
দুই মহাদ্রব্য তোমার কোন্ কার্য্য সিদ্ধি হইবে?”

সত্যব্রত কোন উত্তর করিলেন না। উভয়েই বহুদূর অতি-

ক্রম করিলেন এমন কিছু দিন ভ্রমণ করিয়া আর এক রাজ্যে উপনীত হইলেন ।

রাজপথের একস্থানে বিস্তর জনতা দেখিয়া সন্ন্যাসীদ্বয় অন্তঃসন্ধানে জানিতে পারিলেন যে, এই নগরের রাজকন্ডা মহা আড়ম্বরে শিবপূজায় যাউবেন । তাহা দেখিবার জন্য সকলে সমবেত হইয়া উৎসুক চিত্তে দাঁড়াইয়া আছে । কৌতূহলবশবর্তী হইয়া আমাদের সন্ন্যাসীদ্বয় রাজকন্ডা দর্শনার্থ সেই স্থানে অপেক্ষা করিতে লাগিলেন ।

যথা সময়ে রাজনন্দিনী বহুমুলা বেশ ভূষায় সুসজ্জিত হইয়া, বহু অশ্বগজপদাতী সমভিব্যাহারে দর্শন দিলেন । সত্যসথা, সেই অলৌকিক রূপলাবণ্যাবতী রাজকুমারীকে দেখিয়া মোহিত হইলেন । স্বর্গীয় পিতার স্মৃতি সহসা তাঁহার মনে উদয় হইল ; মনের ভাব সহসা কেমন পরিবর্তিত হইয়া গেল । সত্যব্রত মনে মনে ইহা বুঝিলেন, মনে মনে একটু হাসিলেন । কিন্তু সে ভাব গোপন করিয়া, সত্যসথা সমভিব্যাহারে রাজঅতিথিশালায় উপস্থিত হইলেন ; এবং যথাবিহিত আতিথ্যসংকারে উভয়ে কিছুদিন তথায় অবস্থান করিতে লাগিলেন ।

(৫)

লোক পরম্পরায় সত্যসথা ক্রমে অবগত হইলেন যে, রাজনন্দিনী এখনও কুমারী । তাঁহার তিনটি অতি গুরুতর প্রশ্ন আছে সেই প্রশ্ন তিনটির ঠিক উত্তর যিনি দিতে পারিবেন, তাঁহাকেই তিনি বিবাহ করিবেন । কিন্তু এ পর্য্যন্ত ৯৯৯ জন ব্যক্তি তাহাতে

অকৃতকার্য্য হইয়াছে; অধিকন্তু রাজকুমারীর বিবাহপণের সর্তানু-
যায়ী ফাঁসিরজুতে প্রাণ দিয়াছে ।

কত শত রাজা এবং রাজপুত্রও ইহাতে বিফল মনোরথ হইয়া,
অকালে আত্মজীবন বিসর্জন করিয়াছেন ।

এই কথা শুনিঃ! অবধি সত্যসখার অন্তরে রাজকন্তালাভের
বাসনা আরও বলবতী হইল ; মন কেবল সেই চিন্তাতেই মগ্ন
রহিল । তিনি তাঁহার প্রিয়তম বন্ধু সত্যব্রতকে এ সমস্ত কথা
প্রকাশ করিয়া হৃদয়ের ভার লাঘব করিলেন । শেষে আরও
কহিলেন যে, রাজকন্তা লাভ করিতে না পারিলে শেষে চাইকি
তিনি আত্মহত্যা ও করিতে পারেন ।

জ্ঞানবৃদ্ধ সত্যব্রত সকলই বুঝিলেন ; বালক সত্যসখার চিত্তো-
ন্নততা উপলব্ধি করিলেন । ভাবিলেন, এ দুর্দমনীয় শ্রোতে বাধা
দেওয়া অতীব কঠিন ; ইহার গতি অনিবার্য্য । বন্ধুকে অনেক
বুঝাইলেন, অনেক উপদেশ দিলেন, অনেক অনুরোধ করিলেন ;
কিন্তু কিছুতেই সত্যসখার মন টলাইতে পারিলেন না ।

(৬)

সত্যসখা স্বয়ং রাজসমীপে যাইয়া আবেদন করিল । নৃপতি
তাহার মনোহর আকৃতি দেখিয়া স্নেহমাধা স্বরে কহিলেন,
“তুমি বালক, কিন্তু তোমাকে এরূপ কঠোর সন্ন্যাস পথের পথিক
দেখিতেছি কেন ? আর সন্ন্যাসী হইয়াই বা পুনর্বার গার্হস্থ্য-
ধর্ম্ম পালন করিতেছ কি জন্ত ? বুঝিলাম, আজিও তোমার
চিত্ত-সংঘম হয় নাই ! দেখ, তুমি বালক, পৃথিবীতে এখনও

তোমার অনেক কাজ অবশিষ্ট আছে। আমার কন্তার বিবাহার্থী হইয়া কেন এমন অমূল্য জীবন অকালে নষ্ট করিবে? শুনিয়া থাকিবে, আমার শ্মশান-উদ্যানে কত শত লোক এই লোভে পড়িয়া ফাঁসিরজুতে প্রাণ বিসর্জন করিয়াছে। কত রাজা, কত রাজকুমার, কত মহা মহা ব্যক্তির প্রাণ অকালে নষ্ট হইয়াছে অতএব তুমি ইহাতে নিরস্ত হও। আমার সে কন্তা ডাকিনী, হৃদয়বিহীন, রাক্ষসী ও চণ্ডালিনী। কি জানি, সে কি পিশাচ-মন্ত্রে দৌক্ষিতা হইয়া ঈদৃশ পৈশাচিক কার্যে অহুরক্তা! এ পর্যন্ত কেহই তাহার সে প্রশ্নের উত্তর দিতে সমর্থ হয় নাই। অতএব বালক, তোমাকে পুনঃ পুনঃ অহুরোধ করি, তুমি ইহাতে ক্ষান্ত হও।”

‘কিন্তু প্রণয়ের অনিবার্য্য গতি,—কাহার সাধ্য, বাধা দিয়া তাহার গতি রোধ করে? সত্যসখা পতঙ্গবৎ অগ্নিরাশির মধ্যে ঝাঁপ দিতে সক্ষম করিল। প্রণয়-তৃষ্ণা ও রূপতৃষ্ণা এমনই বন্ধ বটে।

বলা বাহুল্য, অনতিবিলম্বে সত্যসখার এই প্রণয়োন্মত্ততা রাজকুমারীর ও কর্ণগোচর হইল। তিনি দৃষ্টেচিন্তে প্রতিজ্ঞা-জয়ের অভিপ্রায়ে কালের প্রতীক্ষা করিতে লাগিলেন।

(৭)

সত্যব্রত কিন্তু নিশ্চিন্ত থাকিতে পারিলেন না। সত্যসখার অবশ্রুন্তাবী আঁশু বিপদের কথা শ্রবণ করিয়া, তিনি প্রতিকর্ণ স্বভীর হৃদয়ে অভিব্যক্ত হইতে লাগিলেন। অনেক চিন্তার

পর মনে মনে কি একটা সঙ্কল্প করিয়া সেইদিন অপরাহ্নে সত্যসথাকে সম্বোধন করিয়া কহিলেন, “দেখ ভাই, তুমি ইচ্ছা করিয়া জীবনকে নষ্ট করিতে বসিয়াছ। বুঝিলাম, তোমার বড়ই গ্রহ-বিড়ম্বনা, দৈব তোমার প্রতিকূল! নহিলে, কে স্বেচ্ছায় পতঙ্গবৎ জলন্ত আগুনে ঝাঁপ দেয়? এত অমুরোধ করিলাম, এত উপদেশ দিলাম, কিছুতেই তুমি নিরস্ত হইলে না? ভাগ্য-ফল কে রোধ করিবে?”

সত্যসথা, সুধীর ও হিতৈষী বন্ধুর এ অমূল্য উপদেশ শ্রবণে কৃতজ্ঞতা প্রদর্শন দূরে থাক, উপেক্ষাভাবে ক্ষিপ্তের জ্বালা বিকট হান্তে তাহা উড়াইয়া দিলেন।

বহুদর্শী, বিবেকী সন্ন্যাসী সমস্ত বুঝিলেন। বুঝিলেন, বিষ ধরিয়াছে,—এ কাল ভুজঙ্গ-দংশনের আর ঔষধ নাই। পরে কথাপ্রসঙ্গে সত্যব্রত আপন ভিক্ষার ঝুলি হইতে কি একটা দ্রব্য বাহির করিয়া তাহাতে একরূপ সরবৎ প্রস্তুত করিলেন; এবং সত্যসথাকে কহিলেন, “বন্ধু এই সরবৎটুকু পান কর। ইহা সেবনে মস্তিষ্ক বেশ স্নিগ্ধ ও অন্তঃকরণ প্রফুল্ল হইবে। রাত্রিকুমারীর নিকট তাঁহার প্রশ্নের উত্তর দিবার সময়—আর কিছুনা হোক—একটু ভাল করিয়া ভাবিতে-চিন্তিতেও পারিবে। ভাগ্যগুণে যদি প্রকৃত উত্তর দিতে পার, তার আর কথা কি!”

সত্যসথা ইহাতে বিকল্পিত না করিয়া হৃষ্টচিত্তে সেই সরবৎটুকু পান করিলেন।

(৮)

সরবতে কিন্তু কোনরূপ মাদক দ্রব্য ছিল। পান করিয়া সত্যসখা শীঘ্রই গভীর নিদ্রায় অভিভূত হইয়া পড়িলেন। এদিকে রজনী যখন দ্বিপ্রহর—সমস্ত পৃথিবী নিস্তব্ধ, সত্যব্রত তখন ধীরে ধীরে শয্যা ত্যাগ করিলেন ; আপনার ভিকার বুলি হইতে পূর্বো-
ল্লিখিত সেই সরস বৃক্ষ-শাখা ও সেই মৃত পক্ষীর পাখানাটি বাহির করিলেন। এ দুই দ্রব্যের অদ্ভুত গুণ তিনি অবগত ছিলেন। অর্থাৎ এই দুই দ্রব্যের সন্মিলনে এবং ভৈরবী-সিদ্ধ মন্ত্রগুণে তিনি অবলীলাক্রমে নিমেষমধ্যে বিহঙ্গজাতির স্থায় শূন্যে উড্ডীন হইতে সমর্থ হইলেন। ইহার আর এক অপূর্ব গুণ এই যে, যে ব্যক্তি ইহা ধারণ করিবে, সে সমস্তই দেখিতে ও অন্যের কথাবার্তা শুনিতে পাইবে ; কিন্তু অন্য কেহই তাহার বিষয়ে কিছুই অবগত হইতে পারিবে না। কিছু দূর উড়িয়া, তিনি এক সুবৃহৎ প্রাসাদে উপনীত হইলেন। এই প্রাসাদ অধিকারিণী আমাদের রাজকুমারী।

রাজকুমারী তখন হৃৎকেননিভ সুগন্ধিময় বিলাসশয্যায় শুইয়াছিলেন, কিছুক্ষণ পরে সে শয্যা ত্যাগ করিলেন। সহচরী-দিগকে কহিলেন, “আজ আর আমোদ-প্রমোদ করিবার সময় নাই। জানই তো, কাল প্রাতেই সে শিশু-সন্ন্যাসীর পরীক্ষার দিন! এক্ষণে আমি গুরুদেবের নিকট চলিলাম। আমাকে যথাবিহিত বেশভূষায় সজ্জিত করিয়া দাও।”

অতি অল্পক্ষণ মধ্যেই তিনি সুসজ্জিতা হইলেন। পরিশেষে একাকী এক নিভৃত গৃহে যাইয়া সন্ন্যাসী সত্যব্রত স্থায় যত্ন-রক্ষিত একটি কাঁচা বৃক্ষ শাখা ও একটি মৃত পক্ষীর ডানা সেইমত

অঙ্গে ধারণ করিলেন ; এবং মুহূর্তকাল মধ্যে অনন্ত শূন্তে উড্ডীন হইলেন । এই বৃক্ষশাখা ও পক্ষীর ডানার আর একটি গুণ এই যে, সমধর্মী মধ্যে—অর্থাৎ যে যে ইহা ধারণ করিবে, তাহাদের পরস্পরের মধ্যে,—কেহ কাহাকে দেখিতে পাইবে না । সুতরাং সন্ন্যাসী সত্যব্রত অলঙ্কিত ভাবে তাঁহার অনুসরণ করিলেন ।

(৯)

এইরূপে অনন্ত বিমানে উড়িতে উড়িতে, তাঁহারা কত দেশ, কত জনপদ, কত অরণ্য, কত প্রান্তর, কত সমুদ্র, কত পর্বত অতিক্রম করিলেন । পরিশেষে রাজকুমারী তাঁহার গীম্ব্য-স্থানে উপনীত হইয়া এক অতি গভীর সুড়ঙ্গময় পাতাল প্রদেশে অবতরণ করিতে লাগিলেন । সত্যব্রতও মনোমধ্যে এতটুকু ভয় বা বিস্ময় না আনিয়া তাঁহার অনুসরণ করিলেন । শেষে রাজকুমারী তাঁহার অভাষ্ট স্থানে উপনীত হইলেন ; এবং পূর্বোন্নিখিত সরস বৃক্ষশাখা ও মৃত পক্ষীর ডানা খুলিয়া ফেলিলেন ।

এ স্থানটি একটি রাজ সভা । সত্যব্রত দেখিলেন, এই রাজ-সভার দৃশ্য অতি মনোহর । শত শত লোক স্ব স্ব মণিমুক্তা খচিত আসনে উপবিষ্ট ; চতুর্দিক উৎসব ও আনন্দময় । অঙ্গরী-সদৃশ নর্তকী বৃন্দ স্তম্ভুর তানলয় সংযুক্ত গান গায়িতে গায়িতে তালে তালে নৃত্য করিতেছে ; সুগন্ধি দ্রব্যের তীব্র আঘ্রাণে সমস্ত স্থান পরিপূর্ণ । সভার মধ্যস্থলে বিবিধ কারুকার্য-খচিত সিংহা-মনে কিঞ্চ এক অতি কদাকার নরমূর্তি বা প্রেত-যোনি বিভী-

বিকা দেখাইতেছে। এই সময় সত্যব্রতের অন্তরে ভয় ও বিষয়ের আবির্ভাব হইল। কিন্তু বলা বাহুল্য যে, কেহই তাঁহাকে দেখিতে পায় নাই এবং তাঁহার আগমন বার্তাও জানিতে পারে নাই।

নৃত্য গীত সমাপনান্তে সকলেই রাজকুমারীকে যথাবিহিত আদর-অভ্যর্থনা করিলেন। তিনিও সকলের সহিত মিষ্টালাপ করিয়া রাজসিংহাসন সন্নিকটে উপনীত হইলেন। সেই নর-পিশাচ প্রেতমূর্ত্তিরাজ্যও তাঁহার স্বাগত কুশল-সংবাদ জিজ্ঞাসাদির পর স্বাভাবিক বিকৃত স্বরে কহিল, “কল্যাণি, আজ কি মনে করিয়া ? এত দিনে কি আমাদের অভীষ্ট সিদ্ধ হইল ?”

রাজকুমারী উত্তর করিল, “গুরুদেব, আপনি অন্তর্ধ্যামি,— আপনাদিগের অবিস্মৃত কি আছে ? মা রণচণ্ডীর কৃপায় বুকি—এই দিনে আমরা পূর্ণমেনোরথ হইলাম ! এক্ষণে আপনি প্রসন্ন হউন। প্রভু, এই শেষবার ; এইবার প্রতিজ্ঞা জয় করিতে পারিলেই আমাদের আজীবনসঞ্চিত আশা পূর্ণ হয়। দেব, আপনার কৃপায় ৯৯ জনকে অকালে সমালয়ে পাঠাইয়াছি, বাকী আর একটি মাত্র ! ইহাকে পরাস্ত করিতে পারিলেই আমার সমস্ত পরিশ্রম সার্থক এবং আপনারও অদ্ভুত কীর্তি লাভ হয়। অতএব দেব, দ্বার উন্মুক্ত করুন ; ইহাকে বিনাশ করিতে পারিলেই আপনি সঙ্গরাজ্যধিপতি হন, আর আমিও অমরা হইয়া অতুল্য প্রতাপে এই ধরাধামে বিচরণ করিতে পারি।

এই বলিয়া তিনি সত্যসুখার বৃত্তান্ত আদ্যোপান্ত বর্ণন করিলেন।

রাজা ঈষৎ হাসিয়া কহিলেন, “বৎসে ইহার জ্ঞান আর চিন্তা

কি ? অগ্রে শ্রম দূর কর ; মন প্রফুল্ল হোক । আমি এখনই প্রশ্ন বলিয়া দিতেছি । মনুষ্যের সাধ্য কি যে, আমার মনোভাব অবগত হইবে !”

কিছুক্ষণ আমোদ আশ্লাদে কাটিয়া গেল । তদনন্তর সেই অদ্ভুত নৃপতি রাজকুমারীকে কহিলেন, “কল্যা তোমার বিবাহ সভায় সকলের সমবেত হইলে, তুমি সেই প্রণয়োন্মত্ত বাল-সন্ন্যাসীকে কহিবে যে, ‘আমার মনের ভাব কি বল ?’ উত্তর ‘ঘেঁটু ফুল’ । পৃথিবীর এত জিনিস থাকিতে ‘ঘেঁটু ফুলের’ নাম সে কখনই করিতে পারিবে না । আর, যদিই বা প্রথমটায় জয়ী হইতে পারে, তিন দিনে তিন প্রশ্ন করিবে ত !—দ্বিতীয় দিনে আমি এমন প্রশ্ন বলিয়া দিব, যাহা কিছুতেই তার মনে আসিবে না । বৎসে, যাও—নিশ্চয়ই তুমি অমরী হইতে পারিবে ।

“সে আপনারই রূপা !” বলিয়া রাজকুমারী গুরুদেবকে প্রণাম করিয়া সাকরুণ-কৃতজ্ঞ দৃষ্টিতে বিদায় লইলেন : গুরুদেবও যথাবিহিত আশীর্ব্বাদ করিয়া, প্রস্বেদ ফল কি হয় জানিতে চাহিয়া বিদায় দিলেন । রাজকুমারী পূর্ব্বমত পন্থাবলম্বনে ক্রমে ক্রমে আবার সেই ভয়াবহ পথ অতিক্রম করিতে লাগিলেন । সত্যব্রতও স্রীয় অভীষ্ট সিদ্ধ করিয়া নির্ব্বিশ্রে তাঁহার অনুসরণ করিতে লাগিলেন ।

(১০)

বহুপথ অতিক্রম করিয়া ক্রমে উঁহারা উভয়েই আপনাপন গন্তব্যস্থানে উপনীত হইলেন । তখন নিশা প্রায় শেষ হইয়াছে ।

সত্যব্রত অতি অল্পক্ষণমাত্র শয্যায় বিশ্রাম করিয়া বন্ধু সত্যসখার নিদ্রাবসানের অপেক্ষা করিতে লাগিলেন। প্রভাত হইয়া গেল, তথাপিও তাহার নিদ্রা ভঙ্গ হইতেছে না দেখিয়া সত্যব্রত চেষ্টা করিয়া বন্ধুকে জাগরিত করিলেন। এবং একটু উদ্গ্রাব ভাবে কহিলেন, “ছি ভাই! তোমার একটু কাণ্ডজ্ঞান নাই! আজ না রাজকুমারীর প্রশ্নের উত্তর দিতে বিবাহ সভায় যাহবে?”

“হ্যা—তাই তো!” এই বলিয়া সত্যসখা অতি ব্যস্তভাবে শয্যা ত্যাগ করিয়া প্রাতঃকৃত্যাদ সম্পাদন করিলেন। তাহার বিবাহ সভায় বাইবার সময় সত্যব্রত তাঁহাকে জিজ্ঞাসা করিলেন, কি ভাই, বিবাহ সভায় তো যাহতেছ; কিন্তু রাজকুমারীর প্রশ্নের কি উত্তর দিবে, বল দেখি?”

উত্তর আর কি দিব? সেখানে, উপস্থিত বাহা মূল আসিবে, তাহাই বলিব!”

সত্যব্রত একটু হাসিলেন; বলিলেন, “ভাই, মজিতে ত বাসিয়াছ, আর উপায় নাই। স্বেচ্ছায় কাল অপেক্ষ মৃত্যুকে পদাঘাত করলে কে জীবন রক্ষা করতে পারে? এক্ষণে আমার এই একটা শেষ অনুরোধ রক্ষা কর। দেখ ভাগ্যভাগে যদি সফলমনোরথ হও!”

সত্যসখা আগ্রহ সহকারে বন্ধুর উপদেশ গুলিতে চাহিলেন। সত্যব্রত কহিলেন, “দেখ, কাল রাat্রে যখন আমি তোমার আত্মবিপদের কথা ভাবিয়া মনে মনে নানা অমঙ্গল আশঙ্কা করিতোছিলাম এবং এক একবার ইষ্ট দেবতা মা চাঁওকার উদ্দেশে তোমার মঙ্গলার্থ হৃদয়ের বেদনা জানাইতে ছিলাম, সেই সময়

মা যেন সদয় হইয়া আমায় প্রত্যাশা করিলেন যে, 'তোমার ভয় নাই! আমি তোমার বন্ধুকে এ বিপদে উদ্ধার করিব! তোমার বিবাহ সভায় যাত্রা কালে তাকে কেবলমাত্র আমার আজ্ঞা জানাইয়া বলিস যে, যে সময় রাজকুমারী জিজ্ঞাসা করিবে,— 'আমার মনের ভাব কি বল—আমি কি মনে করিয়াছি?' তখন যেন তোমার বন্ধু বলে যে, 'ঘেঁটু ফুল'। তাহা হইলেই তোমার বন্ধুর প্রথম দিনের পরীক্ষায় জয় হইবে।' পরে আমি দেখি, কেউ কোথাও নেই। তাই বলছি ভাই, তুমি এম্নে ত মারা গিয়েইছ, তা দেখ, মার প্রত্যাশা যদি রক্ষা পায়।"

সত্যসথা হৃষ্টচিত্তে বন্ধুর প্রস্তাবে সন্মত হইলেন।

(১১)

এক সুবিস্তৃত ময়দানে বিরাট-বিবাহ সভা সজ্জিত হইয়াছে। সহস্র সহস্র লোক উদ্গ্রীব ভাবে বিবাহ সভায় বিরাজ করিতে লাগিল। মধ্যস্থলে সিংহাসনোপরি রাজা উপবিষ্ট; দক্ষিণে বিবিধ বেশভূষার সজ্জিতা রাজকুমারী দণ্ডায়মান। ক্ষণপরেই সত্যসথা ও সত্যব্রত বিবাহ সভায় দেখা দিলেন। দর্শকগণের কোতূহল আরও বর্ধিত হইল। মুহূর্ত্তমধ্যে সেই বিরাট সভা নিম্নক— গভীরভাবে ধারণ করিল। রাজা এখনও সত্যসথাকে এ বিষয়ে নিরস্ত হইতে অমরোধ করিলেন। কিন্তু সত্যসথা অচল—অটল ভাবে পরীক্ষা প্রশ্নের উত্তর দিতে কৃতসঙ্কল্প হইলেন! রাজকুমারী প্রশ্ন করিলেন,—“আমি কি মনে করিয়াছি বল?” সত্যসথা উত্তর করিলেন,—“ঘেঁটু ফুল।” রাজকুমারীর মুখ ন্তান হইল।

রাজা জিজ্ঞাসা করিলেন, “কি, উত্তর ঠিক হইয়াছে ত ?” নত-
মুখে রাজকুমারী উত্তর করিলেন,—“হাঁ।”

মুহূর্ত্তকালের জন্ত সভামধ্যে জয়ধ্বনি পড়িয়া গেল। সক-
লেই সত্যসথাকে ধন্ত ধন্ত করিতে লাগিল। এ পর্য্যন্ত বত
ব্যক্তিই আনিয়াছে, প্রথম উত্তরেই শমন-সদনে গিয়াছে,—
দ্বিতীয় উত্তর দিতে কাহারও অবসর হয় নাই। কিন্তু এবার এই
প্রথম পরীক্ষায় এই শিশু-সন্ন্যাসীর জয় হওয়ায় সকলেই আন-
ন্দিত হইল। রাজাও হঠাৎ মনে মনে কহিলেন, “আঃ! এই
দেব-শিশু হইতেই বুঝি আমার রাজ-কুল-মান সমস্ত রক্ষা
হইবে!—এত দিনে বুঝি বিধাতা মুখ তুলিয়া চাহিলেন!”

এইবার রাজকুমারীর দ্বিতীয় প্রশ্ন। পাঠকের স্মরণ আছে,
রাজকুমারী যে উপায়ে, যে স্থান হইতে প্রথম প্রশ্ন সংগ্রহ করিয়া
আনিয়াছিলেন; দ্বিতীয়বারও তিনি ঠিক সেই উপায়ে সেখান
হইতে দ্বিতীয় প্রশ্ন সংগ্রহ করিয়া আনিলেন।—সে প্রশ্নের
উত্তর, তাঁর সেই গুরুর পায়ের “কনিষ্ঠ অঙ্গুলি।” বলা বাহুল্য,
সত্যব্রতের পূর্বোক্ত কৌশলে, সত্যসথা এবারও—এই দ্বিতীয়
পরীক্ষায়ও উত্তীর্ণ হইলেন।

(১২)

কিন্তু এইবার শেষ পরীক্ষা! বারবার এইবার তিন বার।
এইবার হয় সত্যসথা রাজকুমারীলাভে কৃতকার্য হইবেন, নয়
তাঁহাকে অকালে কালের কোলে শয়ন করিতে হইবে! ঘাই
হোক, রাজকুমারীর গুরু কিন্তু এবার রাজকুমারীকে কহিলেন
“বৎসে, কল্য বিবাহসভায় প্রশ্ন রহিল,—‘আমার মন্তক’।

তুমি এই প্রশ্নেই সেই ছরাকাজ্জ-পরায়ণ বালককে ফাঁসি-রজ্জুতে ঝুলাইতে পারিবে। আর, আজ আমি নিজেও তোমার সঙ্গে যাইতেছি। আমি উপস্থিত না থাকাতেই দুই দিনই তোমার পরাজয় হইয়াছে। এবার দেখিব, কার সাধ্য, আমার প্রশ্নের উত্তর দিতে সমর্থ হয়!”

এই বলিয়া রাজকুমারী-সমভিব্যাহারে গুরুও সেই স্বয়ম্বর-সভায় উপস্থিত হইতে মনস্থ করিলেন।

কিন্তু পাঠক, এ দিকে আমাদের সেই সত্যব্রত সন্ন্যাসী কি করিতেছেন, দেখুন! তিনি যেই শুনিলেন যে, কল্যাকার প্রশ্নের উত্তর—‘রাজকুমারীর গুরুদেবের মস্তক’,—অমনি তথা হইতে অলক্ষিত ভাবে একখানি তীক্ষ্ণধার অসি সঙ্গে লইয়া তাঁহাদের পশ্চাৎ পশ্চাৎ বহির্গত হইলেন। পূর্বোল্লিখিত পহাবলঘনে অগ্রে রাজকুমারী, পরে এই পিশাচ-গুরু এবং পরিশেষে তাঁহাদের অলক্ষিত ভাবে সত্যব্রত সন্ন্যাসী অনন্ত বিমানপথে উড্ডীন হইলেন।

রাজকুমারীও তাঁহার গুরু প্রায় তাঁহাদের গন্তব্য স্থানে উপনীত হইয়াছেন, এমন সময় সন্ন্যাসী সত্যব্রত চকিতের গ্রাস গুরুর কেশাকর্ষণ করিয়া সেই তীক্ষ্ণধার তরবারির সাহায্যে তাহার মুণ্ডটি কাটিয়া লইলেন। গুরুর প্রাণহীন জড়দেহ ভূমে নিপতিত হইল। বলা বাহুল্য, অগ্রগামিনী রাজকুমারী ইহার বিন্দুবিসর্গও জানিতে পারিলেন না। সেই সরস বৃক্ষ-শাখা ও সেই মৃত পক্ষীর পাখানা—এ দুয়ের গুণ পূর্বেই উল্লিখিত হইয়াছে। উল্লিখিত হইয়াছে যে, ইহা ধারণে, সমধর্মীদের মধ্যে প্রথম, দ্বিতীয় বা তৎপরবর্তীকে দেখিতে পায় না। সুতরাং সত্যব্রত কর্তৃক গুরু

‘মুণ্ডচ্ছেদ, রাজকুমারী কিছুই জানিতে পারিলেন না । রাজকুমারী নিজ নিবাসে উপনীত হইলেন, সত্যব্রতও সানন্দে বাসায় ফিরিলেন । অতঃপর সত্যব্রত অতি ব্যস্ততা সহকারে সেই ছিন্ন মুণ্ডটি বস্ত্রাচ্ছাদিত করিয়া একটি কাপড়ের মোটরূপে পরিণত করিলেন ।

প্রভাত হইলে পূর্ব পূর্ব বারের মত এবারও তিনি বন্ধু সত্যসখার নিদ্রাভঙ্গ করিলেন । সেই মত কালিকাদেবীর দোহাই দিয়া কহিলেন, “দেখ, মায়ের কৃপায় দুই দিন তুমি জয়ী হইয়াছ । আজ তৃতীয় দিনের তৃতীয় পরীক্ষা ! তা দেখ, কল্য রাত্রে আমি গভীর ধ্যানে মা-চণ্ডিকার আরাধনা করিতেছিলাম ; তিনি প্রসন্ন হইয়া আমার সম্মুখে আসিয়া কহিলেন, “ভয় নাই ; তোমার বন্ধুরই জয় হইবে ! এই বস্ত্রাবৃত যে জিনিসটি দিতেছি, এইটি তাহাকে প্রদান করিস্ । তাহাকে বলিস্ যে, বিবাহসভায় যখন তাহাকে রাজকুমারী প্রদত্ত করিবে, ‘আমার মনের ভাব কি বল !’ তখন সে, যেন মুখে কোন উত্তর না দিয়া বলে, ‘এই কাপড়ের বস্ত্রের মধ্যে বাহা আছে, তুমি তাহাই মনে করিতেছ ।’ তাহা হইলে আর কোন গোলযোগ হইবে না । কিন্তু সাবধান, যেন ভ্রমেও প্রশ্নের উত্তর দিবার অগ্রে কাপড়ের এ মোটটি না খুলে । তাহা হইলে হিতে বিপরীত হইবে,—তাহার প্রাণ যাইবে ।’ তাই ভাই, তোমার অনুরোধ করিতেছি, যেন তুমি ভ্রমক্রমেও, প্রশ্নের উত্তর দিবার অগ্রে, এই কাপড়ের মোটটি না খোল !”

সত্যসখা তাহাই স্বীকার করিলেন ।

(১৩)

আজ তৃতীয় দিন। সমাগত দর্শকমণ্ডলী আজ সকলেই বিবাহ-সভায় অধিকতর উৎকর্ষ প্রকাশ করিতেছে। আজ বাল-সন্ন্যাসীর জীবন সংশয়! এজন্ত সকলেই অতিশয় চাঞ্চল্য ও বিমর্ষ, অথচ কিছু কোতূহল ভাবাপন্ন।

যথাসময়ে সত্যসথা ও সত্যাবৃত তথ্য দর্শন দিলেন। সন্ন্যাসি-দ্বয় সেখানে উপস্থিত হইবামাত্র সেই বহু জনাকীর্ণ বিরাট বিবাহসভা এককালে নিস্তব্ধ ও গম্ভীর ভাব ধারণ করিল। রাজা সত্যসথাকে সম্বোধন করিয়া কহিলেন, “হে বালক সন্ন্যাসী! আজ তোমার শেষ উত্তর;—অতএব প্রস্তুত হও।”

তৎপরে কত্নাকে প্রশ্ন করিতে বলিলেন। রাজকুমারী সত্যসথাকে কহিলেন, “আমার মনের ভাব কি বল! উপস্থিত আমি কি মনে করিতেছি?”

সত্যসথা কিছু না বলিয়া বন্ধুর উপদেশমত সেই বস্ত্রের মোটটি রাজপদতলে ফেলিয়া দিয়া রাজকুমারীকে কহিলেন, “এই কাপড়ের বস্তার মধ্যে বাহা আছে, আপনি তাহাই ভাবিতেছিলেন।”

সমাগত সমস্ত লোক অধিকতর উৎসুকভাবে তাহা দেখিতে আগ্রহসর হইল। রাজার আদেশে মুহূর্ত্তমধ্যে সেই বস্ত্রাবৃত দ্রব্যটি উন্মুক্ত হইল। একজন রাজকর্মচারী সেইটি হাতে করিয়া সমাগত দর্শকমণ্ডলীর কোতূহল চরিতার্থ করিতে লাগিল। সভাস্থ সকলে ভীত, চকিত, স্তম্ভিত ও বিস্মিতভাবে “একি, একি” রব করিয়া উঠিল। গুরু ছিন্ন মুণ্ড দেখিবামাত্র রাজকুমারীর মুখ নান হইয়া গেল; সর্কশরীর সহসা ঘোচ কালিন্দী হইল।

এখানে বলা আবশ্যক যে, রাজকুমারীর মিথ্যা বলিবার ইচ্ছা থাকিলেও সে ইচ্ছা মনোমধ্যে লয় করিতে হইবে। যেহেতু, মিথ্যা বলিলেও, অবগুস্তাবী প্রত্যক্ষ প্রমাণে সত্য আপনা হইতে প্রকাশ পায়; তাঁহার মুখ কালিলাময় হইয়া যায়। সুতরাং কিছুতেই রাজকুমারী সত্য স্বাকার করিতে পারিতেন না। এ ব্রতের নিয়মই এই। সেই জন্ত প্রশ্ন পরীক্ষায় কেহ যথার্থ উত্তর প্রদান করিলে, রাজকুমারীকে সত্য স্বাকার করিতেই হইত। যাইহোক, এখন কাহারও জানিতে বাকী রহিল না যে, সত্যসথারই জয় হইল। সুতরাং চারিদিকেই জয়ধ্বনি পড়িয়া গেল। আনন্দের রোল গগন-মার্গ ভেদ করিল। রাজা সত্যসথাকে গাঢ় আলিঙ্গন করিয়া আনন্দবিভোর প্রাণে তাঁহাকে বলিলেন, “বৎস! তোমা হইতেই এতদিনে আমার কুল মান মর্যাদা সকলই রক্ষা হইল,—কত শত লোকের অকাল মৃত্যুর পথ রোধ হইল! আমি তোমাকে আমার প্রতিশ্রুত অর্দ্ধরাজ্য ও এই কস্তা দান করিলাম।”

(১৪)

রাজকুমারী এইবার সমস্ত রহস্ত প্রকাশ করিলেন। এবং গুরুদত্ত মন্ত্রগুণে স্বাভাবিক রূপ প্রাপ্ত হইলেন। রাজাকে বলিলেন, “পিতঃ! আমার এই গুরু একজন পিশাচসিদ্ধ। আজ কয়েক বৎসর হইল, একদিন অন্তঃপুরোদ্যানের আমি ভ্রমণ করিতেছি, এমন সময় আমি ইহঁার দর্শন পাইলাম। উদ্যানের একটি মৃত পক্ষা পড়িয়া ছিল। ইনি হঠাৎ পক্ষাটিকে জীবিত করিতে পারিলেন দেখিয়া আমি ইহঁার শিষ্যত্ব গ্রহণ করিলাম

ইহারই আদেশানুসারে এতদিন আমি সমস্ত রহস্য অপ্রকাশ রাখিয়াছিলাম ।”

তদনন্তর পিতার নিকট মুক্তকণ্ঠে নিজ অপরাধ স্বীকার করিয়া কহিলেন, “পিতঃ, রাজা ও রাজপুত্রাদি যে ৯৯ জন সম্ভ্রান্ত ব্যক্তি আপনার শ্মশান-উদ্যানের ফাঁসিরজুতে অবলম্বিত আছেন, আমি সম্ভ্রাবনী মন্ত্রবলে এখনই তাঁহাদের পুনর্জীবন দান করিতেছি। আপনি আমার প্রতি প্রসন্ন হউন ।”

এই বলিয়া অক্ষুণ্ণরূপে মন্ত্র জপ করিবামাত্র মুহূর্ত্ত মধ্যে সেই ৯৯ জন গণ্যমান্য সম্ভ্রান্ত ভদ্রলোক এবং রাজা ও রাজকুমার হঠাৎ চিত্তে তথায় উপনীত হইয়া সত্যসথাকে অভিবাদন করিয়া বারংবার জয়ধ্বনি করিতে লাগিলেন। সত্যব্রতও এইবার সমস্ত রহস্য প্রকাশ করিলেন। যে উপায়ে তিনি বন্ধু সত্যসথাকে আসন্ন মৃত্যু হইতে রক্ষা করিয়া রাজকুমারীর প্রশ্নের উত্তর প্রদানে সমর্থ হন, অবিকল আদ্যোপান্ত বলিলেন।

এই অলৌকিক ব্যাপার শ্রবণে সকলের চক্ষেই আনন্দাশ্রু পড়িতে লাগিল। সকলেই যুগপৎ বিস্ময় ও হর্ষ প্রকাশ করিতে লাগিলেন। আনন্দ কোলাহল একটু উপশমিত হইলে এইবার সত্যসথা সর্বসমক্ষে প্রাণের বন্ধু সত্যব্রতকে নির্দেশ করিয়া মুক্তকণ্ঠে সেই লোক মণ্ডলীকে কহিলেন, বোধ করি, সকলেই বুঝিয়াছেন “আমি নিমিত্ত মাত্র। এই মহাত্মা সদাশয় বন্ধুর অনুগ্রহেই আমি এ ভীষণ পরীক্ষা হইতে উদ্ধার পাইয়াছি। সুতরাং ইহার ঋণ অপরিশোধনীয় !”

সত্যব্রত নীরবে নতশিরে দণ্ডায়মান রহিলেন। এইবার সত্যসথা বন্ধু সত্যব্রতকে কহিলেন, “ভাই, আমি এই মহা-

সভায় সর্বসমক্ষে প্রতিজ্ঞা করিতেছি যে, তোমার অকৃত্রিম উপকারের যৎকিঞ্চিৎ প্রত্যাশকার স্বরূপ আমি আমার প্রাপ্য অর্দ্ধ রাজ্য হইতে কৃতজ্ঞোপহার স্বরূপ তোমাকে তাহার অর্দ্ধেক দান করিতেছি । অতএব ভাই, সানন্দে বন্ধুর এই প্রীতির উপহার গ্রহণ কর ।”

(১৫)

সত্যব্রত কহিলেন, “তবে আমিও বলিতেছি, সভাস্থ সকলে শ্রবণ করুন । সকলে বিচার করুন, কে উপকারক, আর কে উপকৃত !”

এই বলিতে বলিতে সত্যব্রত স্বশরীরে ক্রমে ক্রমে উর্দ্ধে উঠিতে লাগিলেন ।

উঠিতে উঠিতে আবার সত্যসথাকে উদ্দেশ্য করিয়া কহিলেন,—“প্রাণের বন্ধু ! ভাই সত্যসথা ! আমায় কি তুমি চিনিতে পারিতেছ না ? তোমার সেই গৃহত্যাগের দিন স্মরণ কর দেখি ! মনে আছে কি, সেই দিন গভীর নিশীতে সেই ভয়াবহ অশান ক্ষেত্রে একটি শবদাহ করিতে কতকগুলি লোক উপস্থিত হইয়াছিল ? মনে হয় কি, সেই মৃত লোকটির দুইশত টাকা ঋণ ছিল ? আরও মনে আছে কি, সেই দুই শত টাকার জন্ত তাহার প্রতি সেই শবদাহকারীদের কি ভীষণ নিগ্রহ ! শেষে সে নিগ্রহ দেখিয়া,—দয়াবান বন্ধু তুমি,—তোমার একমাত্র সম্বল,—বুকের রক্তেরও অধিক,—সেই দুই শত টাকা তাহাদিগকে দান করিয়া তুমি সেই মৃত ব্যক্তির সদগতি কর ! সে সব কথা মনে

পড়ে কি ? টাকা পাইয়া তবে তাহারা সেই শবের যথাবিহিত অন্ত্যেষ্টিক্রিয়া করে, স্বরণ হয় কি ? প্রাণের বন্ধু, দাঁনের রক্ষক, ভাই সত্যসখা ! এ অভাগাকে চিনিতে পারিতেছ না ? আমিই সেই শব-দেহ !—আমিই সেই হুভাগ্য জীব ! তোমার কৃপায় আমার আত্মার সদগতি হইয়াছে,—আমি মুক্তি পাইয়াছি। ভাই, তোমারই অশেষ কল্যাণে আমি ঋণের হাত এড়াইয়া দেবযোনি প্রাপ্ত হইয়াছি। ভাই, পৃথিবীতে এই শিক্ষা দাও,—যেন জীবনে, পারত পক্ষে কেহ ঋণ না করে ! আর যদিই একান্ত ঋণ করিতে হয়, তাহা না শোধিয়া যেন তাহার দেহান্তর না হয় ! তোমাদ্বারা আমি যে উপকার প্রাপ্ত হইয়াছি, তাহার ত কোন প্রতাপকার করিতে পারি নাই। তাই ভাই, শরীরবেশে এতদিন ছায়ার মত তোমার পাছে পাছে ছিলাম। এত দিন তোমারই সঙ্গ লইয়া ছিলাম,—কিসে তোমার সে মহা উপকারের কিছু মাত্রও প্রতাপকার করিতে পারি ! তাই আমার সন্ন্যাসী বেশ ধারণ, তাই আমার পৃথিবীতে অবতরণ ! কিন্তু ভাই, ভগবানের কৃপায় এতদিনে আমার কাব্য শেষ হইল ! এখন আমি স্বলোকে প্রস্থান করিলাম !”

এই বলিতে বলিতে সত্যব্রতের সেই মূর্তি অলৌকিক জ্যোতির্ময় রূপে অনন্ত নীলিমাময় ব্যোমপথে মিশিয়া গেল। সত্যসখার মুখ হইতে জলদগন্তারস্বরে ধ্বনিত হইল,—“অদ্ভুত প্রতাপকার !” সেই সমাগত সহস্র সহস্র দর্শক মণ্ডলীর মুখ হইতে এককালে ধ্বনিত হইল,—“অদ্ভুত প্রতাপকার !” সেই স্বর ঘনীভূত হইয়া দিক্দিগন্তে প্রতিধ্বনিত হইল,—“অদ্ভুত প্রতাপকার !” যেন সেই স্বর সেই অনন্ত নীলিমাময় ব্যোমপথ বিদীর্ণ

করিয়া সভ্যতের অনুসরণ করিল;—স্বর্গ মর্ত্য একাকার করিয়া তাঁহার সাধুবাদের বিজয়-ভেরীর সহিত মিলিয়া বাজিয়া উঠিল,—“অদ্ভুত প্রত্যাশকার !”

রাজা, রাজকুমারী ও সমাগত লোকমণ্ডলী সকলেরই প্রাণে ঔপূর্ব্যভাবের আবির্ভাব হইল। সকলেই বিস্মিতভাবে একবার সেই অনন্ত আকাশপানে ও একবার সত্যসথার মুখপানে দেখিতে লাগিল।—সকলেরই কাণে ও প্রাণে যেন গভীরনাদে বাজিতে লাগিল,—“অদ্ভুত প্রত্যাশকার !”

তারপর ?—তারপর যথাসময়ে, মহাসমারোহে রাজকুমারীর সহিত সত্যসথার শুভ পরিণয়-ক্রিয়া সমাধা হইল। কিন্তু সে সকল বিষয়ের আলোচনা করা এ আখ্যায়িকার উদ্দেশ্য নহে।

সমাপ্ত।





অদৃষ্ট ।

অদৃষ্ট-ছাড়া পথ নাই। অত্রে পরে কা কথা,—স্বয়ং বিধাতা-
পুরুষও অদৃষ্ট-লিপি খণ্ডন করিতে পারেন না। এই জন্ত
হিন্দুর জ্যোতিষ-শাস্ত্র জগদ্বিখ্যাত। এই আধ্যাত্মিকটিতে
হিন্দুর অদৃষ্টবাদ ও জ্যোতিষশাস্ত্রের বিষয় কিছু কিছু বুঝা
যাইবে।

(১)

কোন গ্রামে এক জ্যোতিষী ব্রাহ্মণ বাস করিতেন। ব্রাহ্মণ
একদিন নিজের ‘কোষ্ঠী’ গণনা করিয়া দেখিলেন যে, কুস্তীরগ্রাসে
তাঁহার প্রাণবিরোগ হইবে। অপঘাতে, জীবননাশ অবশ্যম্ভাবী
বুঝিয়া, ব্রাহ্মণ ভ্রিয়মাণ হইলেন। কিন্তু মায়া-মোহের কি বিচিত্র
লীলা,—ঘোর অদৃষ্টবাদী জ্যোতিষী ব্রাহ্মণেরও বিধিলিপিতে
সংশয় জন্মিল। কর্ম কাল ও পুরুষকারের আশ্রয় লইয়া, ব্রাহ্মণ
অদৃষ্ট জয় করিতে কৃতনিশ্চিত হইলেন। যে দেশে গঙ্গা নাই,
নদ, নদী বা বিস্তৃত জলাশয় নাই, সেই দেশে বাস করিতে সক্ষম
করিলেন।

যথাসময়ে, ব্রাহ্মণ পঁজী পুঁথি লইয়া, এক গঙ্গাহীন—জলা-
শয়হীন দেশে উপনীত হইলেন।—সে দেশে নদ, নদী, সরোবর

কিছুই নাই,—স্থানে স্থানে ছই একটি মাত্র কূপ আছে। ব্রাহ্মণ, সেই স্থানে অবস্থান করিতে মনোনীত করিলেন।

কিছুদিনের মধ্যে ব্রাহ্মণের বিদ্যা, বুদ্ধি ও গুণগরিমা সাধারণ প্রকাশ পাইল। সেই দেশের রাজা, ব্রাহ্মণকে সাদরে আহ্বান করিয়া, আপন সভাপণ্ডিত নিযুক্ত করিলেন। অধিকন্তু, রাজকুমারের শিক্ষাভারও তাঁহার উপর স্তম্ভ হইল। নিষ্ঠাবান ব্রাহ্মণের শিক্ষাগুণে, রাজকুমার অতি অল্পকালের মধ্যে, সাহিত্যিক ভাবাপন্ন হইলেন। বার, ত্রত, উপবাস ও হিন্দুর আচারের প্রতি তাঁহার অকৃত্রিম অনুরাগ জন্মিল। অতি অল্পদিনের মধ্যেই রাজকুমার পরম বৈষ্ণব হইয়া উঠিলেন।

রাজা, পুত্রের ঈদৃশ ধর্ম্যভাব দেখিয়া, অত্যন্ত সন্তুষ্ট হইলেন এবং ব্রাহ্মণকে অধিকতর ভক্তি করিতে লাগিলেন। এমন কি, পুত্রকে ক্ষণমুহূর্তের জগুও তাঁহার সঙ্গচ্যুত করিতেন না। এইরূপে কিছুকাল অতিবাহিত হইল।

(২)

একদিন এক মহাযোগ উপলক্ষে রাজপুত্র গঙ্গান্নান করিতে অভিলাষী হইলেন। এই সংবাদ শ্রবণে, রাজা অতিশয় স্তম্ভী হইলেন, এবং অবিলম্বে পুত্রের বাসনানুযায়ী আয়োজন করিতে মন্ত্রীকে অনুমতি দিলেন।

অল্পক্ষণ মধ্যে যানাদি প্রস্তুত হইল। রাজপুত্র ব্রাহ্মণকে সমভিব্যাহারী হইতে অনুরোধ করিলেন। ব্রাহ্মণ, তাহাতে আপত্তি করিলেন। রাজপুত্র বিনয় সহকারে, পুনঃ পুনঃ অনু-

রোধ করিতে লাগিলেন। কহিলেন, “দেব, আপনি আমাকে পুত্রাধিক স্নেহ করেন; আপনার অমূল্য উপদেশে আমি মানুষ্য হইয়াছি; আপনার ঋণ ইহজীবনে শোধিতে পারিব না! আপনি ত মুহূর্ত্তের জন্ত আমার কাছ-ছাড়া হন না; কিন্তু আজ কেন এ অধীনের প্রতি বাক্য হইতেছেন? গঙ্গা-মাহাত্ম্য আপনিই আমাকে শিক্ষা দিয়াছেন, তাই আমি গঙ্গাস্নান করিয়া পুণ্য-সঞ্চয় করিতে বাসনা করিয়াছি। আগামী পরশ্ব যোগ;—দেব, এ সময়ে, আপনি কেন আমার প্রতি নির্দয় হইতেছেন?”

ব্রাহ্মণ, মনোভাব গোপন করিলেন। এখানে আসিয়া অবধি, তিনি কাহারও নিকট মনের কথা প্রকাশ করেন নাই। অধিকন্তু, স্থান পরিবর্তনের সঙ্গে সঙ্গে, তিনি আপন অদৃষ্ট-গগনার কথাও একরূপ ভুলিয়া গিয়াছিলেন। রাজপুত্রের গঙ্গা-স্নান বাইবার কথা শুনিয়া আজ তাঁহার সেই স্মৃতি জাগিয়া উঠিল। যে ভয়ে, স্বদেশ ও স্ব-গোত্র এবং আত্মীয় বন্ধুবান্ধব ত্যাগ করিয়া তিনি এই গঙ্গা-তীরে দেশে বাস করিতেছেন, রাজপুত্রের মুখে আজ বহুদিনের পর সেই কথা শুনিয়া, তিনি চমকিয়া উঠিলেন। মুহূর্ত্তের জন্ত তাঁহার প্রাণ দ্রুত দ্রুত করিয়া কাঁপিয়া উঠিল। ব্রাহ্মণ সে ভাব গোপন করিবার চেষ্টা পাইলেন। কিন্তু সূচতুর রাজপুত্র তাহা বুঝিতে পারিলেন। করষোড়ে, অতি বিনীতভাবে কহিলেন, “দেব, চিরদিন আমাকে সম্মানতুল্য ভাবিয়া আসিতেছেন, আজ কেন সেবককে অবিশ্বাস করিতেছেন? আপনার মনের কথা কি, অপকটে প্রকাশ করুন; আমি সাধ্যানুসারে তাহার প্রতিকার করিতে চেষ্টা পাইব।”

(৩)

ব্রাহ্মণ, এবার একটু ইতস্ততঃ করিয়া কহিলেন, “রাজ-
কুমার, তুমি মনক্ষুণ্ণ হইও না। আমার হ্রদৃষ্টের কথা শুনিলে,
ভরসা করি, তুমিও গঙ্গান্নানে যাইতে আমাকে নিষেধ করিবে।
এবং সেই ক্ষণটুকু, আমি এই দীর্ঘকাল ঘর-বাড়ী-তাগ করিয়া
প্রবাসে—এই গঙ্গাহীন দেশে অবস্থান করিতেছি। আমার
সে হৃৎখের কথা এতদিন কাহাকেও বলি নাই; এবং এখানে
আনিয়া, সে কথা একরূপ ভুলিয়াগিয়াছিলাম বলিলেও হয়।
কিন্তু আজ তোমার গঙ্গা স্নানে যাইবার কথায়, আমার সেই
দারুণ স্মৃতি জাগিয়া উঠিল।”

এই বলিয়া ব্রাহ্মণ, তাঁহাকে ‘কোষ্ঠীর’ ফলাফল জ্ঞাপন
করিলেন। কহিলেন, “কুমার! জানিয়া শুনিয়া কেন মৃত্যুমুখে
পতিত হইতে যাইব?”

কথা শুনিয়া রাজপুত্র একটু হাসিলেন। কহিলেন, “দেব,
আপনি এ কিরূপ কথা কহিতেছেন? আপনি ত এ অধীনকে
কতবার উপদেশ দিয়াছেন যে, কর্ম বা পুরুষকার দ্বারা
এবং কালসহযোগে অদৃষ্ট জয় করা যায়। আপনি শাস্ত্রজ্ঞ
ও সুপণ্ডিত; অতএব শাস্ত্রসম্মত কর্ম ও পুরুষকার দ্বারা অদৃষ্ট
জয় করুন। কর্ম ও পুরুষকারের আশ্রয় লইলে কালও আপ-
নার সহায় হইবে। অতএব আশুন, পরীক্ষা করিয়া দেখি,
কিরূপে হ্রদ্র কুন্তীরে আপনার প্রাণ-সংহার করে।”

(৪)

ইহাতেও ব্রাহ্মণ ইতস্ততঃ করিতে লাগিলেন। রাজপুত্র পুনরায় দ্বিগুণ উৎসাহ সহকারে কহিলেন, “গুরুদেব! ভয় কি? আমি পিতার নিকট প্রার্থনা করিতেছি,—এখনই শত শত রক্ষক আমাদের সমভিব্যাহারী হইবে।”

ব্রাহ্মণ, ইহাতেও অসম্মত হইলেন। এবার রাজপুত্র কিছু মনক্ষুণ্ণ হইয়া কহিলেন, “ভাল, আপনি গঙ্গাস্নান না করেন, নাই করিবেন; কিন্তু গঙ্গা দর্শনে ত কোন আপত্তি থাকিতে পারে না। ভরসা করি, আপনার চরণে আমার এ শেষ প্রার্থনাটিও নিষ্ফল হইবে না।”

এত অনুনয়-বিনয় ও প্রার্থনায় ব্রাহ্মণ অগত্যা রাজপুত্রের সমভিব্যাহারে বাইতে ঃস্বীকার করিলেন। অল্পকাল মধ্যে তাঁহাদের গঙ্গাস্নান যাত্রার সমস্ত আয়োজন হইল। অতঃপর, শুভক্ৰণে শুভলগ্নে, বহু লোকজন সমভিব্যাহারে, মহাসমারোহে, রাজপুত্র গঙ্গাস্নানে যাত্রা করিলেন।

(৫)

যণাসময়ে, তাঁহারা গম্ভীরা স্থানে উপনীত হইলেন। কল-কলনাদিনী, পুণ্যতোয়া ভাগীরথীর মনোহরমূর্তি দর্শন করিয়া রাজপুত্র পরম প্রীতিলাভ করিলেন। চারিদিক লোকে লোকা-রণ্য। দেশ দেশান্তর হইতে কত ভক্তিমতী রমণী ও ধর্মপ্রাণ পুরুষ জীবনের কল্যাণ-কামনায় এই পবিত্র পুণ্যময় তীর্থে সমবেত হইয়াছে। ব্রাহ্মণ অনেক দিনের পর গঙ্গাদর্শন করিলেন;

কিন্তু প্রীতির পরিবর্তে তাঁহার মুখে বিষাদের ছায়া অঙ্কিত হইল।

রাজপুত্র কহিলেন, “গুরুদেব, যখন এত দূর আসিয়াছেন, তখন কি একবার মা-গঙ্গায় অবগাহন করিয়া যাইবেন না?”

ব্রাহ্মণ, অসম্মতি প্রকাশ করিলেন। রাজপুত্র পুনরায় কহিলেন, “দেব, অবগাহন করিয়া স্নান না করেন ক্ষতি নাই, কিন্তু গঙ্গাজল স্পর্শ করিতে, বোধ করি, আপনার আপত্তি নাই। আমার এই শত শত রক্ষক লাঠি ও তরবারী হস্তে আপনাকে রক্ষা করিবে। আরও এক কথা,—আপনি একটিমাত্র সোপান জলে নামিয়া, গঙ্গাজল স্পর্শ করিবেন। শত শত রক্ষক থাকিতে আর অতটুকু জলে কুন্তীর আসিতে সাহস করিবে না!”

ব্রাহ্মণ, কিছুক্ষণ, কি ভাবিলেন। পরে একটি দীর্ঘনিশ্বাস ত্যাগ করিয়া কহিলেন, “ভাল, তাহাই করিতেছি!”

(৬)

রাজপুত্র, মহানন্দে ব্রাহ্মণকে সঙ্গে লইয়া গঙ্গায় নামিতে লাগিলেন। তাঁহার আদেশমাত্র শত শত রক্ষক স্বেচ্ছাসিদ্ধভাবে ব্রাহ্মণের অনুসরণ করিল। এক এক করিয়া স্থলপথের সমস্ত সোপান অতিক্রম করিয়া, ব্রাহ্মণ স্তুপ্তিত হইয়া দাঁড়াইলেন। রাজপুত্র ঠিক তাঁহারই পশ্চাতে ছিলেন। গুরুকে চমকিত ভাবে দাঁড়াইতে দেখিয়া কহিলেন, “দেব, আবার এ কি হইল? আপনি এই সোপানটি অতিক্রম পূর্বক গঙ্গাজল স্পর্শ

করিয়া তীরে উঠুন ; আমি স্নান সমাপনান্তে আপনার সহিত মিলিত হইব।”

ব্রাহ্মণ, মন্ত্রমুগ্ধের স্তায় যেমন এক পদে জল স্পর্শ করিবেন,—
হরি হরি হরি ! ! ! রাজপুত্র অমনই প্রবলবেগে জলে ঝাঁপ
দিয়া,—“আমিই সেই কুস্তীর !” বলিয়া ভীমমূর্তিতে, ব্রাহ্মণকে
ছিনাইয়া লইয়া, অতলজলে অন্তর্হিত হইলেন !

রক্ষকগণ অমনি ‘হাঁ হাঁ’ করিয়া লাঠি ও তরবারী সাহায্যে
ব্রাহ্মণকে উদ্ধার করিতে চেষ্টা পাইল ; কিন্তু তাহাদের সকল
চেষ্টাই ব্যর্থ হইল !

তীর হইতে সকলে ভীত, চকিত, স্তম্ভিত ও বিস্মিতভাবে
দেখিতে পাইল,—রাজপুত্র ভীষণ কুস্তীরমূর্তি পরিগ্রহ করিয়া
অগাধ জলে, ব্রাহ্মণকে লইয়া বাইতেছে।





সংসার ও সন্ন্যাস ।

“বল মা তারা দাঁড়াই কোথা ?” সংসারী হইব, না সন্ন্যাসী সাজিব ? আমরা না সংসারী না সন্ন্যাসী ! প্রকৃত সংসার বা প্রকৃত সন্ন্যাসধর্ম বড়ই কঠিন । আমরা এখন এ দুইটার কোনটা অবলম্বন না করিয়া একরূপ সং সাজিতেছি মাত্র । প্রকৃত সংসার বা সন্ন্যাস উভয়ই অতি কঠিন ধর্ম ও কঠিন আশ্রম । প্রকৃত সংসারী বা সন্ন্যাসীর দায়িত্ব আরও কঠিন । ইহসংসারে এ দুয়েরই অভাব বিশেষরূপ পরিলক্ষিত হয় । ধর্মশাস্ত্রসম্মত প্রকৃত সংসারী বা সন্ন্যাসী হইতে হইলে, কত ত্যাগস্বীকার, কত সহিষ্ণুতা, কত অসাধ্যবসায়, কত তিতিক্ষা, কত সংশ্লেশের প্রয়োজন, নিম্নলিখিত এই গল্পটিতে সংক্ষেপে তাহাই আলোচনা করিব ।

(১)

কোন মনীষাসম্পন্ন ঋষিভূত্য মহাত্মার দুইটি শিষ্য ছিল । শিষ্যদ্বয় বাল্যকাল হইতেই গুরুগৃহে থাকিয়া তদীয় ব্রহ্মচর্য্যরূপ কঠোর ব্রতে দীক্ষিত হন । ক্রমে ক্রমে তাঁহারা আপন আপন প্রতিভা বলে, অতি অল্পকাল মধ্যেই সমগ্র শাস্ত্র-অধ্যয়ন-ক্রিয়া সম্পন্ন করিলেন । কিন্তু, কেবল মাত্র শাস্ত্রালোচনা করিলে, ব্রহ্মচর্য্যের প্রকৃত মহত্বের পূর্ণ বিকাশ বা সেই কঠোর ব্রতের সর্বদান্ধীন গুপ্ত সাধন হয় না । যে যে মহৎ দ্রব্য-ভণ্ডের সংস্পর্শে

ব্রহ্মচর্য্যরূপ অলস্তু আশ্রমের সৃষ্টি হয়, তাঁহাদের মধ্যে সেই সকল দ্রব্যের কোন কোন অংশের অভাব বা অসম্পূর্ণত্ব ছিল। শিষ্যদ্বয় সে অসম্পূর্ণত্ব উপলব্ধি করিতে পারেন নাই;—তাঁহাদের গুরুদেব তাহা অবশ্যই বুঝিতে পারিয়াছিলেন। আর, সেই কারণেই তিনি, শিষ্যদ্বয়ের বিদায়কালে একটু ইতস্ততঃ করিয়া কোশল-পূর্ব্বক कहিলেন যে, অমুক রাজ্যের অমুক রাজকন্ঠার নিকট গমন করিলে, তিনি তাঁহাদের উপযুক্ত আশ্রম অবলম্বনের কথা বলিয়া দিবেন। অর্থাৎ শিষ্যদ্বয় সংসার কি সন্ন্যাস-আশ্রমীর যোগ্য, তাহা নির্দেশ করিবেন।

শিষ্যদ্বয়ও উক্ত কথামত, গুরুর নিকট বিদায় লইয়া, রাজ-কুমারীর উদ্দেশে পূর্ব্ব কথিত রাজ্যে যাত্রা করিলেন। পথিমধ্যে একস্থানে রাত্রিকাল উপস্থিত হইল। তাঁহারা আশ্রয় অনু-সন্ধান করিতে লাগিলেন; কিন্তু অরণ্যের মধ্যে আশ্রয় মিলিবে কিরূপে? স্মরণ্য তাঁহারা অনন্তোপায় হইয়া সেই বনমধ্যস্থ একটি সুবিস্তৃত বৃক্ষ তলে, পর্ণশয্যা রচনা করিয়া, রাত্রি যাপনের জন্ত প্রস্তুত হইলেন।

(২)

বৃক্ষশাখায়, শুক ও সারী উপবিষ্ট ছিল। শুক ও সারী জী পুরুষে, নিম্নলিখিত রূপ কথোপকথনে প্রবৃত্ত হইল :—

সারী कहিল, “দেখ, ইহারা আমাদের আশ্রমে অতিথি হইয়াছে,—সমস্ত দিন উপবাসী,—অতএব, আমাদের সাধ্যমত অতিথি-সৎকার করা কর্তব্য।”

শুক উত্তর করিল, “তা’ সত্য বটে ; কিন্তু আমরা সামান্য বিহঙ্গ জাতি হইয়া, মানুষের কি উপকার করিতে পারি ?”

সারী। “না পারিই বা কি ? আমরা একটু চেষ্টা করিলেই ত অনায়াসে আগুনের উপযোগী কোন পদার্থ আনিয়া দিতে পারি ; তার পর ইহারা আহারের যোগাড় করিয়া লইতে পারিবে।”

তাহাই স্থির হইল। শুক স্থানান্তরে গিয়া মুহূর্ত্ত মধ্যে বৃহৎ চক্ষু দ্বারা এক খণ্ড অগ্নিজাত পদার্থ আনিয়া বৃক্ষের নিম্ন দেশে ফেলিয়া দিল। অতিথিদের অরণ্যের শুষ্কপত্র একত্রিত করিয়া, তাহা দ্বারা আগুন প্রস্তুত করিল। কিন্তু অনেক অন্বেষণেও আহার মিলিল না দেখিয়া, তাঁহারা বিষম অন্তরে বসিয়া রহিলেন।

সারী, শুককে সম্বোধন করিয়া কহিল, “আগুন হইল বটে, কিন্তু এরা এখন খায় কি ? আমাদের ত সংসারধর্ম পালন করা চাই,—এক্ষণে যে কোন উপায়ে হোক অতিথিসংকার করিতেই হইবে। অতএব আমি এই আগুনে পুড়িয়া মরি, তাহাতে ইহারা এক প্রকার আহারের সংস্থান করিতে পারিবে।”

শুক উত্তর করিল, “তুমিই যদি যাও, তবে আমারই বা বেঁচে থেকে কি লাভ ! বিশেষতঃ, এরা দেখ্ছি হু’ জন,—তোমার একার মাংসেই বা দ্রব্জনের কি হ’বে। অতএব আমিও দেহত্যাগ ক’রে অতিথির সেবা করি।”

তাহাই স্থির হইল ;—উভয়েই এক সময়ে প্রজ্বলিত আগুনে নব্বর দেহ ত্যাগ করিয়া, অতিথিসংকারের জলন্ত দৃষ্টান্ত দেখাইল। সংসারধর্ম পালন করিতে হইলে, কত ত্যাগ-স্বীকার—

কত সহিষ্ণুতা—কত ঔদার্য্য—কত মহত্ত্ব হৃদয়ে ধারণ করিতে হয়, তাহার অসাধারণ কীর্ত্তি ও আলৌকিক আদর্শ রাখিয়া, শুকসারী সংসারী ও সংসারধর্ম্মের প্রধান শিক্ষার স্থানীয় হইল।

(৩)

নির্দিষ্ট আশ্রম অবলম্বনে অভিলাষী হইয়া, শিবাবদর রাজ-কন্ঠার উদ্দেশে গুরুকথিত সেই নির্দিষ্ট রাজ্যে উপস্থিত হইলেন। রাজপথের একস্থানে বিস্তর জনতা ও পরস্পরের মধ্যে বাদানুবাদ হইতেছে দেখিয়া, তাঁহারা কিছু কৌতূহলবশতঃ, তাহার কারণ নির্ণয়ে উৎসুক হইয়া, লোকপরম্পরায় জানিতে পারিলেন যে, সেই নগরের রাজকুমারীর বিবাহোপলক্ষে 'ঈদৃশ লোকারণ্যের আবির্ভাব হইয়াছে। নৃপতিকন্ঠার অঙ্গীকার এই যে, যে কোন ব্যক্তি অতুষ্ক এক কলম জলে স্নান করিয়া, বেশ আরামের সহিত অবস্থান করিতে পারিবে, তিনি তাহাকেই পতিত্ব বরণ করিবেন।

শিবাবদর এই অবধি শুনিয়া, দ্রুতপদে বিবাহসভায় উপস্থিত হইলেন। দেখিলেন যে, সমস্তশ্রেণারই অনংখ্য লোক তথায় শ্রেণীবদ্ধ হইয়া দণ্ডায়মান আছে। তাঁহারাও একস্থানে দাঁড়াইয়া, এই কৌতুক দেখিতে লাগিলেন। অনেকেই, 'রাজকন্ঠা লাভ করিব ও রাজ-জামাতা হইব' ভাবিয়া, উষ্ণ জলপাত্রের নিকট গমন করে, আর স্পর্শ করিতে-না করিতেই, সম্ভ্রাসে পশ্চাৎপদ হয়। এইরূপে সেই সর্ব্বগুণসম্পন্ন পরম লাভ্যবতী জীবন্ত লাভে, লোলুপ লইয়া, রাজাধিরাজ ও রাজকুমার হইতে,

নিম্ন-শ্রেণীর চির দরিদ্রাবস্থাপন্ন ব্যক্তি অবধি, প্রায় সকলেই রণে ভঙ্গ দিয়া প্রস্থান করিলেন ।

(৪)

লগ্ন উত্তীর্ণ প্রায় ।—কন্টার হুঃসাধ্য প্রতিজ্ঞা পূর্ণ হইল না দেখিয়া, রাজা অতিশয় উদ্বিগ্ন হইলেন । কিন্তু তাঁহাকে আর অধিকক্ষণ এ যন্ত্রণা ভোগ করিতে হইল না । এই সময়ে অকস্মাৎ এক গৈরিক বসনধারী, বিভূতি-পরিলেপিত, দণ্ড-কমণ্ডলু-শোভিত, সৌম্যমূর্তি সন্ন্যাসী সভাস্থলে উপস্থিত হইলেন ; এবং মুহূর্ত্ত মধ্যে, আপনার সমস্ত গাত্রবস্ত্র উন্মোচন পূর্ব্বক, রাজকন্টার প্রতিজ্ঞানুযায়ী সেই অত্যাচ্ছ জল-কলস গ্রহণ করিলেন । পরে অবলীলাক্রমে সেই অত্যাচ্ছ জলে সর্বাঙ্গ বিধৌত পূর্ব্বক বথারীতি স্নান করিলেন ।

সভাস্থলে উচ্চৈঃস্বরে ধন্যবাদ পড়িয়া গেল ; চতুর্দিক হইতে মাতুলিক প্রথানুযায়ী, শব্দ ও ছলুধ্বনির গভীর নিনাদ গগন-মার্গ ভেদ করিল । অমনি শত শত স্ত্রী পুরুষ, সুসজ্জিতাবস্থায় সন্ন্যাসীর সম্মুখীন হইলেন ; এবং নানাপ্রকার মাতুলিক অমুষ্ঠানের জন্ত তাঁহার বেশভূষা পরিবর্তন করিতে চেষ্টা পাইলেন । কিন্তু সেই মহাপুরুষ এবংবিধ পার্থিব স্নেহের প্রতি ক্রুদ্ধ হইয়া সেই স্থান হইতে প্রস্থান করিবার উদ্যোগ করিলেন । রাজপুরুষগণ তাঁহাকে প্রতিনিবৃত্ত করিবার অভিপ্রায়ে, প্রথমে নানা প্রকার প্রলোভন দেখাইয়া অতি বিনয়-নম্রবচনে বিবাহে সম্মত হইতে অনুরোধ করিলেন । কিন্তু যখন তিনি কোন

ক্রমেই সম্মত হইলেন না, তখন সকলে বলপূর্ব্বক তাঁহার বিবাহ দিতে মনস্ত করিল।

(৫)

বেগতিক দোখয়া সেই আত্মচিন্তানিরত মহাপুরুষ উৰ্দ্ধ-শ্বাসে—যেন প্রাণের দায়ে, বেগে দৌড়িতে আরম্ভ করিলেন। রাজপুরুষগণ, কেহ অস্বারোহণে, কেহ বা দ্রুতপদে তাঁহার অনুসরণ করিল। বিবাহ-সভায়-সমাগত, উপস্থিত দর্শকবর্গও তাহাতে যোগ দিল।

অনেক পথ অতিক্রম করিয়া অবশেষে একটি নিভৃত পর্ণ-কুটারের সম্মুখে সেই অপূৰ্ণ সন্ন্যাসী ধৃত হইলেন। বলা বাহুল্য, এই আত্মায়িকার অন্তর্ভূত পূর্ব্বোক্ত সেই শিষ্যদ্বয়ও এখানে উপস্থিত হইয়াছিলেন। বিবাহ সভায় সন্ন্যাসীকে দেখিয়া অবধি তাঁহাদের অন্তরে কিছু বিস্ময় ও কৌতূহল আবির্ভাব হইয়াছিল; এক্ষণে তাঁহাকে স্পষ্ট চিনিতে পারিয়া, আরও কৌতূহলাক্রান্ত হইলেন; কিন্তু কোন কথা কহিলেন না।

রাজপুরুষেরা সন্ন্যাসীকে পুনর্বার বিবাহে সম্মত হইতে অনু-রোধ করিলেন; কিন্তু তিনি কিছুতেই সম্মত না হইয়া, বিনয়-নম্র-বচনে তাঁহাদিগকে কহিলেন, “কেন বাপু, তোমরা নিরর্থক আমাকে কষ্ট দাও? আমি রাজকুমারীর পাণি-গ্রহণাভিলাষে তাঁহার প্রতিজ্ঞা পূর্ণ করি নাই। দেখিলাম, সকলেই রণে ভঙ্গ দিতেছে, তাই কিছু কৌতূহলবশতঃ এবং আরও একটি বিশেষ কারণে, উষ্ণ জলে স্নান করিয়া-

ছিলাম মাত্র । আমি সন্ন্যাসী, আমার বিবাহে বা রাষ্ট্রৈশ্বর্য্যে প্রয়োজন কি ? কামিনী-কাঞ্চন সন্ন্যাসধর্ম্মের প্রবল শত্রু । অতএব তোমাদিগকে অনুন্নয় করিতেছি, আমাকে আর বিরক্ত করিও না ।”

রাজ-অনুচরগণ অগত্যা বিফলমনোরথ হইয়া ক্রুদ্ধমনে প্রস্থান করিলেন ।

শিষ্যদ্বয় দেখিলেন এ সন্ন্যাসী আর কেহ নয়, তাঁহাদেরই গুরু । তাই তাঁহারা কিছু কোতূহলভাবে—ঈষৎ হাসিতে হাসিতে গুরুকে প্রণাম পূর্ব্বক সম্বোধন করিয়া কহিলেন, “প্রভু ! আপনি ও রাজকুমারী ত বিবাহব্যাপারে মত্ত, এক্ষণে আমরা কাহার নিকট, আমাদের জ্ঞাতব্য-বিষয় অবগত হই ?—কে আমাদের উপযুক্ত আশ্রমঅবলম্বনের কথা বলিয়া দিবে ?”

গুরুদেব তখন ছদ্মবেশ ত্যাগ করিয়া কহিলেন, “কেন বাপু, তোমাদের আশ্রম অবলম্বনের কথা ত বলা হইয়াছে । যদি সংসারী হইয়া সংসারধর্ম্ম পালন করিতে চাও, তবে অরণ্যমধ্যস্থ সেই শুকসারীর বিষয় চিন্তা কর ; আর যদি সন্ন্যাসী হইয়া সন্ন্যাস-ধর্ম্ম পালন করিতে বাসনা থাকে, তবে উপস্থিত বাহা প্রত্যক্ষ করিলে, এই মত কার্য্য করিও ।”

(৬)

শিষ্যদ্বয় তখন নির্ঝাক, নিস্তব্ধ, বিস্মিত ও কিংকর্তব্যবিমূঢ় হইয়া ক্ষণকাল চিত্রপুতলিকার ভ্রায় দণ্ডায়মান রহিলেন । অবশেষে সবিসাদে দীর্ঘনিশ্বাস ত্যাগ করিয়া কহিলেন, “প্রভু

যথেষ্ট হইয়াছে, আর পরীক্ষার প্রয়োজন নাই। বুঝিলাম, আমাদের ব্রহ্মচর্য্যের এখনও অবসান হয় নাই। চলুন গুরুদেব, আপনার আশ্রমে ফিরিয়া যাই। সংসার ও সন্ন্যাস—এই দুই আশ্রমের মধ্যে আমরা আজিও কোনটিরও উপযুক্ত হই নাই।—
অদ্যাবধি আমরা, সংসার ও সন্ন্যাস—এ দুয়ের কোন ধর্ম্ম পালনে অধিকারী হই নাই।”

বস্তুতঃ হিন্দুর আশ্রমচতুষ্টয় এইরূপ অপূর্ণ শিক্ষায় পূর্ণ বটে। পূর্বে, গুরুগৃহে, ব্রহ্মচর্য্যরূপ জলন্ত আগুনে বিশেষরূপে ‘পোড়’ না খাইয়া কেহ সংসারে প্রবেশ করিত না। পক্ষান্তরে সন্ন্যাস-ধর্ম্মগ্রহণে অভিলাষী হইলে, সম্পূর্ণরূপে বিষয়স্পৃহাবর্জন করিতে হইত। তখন গার্হস্থ্যধর্ম্ম পালন করিতে হইলে, সেই অরণ্য মধ্যস্থ শুক শারীর ত্রায় আত্মোৎসর্গ ব্রত শিক্ষা করিতে হইত; আর সন্ন্যাস ধর্ম্ম অবলম্বন করিতে হইলে, তাহাকে সর্ববিধ বিষয় স্পৃহাশূন্য হইতে হইত—এমন কি, অনার্য্যস লভ্য রাজ্য বা রাজকত্তাও তাহাকে বিচলিত করিতে পারিত না। আর এখন ?—এখন যেমন কাল, তেমনই ব্যবস্থা; যেমন শিক্ষা, তেমনই ফল, আর যেমন প্রাণ, তেমনই আত্মোৎসর্গ!—সবটাই গৌজামিল! তা সে ‘গৌজামিলের’ কথা তুলিয়া, এখানে সে আঁতের বাথা না দেখানই ভাল।





লোক-চেনা ।

লোক-চেনা বড় কঠিন । প্রকৃত মনুষ্যত্ব সংসারে বড় বিরল ।
এই আখ্যায়িকাটিতে সেই কথাটিই আলোচিত হইতেছে ।

(১)

এক দরিদ্র ব্রাহ্মণ একমুষ্টি উদরার্নের সংস্থানজন্য নানা উপায় উদ্ভাবন করিতে লাগিল । কিন্তু গ্রহবৈশিষ্ট্যবশতঃ, কিছুতেই তাহার মনস্কাম পূর্ণ হইল না । ব্রাহ্মণের চারিটি অপোগণ্ড শিশু ও এক পতিব্রতা ঘরনী । তা এতগুলি পরিবারকে অতি-পালন করা ত সম্ভব কথা নয় । ব্রাহ্মণ, অনন্তোপায় হইয়া, মহা-নগরীতে উপস্থিত হইল । যদি সেখানে কোন রকমে একটা চাকরি জুটাইতে পারে । কিন্তু মরুবি-সহায়হীন, অজানা-অচেনা, বাক্চাতুরী-বিবর্জিত, পাড়াগায়ে সরল ব্রাহ্মণকে খামকা কে কাজ দেয় বল ? ব্রাহ্মণ একে একে সমস্ত সূত্র প্রদক্ষিণ করিল ; এক এক করিয়া অনেক “বাবু-ভায়ের” শরণাপন্ন হইল ; কিন্তু কিছুতেই কিছু হইল না । লাভের মধ্যে ব্রাহ্মণের বহু কষ্টসঞ্চিত দুই চারি টাকার পুঞ্জিও নিঃশেষিত হইয়া গেল ।

কাহারও নিকট কোনরূপ সমবেদনা না পাইয়া ব্রাহ্মণ মনের দুঃখে বনবাসী হইল । ভাবিল,—“স্বাহার পয়সা নাই, তাহার লোকালয়ে বাস, বিড়ম্বনা মাত্র । ইহাপেক্ষা সাপ-বাঘের মুখে প্রাণ যার, সেও ভাল ।”

(২)

একদিন বহু অরণ্য-পথ পরিভ্রমণ করিয়া, ব্রাহ্মণ, ক্ষুৎ-পিপাসায় অত্যন্ত ক্লিষ্ট হইয়া পড়িল। আর ছুঁপা চলিবার সামর্থ্য রহিল না। এক প্রকাণ্ড বটবৃক্ষমূলে তৃণ-পত্র সংগ্রহ করিয়া, ব্রাহ্মণ শয্যা রচনা করিল। এবং জীর্ণ উত্তরীয়খানি বিছাইয়া তত্পরি শয়ন করিল। কিন্তু অনাহার বশতঃ নিদ্রা আসিল না, - ব্রাহ্মণ চক্ষু মুদিয়া আকাশ-পাতাল ভাবিতে লাগিল।

গাছের উপর শুক ও সারী বসিয়াছিল। এই ভয়াল হিংস্র-স্বাণদ সঙ্কুল ভীষণ অরণ্যে, ব্রাহ্মণকে, একরূপ ভাবে অবস্থান করিতে দেখিয়া সারী শুককে কহিল, — “আহা, দেখ দেখ, লোকটি কেমন অবস্থায় শুইয়া আছে! বুঝি, এখনই সাপ-বাঘের মুখে অভাগার প্রাণ যায়।”

শুক উত্তর করিল, — “ও ত মরিবে বলিয়াই মনের হঃখে এখানে আসিয়াছে।”

এই বলিয়া, সেই ব্রাহ্মণের সংসারে কেন বিরাগ জন্মিয়াছে, সে সম্বন্ধে আমূল বৃত্তান্ত সারীকে জ্ঞাপন করিল।

শুনিয়া সারী কহিল, — “তবে এক্ষণে উপায় ? কি উপায়ে, গরীব ব্রাহ্মণ ছুঁমুঠা উদরারের সংস্থান করিতে পারে ?”

শুক উত্তর করিল, “এ ব্রাহ্মণ ত মানুষের কাছে সাহায্য চায় নাই ; সুতরাং সফলকাম হইবে কিরূপে ?”

“কেন সংসারে কি মানুষ নাই ?”

“মানুষ থাকিলে কি দয়াধর্ম লোপ পায় ?”

শুক-সারীর অনেক কথাবার্তার পর স্থির হইল, উহার

আপনাদের পাখা হইতে যে 'পালক' ফেলিয়া দিবে, ব্রাহ্মণ তাহা ভস্ম করিয়া একরূপ কজ্জল প্রস্তুত করিবে এবং সেই কজ্জল চক্ষে দিয়া যে মানুষকে সে প্রথম দেখিতে পাইবে, তাহার নিকট সাহায্য প্রার্থী হইলেই সফলকাম হইবে ।

ব্রাহ্মণ, বৃক্ষের নিম্ন হইতে এ সকল কথা শুনিতে পাইল । শুক-সারী আপন আপন পক্ষদেশ হইতে কয়েকটি পালক ফেলিয়া দিল ; ব্রাহ্মণও, সাহসাদে, আশ্রিত হৃদয়ে, সেই পালক কয়টি সংগ্রহ করিয়া, উদ্দেশ্যসিদ্ধির জন্য নগরান্তিমুখে প্রবেশ করিল ।

(৩)

যথাসময়ে, কজ্জল প্রস্তুত করিয়া ব্রাহ্মণ চক্ষে লাগাইল । সেই কজ্জলের গুণে, ব্রাহ্মণ দিব্য চক্ষু লাভ করিল । সংসারে প্রকৃত মানুষ কে,—যথার্থ মনুষ্য কাহার আছে, এই কজ্জলের গুণে, তাহার পরীক্ষা হইবে ।

প্রভাত হইবা মাত্র, ব্রাহ্মণ মহানগরীতে প্রবেশ করিল । প্রশস্ত রাজপথ ; চারিদিক সুরম্য হর্ম্যাবলীতে সুশোভিত ; কিন্তু একজনও মানবমূর্তি ত ব্রাহ্মণের দৃষ্টিগোচর হইতেছে না ! ব্রাহ্মণ, কিছু ভীত, চকিত, বিস্মিত ও মোহিত হইল ;—“একি, এত বড় একটা সহরে, একটা মানুষ দেখিতে পাই না ! শেষে চক্ষু ছুঁটিরও মাথা খাইলাম নাকি ? কি ছাই-ভস্ম চোকে দিলাম !”

ব্রাহ্মণ, সন্নিধুচিতে এইরূপ ভাবিতেছে ; এমন সময় দেখিতে পাইল, একটা প্রকাণ্ড “জুড়ী” ভূ-গৃষ্ঠ বিকম্পিত করিয়া

“হন্-হন্” শব্দে আসিতেছে। কিন্তু একি ! সেই স্মৃদুশ “ফেটিং গাড়ী”র উপর, এ যে একটা প্রকাণ্ড বাঘ !

যাই গাড়ী খানা ব্রাহ্মণের সন্মুখবর্তী হইল, অমনি “ব্রাহি মধুসূদন” রবে “বাপ্ বাপ্” বলিয়া ব্রাহ্মণ—দোড়,—দোড়,—দোড়,—শেষ একেবারে অদৃশ্য !

(৪)

ক্ষণপরে, অল্প এক পথে প্রবিষ্ট হইবামাত্র, একপাল অজাগর কেউটে ও গোখর ব্রাহ্মণের সন্মুখবর্তী হইল। “বাবা গো, মাগো” রবে দারুণ আতঙ্কে, ব্রাহ্মণ সে পথ ত্যাগ করিল।

পশ্চাৎ ফিরিয়া দেখে, হস্তী, গণ্ডার, বরাহ, শূকর, গো, মহিষ, শৃগাল, কুকুর—পালে পালে ফিরিতেছে। তাহাদের উৎকট বিকট বীভৎসময় মূর্তি ও ভয়াবহ রব শুনিয়া, ব্রাহ্মণ, ভয়ে ইচ্ছা করিয়া কাঁপিতে লাগিল।

কিন্তু এড়াইবার স্থান নাই ;—ব্রাহ্মণ যে দিকে গমন করে, সেইদিকেই এই ভীষণ দৃশ্য ! কোথাও পিশাচের খেই খেই খেই খেই নৃত্যোন্মাদ ; কোথাও শকুনি-গৃধিনী-ফেরুপালের হড়াহড়ি ও বিকট কোলাহল ; কোথাও সিংহ ব্যাঘ্রের ঘোরতর ঘৃদ ; কোথাও সরস্বতী সন্ন্যাসের কূট কৌশল-জাল,—সর্বত্রই এই রূপ ভয়াবহ ভীষণ দৃশ্য দেখিয়া ব্রাহ্মণের অন্তরাঙ্গা মুহুমূহ কাঁপিতে লাগিল।

প্রাণ বাঁচাইবার আশায়, ব্রাহ্মণ এক ভজনালয়ে প্রবেশ করিল। কিন্তু একি,—ব্রাহ্মণ দেখিল, এখানেও এড়াইবার স্থান নাই ; সভার চারিদিকে অশু, জশু, নল, নীল, গয়, গবাক্ষ

লাঙ্গুল স্ফীত করিয়া বাইতেছে, আসিতেছে এবং বসিয়া আছে। তাহাদের সে স্নমধুর কিচির-মিচির রব শুনিয়া ও মধুর মুখ-ভঙ্গিমা দেখিয়া ব্রাহ্মণ তথা হইতে অন্তর্হিত হইল।

এইবার এক বিদ্যালয়ে প্রবেশ করিল। দেখিল, সেখানেও ঐ দৃশ্য। স্বতন্ত্র আসনে শিক্ষক মহাশয়গুলি “বৈঠকী বাদরের” মূর্তিতে বিরাজ করিতেছেন; আর শিষ্যগুলিও, গুরুর কৃপালাভের আশায় ‘গেছোবানরের’ ছায় বিকট মুখ-ভঙ্গিমা বসিয়া আছে।

ব্রাহ্মণ যথায় যায়, এইরূপ হরেক রকমের “চিড়িয়া” দেখিতে পায়। চিড়িয়াদের দোরাআ ও একাধিপত্য দেখিয়া, ব্রাহ্মণ উর্দ্ধ্বাঙ্গে নগর ত্যাগ করিয়া ছুটিল। পথ চলিতে চলিতে ব্রাহ্মণ যে জ্ঞানও কত শত অদ্ভুত রকমের চিড়িয়া দেখিল, তাহার ইয়ত্তা নাই।

(৫)

এইরূপে বেলা অবসান হইয়া আসিল। ব্রাহ্মণ ক্ষুৎপিপাসায় অত্যন্ত ক্লিষ্ট হইয়া পড়িল। নগর ছাড়াইয়া এক গ্রাম্যপথে প্রবেশ করিলে, ব্রাহ্মণ ঘেন ‘ধড়ে প্রাণ’ পাইল। কারণ, এখানে লোকের বসতি নাই।

অপরাহ্নে ব্রাহ্মণ, এক ক্ষুদ্র পল্লীর বাজারে উপস্থিত হইল। সেই ক্ষুদ্র পল্লীর বাজার প্রাতেই হইয়া থাকে; বৈকালে তথায় লোকের সমাগম হয় না। ব্রাহ্মণ, ধুকিতে ধুকিতে সেই স্থানে উপনীত হইল। প্রাতঃকাল হইতে অপরাহ্ন অবধি একটিও মনুষ্য-মূর্তি তাহার দৃষ্টিগোচর হয় নাই। কিন্তু হঠাৎ

একজন মানুষকে, ব্রাহ্মণ দেখিতে পাইল। দেখিতে পাইল, এক ক্ষুদ্র কুটীরে এক চর্যকার বসিয়া পাছকা নির্মাণ করিতেছে।

ব্রাহ্মণ, সাহ্লাদে, উৎসাহিত হৃদয়ে, তথায় উপস্থিত হইল। চর্যকার, সম্মুখে ব্রাহ্মণকে দেখিয়া, ভক্তি পূর্বক, সাষ্টাঙ্গে প্রণাম করিল। পরে তাঁহার কুশল প্রশ্নাদি জিজ্ঞাসিয়া বিনীত ভাবে কহিল, “মহাশয়ের কি প্রয়োজন?”

ব্রাহ্মণ ধীরে ধীরে আদ্যোপান্ত বৃত্তান্ত বর্ণন করিল। পরে কহিল,—“শুক-সারীর কথামত আমি এই কজ্জল চক্ষে দিয়াছি; তুমি জাতিতে চর্যকার হইলে কি হইবে,—তুমিই যথার্থ মানুষ! আমি সমস্ত সহর প্রদক্ষিণ করিলাম, কিন্তু সত্য বলিতেছি, একটিও মনুষ্যমূর্তি দেখিতে পাই নাই!—কেবলই সিংহ, ব্যাঘ্র, হস্তা, ভল্লুক, সর্প, সরীসৃপ, শকুনি গৃধ্রিনী প্রভৃতি পশু পক্ষা দৃষ্টিপথে পতিত হইল। বুঝিলাম, ভগবান সকলকে প্রকৃত মনুষ্যহটুকু হুদেন নাই। বুঝিলাম, ভাই! তুমিই আমার একমাত্র মুহূঃ; তোমা দ্বারা আমার অভীষ্ট সিদ্ধ হইবে।”

এই বলিয়া, ব্রাহ্মণ, পুনরায় তাহার দারিদ্র্য-দুঃখের কথা বর্ণন করিল। পুনরায় কহিল, “ভাই, তুমিই আমাকে সাহায্য কর।”

চর্যকার সকল কথা শুনিল। কিছুক্ষণ মনে মনে কি ভাবিল। পরে একটু হাসিয়া উত্তর করিল, “আমি সমস্ত ব্যক্তি; হু’ এক জোড়া মাত্র পাছকা সংস্কার ও নির্মাণ করিয়া, জীবিকাযাত্রা নির্বাহ করি। আমি হেন ক্ষুদ্র ব্যক্তি দ্বারা আপনি কি সাহায্য প্রার্থনা করেন?”

ব্রাহ্মণ, নিরস্ত হইল না। কহিল,—“হা, তুমিই যথার্থ মানুষ,

চর্যকারবেশে তুমি দেবতা! আমার অন্তরাত্মা যেন বলি
তেছে, তোমাদ্বারাই আমার সকল দুঃখের অবসান হইবে।”

চর্যকার কহিল,—“ঠাকুর, আশীষাদ করুন, যেন আপ-
নার কথাই সফল হয়।”

তারপর মনে মনে কহিল,—“হরি হে! তুমিই দয়া করিও।
আমার কোন ক্ষমতাই নাই, প্রভু!”

চর্যকার একটি ক্ষুদ্র থলি হইতে কয়েকটি পয়সা বাহির
করিয়া ব্রাহ্মণের হস্তে দিল। কহিল,—“ঠাকুর, আমি নীচ
জাতি; দয়া করিরা আপনি নিজে জলযোগের সংস্থান করিয়া
লউন।”

(৬)

যথাসময়ে, চর্যকার, বহুপরিশ্রমে ও ঐকান্তিক যত্নে, এক-
ঘোড়া অতি উৎকৃষ্ট, মহা শিল্পনৈপুণ্যযুক্ত পাছকা প্রস্তুত করিল।
এবং সেই পাছকা, দেশের বাদসাহকে উপঢৌকনস্বরূপ পাঠাইয়া
দিল। বাদসাহ, এবংবিধ অসাধারণ শিল্পনৈপুণ্যময় পাছকা
দেখিয়া অতিশয় সন্তুষ্ট হইলেন এবং কারিকরকে লক্ষটাকা
পুরস্কার দিবার ঘোষণা করিয়া দিলেন।

বলা বাহুল্য, যথাসময়ে চর্যকার, বাদসাহ সমীপে আনীত
হইল, এবং সেই লক্ষ টাকা, সেই ব্রাহ্মণকেই দান করিল। ব্রাহ্মণ,
অনেক অহুরোধ করিল, কিন্তু চর্যকার তাহা হইতে একটি
পয়সাও গ্রহণ করিল না। কহিল,—“আমি সঙ্কল্প করিয়াছিলাম,
এই বিনামা হইতে যাহা কিছু পাইব, তাহাই আপনাকে

দিব। অতএব এ সমস্ত অর্থই আপনার। আমি ইহা হইতে কিছুই গ্রহণ করিব না। ইহা হইতে একটি পয়সা গ্রহণ করিলেও আমি সঙ্কলচ্যুত হইব। সঙ্কল-চ্যুতিতে আমার পাপ স্পর্শিবে,—দেবতার কাজে আর আমার অধিকার থাকিবে না।”

বাদসাহ, একে একে সকল কথা শুনিলেন। চন্দ্রকারের অসাধারণ ধর্মভাব ও অদ্ভুত পরার্থ পরতা দেখিয়া, বাদসাহ বিস্মিত হইছেন। ভাবিলেন,—“ধর্ম ও চরিত্রের দৃঢ়তা বাহার নাই, সত্যই সে মনুষ্যাবয়বে পশু।”

বস্তুতঃ, ভিতরের দিক দিয়া দেখিয়া, লোকের গুণাগুণ বিচার করিলে, “দেবধর্মী” বা “মানবধর্মী” অপেক্ষা “জন্তুধর্মীর” ভাগই সংসারে অধিক,—অত্যন্ত অধিক।





ঈশ্বর মঙ্গলময় ।

“ঈশ্বর মঙ্গলময়”—এ বড় খাঁটি কথা । প্রকৃত ভক্ত ভিন্ন এমন কথা কেহ বলিতে পারে না ।—বলিতে পারে না অর্থ,—হৃদয়ে ধারণা করিতে পারে না । মানুষের জীব মানুষ মুখ,—প্রকৃত মঙ্গল বা অমঙ্গল নিরূপণ করা তাহার পক্ষে বড় কঠিন । কিন্তু ভগবন্তের বিশ্বাসীর নিকট জগতের সকল কার্য্যই মঙ্গলময় বোধ হইয়া থাকে । একপ মহামহিমময় ধর্ম্মজীবন সকলেরই আলোচনীয় । এই গল্পটিতে তাহাই আলোচিত হইবে ।

(১)

কোন দেশে এক সমৃদ্ধিশালী নরপতি ছিলেন । তাঁহার একমাত্র গুণধর পুত্র ছিলেন । সেই পুত্র অকালে সকলকে ফাঁকি দিয়া ইহলোক পরিত্যাগ করিলেন । রাজপরিবারের মধ্যে হাহাকারের রোল পড়িয়া গেল । নৃপতি, প্রাণাধিক প্রিয়তম পুত্রবিরহে জগৎসংসার অন্ধকার দেখিলেন । রাজকার্য্য ও রাজ্যপালন তাঁহার পক্ষে বিষবৎ বোধ হইতে লাগিল । বৈষয়িক সকল কার্য্যই তাঁহার পক্ষে বিষবৎ বোধ হইতে লাগিল । তিনি বহির্জগৎ হইতে এককালে বিদায় লইয়া, শিরস্তর স্কন্ধ মনে বিরলে কালযাপন করিতে লাগিলেন ।

রাজাকে এইরূপ শোকমুহুমান দেখিয়া একদিন মন্ত্রী কহিলেন, “মহারাজ ! নিরর্থক কেম মনকে কষ্ট দেন ? জৈশ্বর মঙ্গলময় ; তাঁহার রাজ্যে অমঙ্গল কিছুই নাই। তিনি যা করেন, সকলই মঙ্গলের জন্ত। আপনি প্রাণাধিক পুত্রবিরহে আত্মহারা হইয়াছেন ; কিন্তু আপনার পুত্রের অকাল মৃত্যুই মঙ্গলের কারণ জানিবেন ! ইহাতে আপনার ও রাজপরিবারবর্গের মঙ্গল সাধিত হইবে, সন্দেহ নাই।”

দারুণ দুঃখের সময়ে, মন্ত্রীর এইরূপ কঠোর সত্য কথা শুনিয়া, রাজা ক্রোধে জলিয়া উঠিলেন। কিন্তু প্রায় কহিয়া উঠিলেন,—“কি, এত বড় আশ্চর্য্য ! আমার সম্মুখেই আমার পুত্রের নিধনে আনন্দ প্রকাশ করিতে ছিন্ ? দুরাত্মন ! অবিলম্বে এ ধুষ্টতার ফল ভোগ কর।”

এই বলিয়া তৎক্ষণাৎ জল্লাদকে আহ্বান করিয়া শূলদণ্ডে হতভাগ্য মন্ত্রীর প্রাণনাশের আদেশ দিলেন। রাজাদেশে, জল্লাদ তৎক্ষণাৎ মন্ত্রীকে লইয়া বধ্যভূমিতে উপনীত হইল এবং কহিল,—“মন্ত্রীন্ ! একদিন আপনি আমাদের দণ্ডমুণ্ডের কর্তা ছিলেন ; কিন্তু আজ বিধির বিপাকে, আমাদের হস্তেই আপনার প্রাণসংহারের আদেশ হইয়াছে। এক্ষণে আপনি এক কাজ করুন। অদূরস্থিত ঐ বনপথ ধরিয়া ছদ্মবেশে, অস্ত্র রাজ্যে পলায়ন করুন। আমি একটি কুকুরের প্রাণসংহার করিয়া, তাহার রক্ত লইয়া গিয়া রাজাকে বুঝাইব যে, আপনাকে বিনাশ করিয়াছি। কিন্তু সাবধান, আপনার জন্ত যেন আমার গর্দানাটি দিতে না হয় !”

এই কথা শুনিয়া মন্ত্রী “জর জৈশ্বর মঙ্গলময়” বলিয়া জল্লাদকে

জাতরিক সাধুবাদ প্রদান করিলেন এবং তাহার প্রতি বখোচিত কৃতজ্ঞতা দেখাইয়া, তাহার পরামর্শমত ছদ্মবেশে বিদায় গ্রহণ করিলেন ।

জ্ঞানদ্য বণাসময়ে একটা কুকুরের প্রাণসংহার করিয়া সেই রক্ত লইয়া গিয়া শোকোন্মত্ত রাজাকে বুঝাইল যে, সে রাজাদেশ পালন করিয়াছে ।

(২)

কিছু দিন যার,— একদা ভিন্নদেশীয় এক বাদসাহের সহিত রাজার মনোবিবাদ উপস্থিত হইল । বিবাদ ক্রমশই গুরুপাকে দাড়াইল । শেষে উভয়পক্ষে যুদ্ধ উপস্থিত হইল । বাদসাহের বাহুবল অপরিমিত,—সে তুলনায় রাজার খুবই কম । সুতরাং রাজার পক্ষে অনেক সৈন্তসামন্ত নিহত হইল, নররক্তে বসুন্ধরা প্লাবিত হইল, পরিশেষে বাদসাহেরই জয় হইল । রাজা রাজ্যভ্রষ্ট, পরাজিত ও বন্দীকৃত হইলেন । দেশ মুসলমানের অধিকৃত হইল ।

রাজ্য জয় করিয়া বাদসাহ কিছুদিন পরমস্থখে জীবন অতিবাহিত করিলেন । একদা তাঁহার পুত্রের এক উৎকট রোগ জন্মিল । মুসলমান হাকিম চিকিৎসা করিতে লাগিলেন । দিনের পর দিন যার, কিন্তু রোগের কোনরূপ উপশম না হইয়া উত্তরোত্তর তাহা বৃদ্ধি পাইতে লাগিল । শেষে বাদসাহ-পুত্রের জীবন-সংশয় হইল । এইবার অনেক ভাবিয়া-চিন্তিয়া, রোগের আত্ম-পূর্ব্বিক লক্ষণ দেখিয়া সেই হাকিম ব্যবস্থা করিলেন যে, সুস্থকার, মীরোগ, চিরপ্রফুল্ল, মানসিক-শোক-তাপ-বর্জিত কোন লোকের

প্রাণসংহার করিয়া, সেই রক্ত বাদসাহপুত্রের শরীরে প্রবেশ করাইয়া দিলে, তিনি আরোগ্যলাভ করিবেন,—নচেৎ এ যাত্রা আর কিছুতেই তাঁহার রক্ষা নাই ।

হাকিমের বাবস্থাপত্র প্রকাশ হইলেই চারিদিকে লোক ছুটিল,—কোন স্থানে একরূপ লোক মিলিতে পারে, তাহার সন্ধান চলিতে লাগিল । কিন্তু দুর্ভাগ্যবশতঃ কর্মচারীগণ কিছুতেই সফলকাম হইতে পারিল না,—তাহারা কোন স্থানেই একরূপ শোকতাপবর্জিত একটিও লোক পাইল না ;—দেখিল, সকলেই একটা-না-একটা শারীরিক বা মানসিক রোগে দুঃস্থ ও অপ্রকৃত । শেষে, অনেক বাদানুবাদের পর স্থির হইল, সম্ভ্রুতি যে রাজাকে রাজ্যচ্যুত করিয়া বন্দী করা গিয়াছে, তাহার প্রাণ বিনাশ করিলেই এ কার্য্য সিদ্ধ হইবে ; যেহেতু, রাজদেহ অবশ্যই নীরোগ ও সুস্থকায় ; অধিকন্তু শারীরিক বা মানসিক কষ্ট, কিংবা কোনরূপ শোকতাপ তাঁহাকে বেশী স্পর্শ করে নাই ; অতএব এই রাজ-রক্তেই বাদসাহপুত্রের জীবন রক্ষা হইতে পারে ।

(৩)

এইরূপ স্থির করিয়া কর্মচারীগণ বাদসাহকে এ কথা জ্ঞাপন করিল । বাদসাহও “উত্তম সংকল্প হইয়াছে” বলিয়া আনন্দ-প্রকাশ করিলেন । কর্মচারীগণ কারাগারে প্রবেশ করিল । সঙ্গে একজন মুসলমান হাকিমও রহিল । রাজা যথায় বন্দী দশায় অতি মনোকষ্টে কালযাপন করিতেছিলেন, তাহার সেইখানে উপস্থিত হইল । চিকিৎসক রাজাকে বিশেষরূপে পরীক্ষা

করিতে লাগিলেন,—জীবনে তিনি শারীরিক বা মানসিক কোনরূপ ব্যাধি কিংবা শোক-তাপ পাইয়াছেন কি না। কিন্তু চিকিৎসকের পরীক্ষা বার্থ হইল। রাজা দীর্ঘনিশ্বাস ত্যাগ করিয়া কহিলেন,—“পুত্রশোকে আমার শরীর জর্জরিত ; আমার রক্তে বাদসাহ-পুত্রের জীবন রক্ষা হইবে না। নচেৎ আমি অগ্নান বদনে এ দুর্ভাগ্য জীবন বিসর্জন করিতে পারিতাম।”

কর্মচারীগণ ক্ষুণ্ণ হইয়া বাদসাহসমীপে উপনীত হইল এবং হতাশভাবে কহিল,—“জাঁহাপনা, আমরা কোথাও চিরগ্রন্থ ও শোকতাপ হীন মনুষ্য সৃষ্টি দেখিতে পাইলাম না। এ সংসারে বুঝি, শোক-তাপহীন মনুষ্য একবারেই নাই।”

বাদসাহ দীর্ঘনিশ্বাস ত্যাগ করিয়া কহিলেন,—“বুঝিয়াছি, খোদা আমার প্রতি বাম ; প্রাণাধিক পুত্র বুঝি আমার ফাঁকি দিয়া চলিল।”

তদনন্তর কি ভাবিয়া কহিলেন, “তবে আর অনর্থক ঐ রাজাকে বন্দী করিয়া রাখিয়া ফল কি ? উহাকে মুক্ত করিয়া দাও। পুত্রশোকের কলনায় আমি অবীর হইয়াছি। আর! ঐ হতভাগ্য সেই পুত্রশোকে জর্জরিত ! উহার প্রাণনাশে অধর্ম আছে।”

এই বলিয়া তৎক্ষণাৎ রাজাকে মুক্ত করিয়া দিতে অনুমতি দিলেন। এবং তৎসঙ্গে কি ভাবিয়া রাজার রাজ্যও প্রত্যর্পণ করিলেন। রাজাকে কহিলেন, “যাও, আজ হইতে তুমি আমার স্নহৎ। আজ হইতে তোমার ও আমার রাজ্য মিত্ররাজ্য হইল।

প্রার্থনা করি, তুমি দীর্ঘজীবী হইয়া কুশলে রাজধর্ম পালন কর।”

রাজাও, যথোচিত কৃতজ্ঞতা প্রকাশ করিয়া, বিদায় গ্রহণ করিলেন।

(৪)

এইবার রাজার চমক ভাঙ্গিল। এইবার তাঁহার সেই হিতভাবী মন্ত্রীৰ জন্য প্রাণ কাঁদিল। ঈশ্বর মঙ্গলময়—তিনি যা করেন মঙ্গলের জন্ত,—এতদিনে তিনি বিশেষরূপে এই ঋণ-সত্য হৃদয়ঙ্গম করিলেন। ভাবিলেন, মন্ত্রী আমায় সত্যই বলিয়াছিল,—“মহারাজ পুত্রবিরহে খেদ করেন কেন? ঈশ্বর যা করেন, মঙ্গলের জন্ত!” সত্য,—মন্ত্রীর বাক্য অতি সত্য। যদি পুত্রশোকে আমার হৃদয় জর্জরিত না হইত, তাহা হইলে ত আজ বাদসাহের আজ্ঞাক্রমে নিশ্চয়ই আমার প্রাণ যাইত।—পুত্রম্নেহ কি, না বুঝিলে, বাদসাহও আমার ছুখে ছুঃখিত হইতেন না, কিংবা আমাকে মুক্ত করিয়া আমার রাজ্যও আমায় প্রত্যাপণ করিতেন না। বুঝিলাম, মন্ত্রীর বাক্যই আমার বেদবাণী।”

মন্ত্রী বিরহে রাজা অধীর হইলেন।—সেই মন্ত্রীকেই আবার তিনি শূলদণ্ডে দণ্ডিত করিয়াছেন! তাঁহার ক্ষোভের আর সীমা রহিল না।

এই সময় জল্লাদ আসিয়া কুতাঞ্জলিপুটে কহিল,—“মহারাজ, দাসের অপরাধ গ্রহণ করিবেন না,—আমি মন্ত্রীকে ছাড়িয়া দিয়াছি।”

রাজা, তৎক্ষণাৎ সেই জল্লাদকে পুরস্কৃত করিলেন এবং রাজ্য-ময় ঘোষণা করিয়া দিলেন,—“যে ব্যক্তি আমার মন্ত্রীকে আনিয়া দিতে পারিবে, কিংবা তাঁহার সন্ধান করিয়া দিতে পারিবে, তাহাকে প্রচুর পুরস্কার দিব।”

দেশ দেশান্তরে লোক ছুটিল। শেষে বীরবল নামক এক নাগরিক মন্ত্রীর সন্ধান পাইলেন।

(৫)

মন্ত্রীৰ অবস্থা তখন অতি হীন । সামান্য জীবিকা অৰ্জনেৰ জন্তু তাঁহাকে অতি নীচকৰ্ম্ম কৰিতে হইতেছে । অবস্থাশূণ্যে তাঁহাৰ আকৃতিৰ এবং বেশ ভূষাৰও বিলক্ষণ বৈলক্ষ্য্য ঘটয়াছে । কিন্তু বীরবল মন্ত্রীকে দেখিবামাত্ৰই চিনিতে পারিল । দূৰ হইতে দেখিল, মন্ত্রী মহাশয় এক টেকিশালে, টেকিৰ উপৰ পা দিয়া চিড়া কুটিতেছেন । বীরবল দূৰ হইতে এ দৃশ্য দেখিয়া ঈৰ্ষ হাছিল । হাসিতে হাসিতে নিকটবৰ্ত্তী হইয়া কহিল, “কি মন্ত্রী মহাশয়, আমাকে চিনিতে পারেন কি ?—এ কি হইতেছে ?”

মন্ত্রী মহাশয়ও তদবস্থায় কহিলেন,—“হইবে আর কি ? নারায়ণ যখন যেমন রাখেন, তখন তেমনি থাকি ।—উপস্থিত এই টেকিতে চিড়া কুটিতেছি ।”

যথাসময়ে বীরবল মন্ত্রীকে একে একে সকল বৃত্তান্ত জ্ঞাপন করিল । মন্ত্রী রাজসমীপে আনীত হইলেন । রাজা, মন্ত্রীকে দেখিতে পাইয়াই, ব্যাকুলভরে সিংহাসন হইতে উখিত হইলেন এবং তাঁহাকে স্নেহ প্রীতিভরে আলিঙ্গন করিলেন । পরে রুদ্ধকণ্ঠে কহিলেন,—“মজ্জিন্ ! আমার সকল অপরাধ বিস্মৃত হও । সত্যই বুঝিয়াছি, ঈশ্বর মঙ্গলময়,—তিনি যা কিছু করেন, সকলই মঙ্গলের জন্ত ।”

মন্ত্রীও আনন্দিত হইয়া, প্রেমভরে কহিয়া উঠিলেন,—“ঈশ্বর যে মঙ্গলময়, তাহা কি মহারাজ একবার বলিতে ? আপনি কেন আমার নিকট লজ্জিত হইতেছেন ? আপনা হইতে যে আমি নির্ভাসিত হই, তাহাও মঙ্গলের জন্ত । তাবিন্না দেখুন, বাদসাহের সহিত আপনার যুদ্ধকালে যদি আমি

আপনার মন্ত্রী থাকিতাম, তাহা হইলে আপনার সহিত আমাকেও বন্দী হইতে হইত। তারপর ভাবিয়া দেখুন, চিরশ্রমক্লান্ত ব্যক্তির প্রাণনাশ করিতে পারিলেই বাদসাহপুত্রের জীবন রক্ষা হইত। কারাগারে থাকিলে, আপনার সহিত আমারও পরীক্ষা হইত। আপনি মুক্ত হইতেন,—কিন্তু এ হতভাগ্যের নিশ্চয়ই প্রাণ বাইত। কারণ ঈশ্বরেচ্ছায়, এ দাস কল্পিন্‌কালে, কোন কিছুতেই শাস্তিহারা হয় নাই। অতএব ঈশ্বর যে মঙ্গলময়,—তিনি যা করেন, তাহা যে মঙ্গলের জন্ত, এ কথা আর কথা কি, মহারাজ ?”

তখন রাজার সম্পূর্ণরূপে চৈতন্ত হইল। তিনি আনন্দ-বিহ্বল-কণ্ঠে উচ্চৈঃস্বরে “জয় :ঈশ্বর মঙ্গলময়, জয় মঙ্গলালয়” বলিতে লাগিলেন। ভাবিয়া দেখিলেন, তাঁহার মন্ত্রী মনুষ্যবেশে দেবতা।

বলা আবশ্যক, এই দেব-চরিত্র মন্ত্রীর সহবাসে কালে সেই রাজারও দেবত্ব লাভ হইল।

সমাপ্ত।





মঙ্গল ও অমঙ্গল ।

পাঠক, এই আখ্যায়িকাটিতেও মঙ্গল ও অমঙ্গলের আর একটি চিত্র দেখুন ।

(১)

একদা কোন মহাপুরুষ ছদ্মবেশে দেশভ্রমণে বহির্গত হন । পথিমধ্যে একটি লোক তাঁহার অনুসরণে একান্ত ইচ্ছা প্রকাশ করিল । নিতান্ত অনুরক্ত হইয়া অনিচ্ছাসত্ত্বেও তিনি শেষে সেই লোকটিকে সঙ্গে লইয়া এই কথা বলেন,—“দেখ বাপু, আমার সঙ্গে এস, ক্ষতি নাই ! কিন্তু প্রতিজ্ঞা কর, আমি যাহা করিব, তাহাতে ভাল-মন্দ কোন কথা কহিতে পারিবে না ।”

লোকটি তাহাতেই সম্মত হইয়া, তাঁহার সহিত অনেক স্থান ভ্রমণ করিল । পরিশেষে ক্ষুৎপিপাসায় ক্লিষ্ট হইয়া তাঁহারা এক বিশিষ্ট ধনীর আলয়ে আতিথ্য-স্বীকার করিবার মানসে দ্বারদেশে উপনীত হইলেন এবং আপনাদের অভিলাষ ব্যক্ত করিলেন । বাবুর কিন্তু তাহাতে হুকুম হইল,—“এ দরওয়ান, একো নেকাল দেও ।”

এ কথায় পূর্বোক্ত মহাপুরুষ উত্তর করিলেন,—“ভগবান তোমায় আরও বড় করুন, তোমার আরও ঐশ্বর্য্য হোক !”

স্কুলোদর বাবুটি এ গুঁড়ীর ভাবার্থ না বুঝিয়াই, উপহাসচ্ছলে অতিথিদেরকে তাড়াইয়া দিলেন। দ্বিতীয় ব্যক্তিটিও, সেই ছদ্মবেশী সাধুর এই আশীর্বাদ বাক্যে কিছু অসন্তুষ্ট হইল। ঘুরিয়া ঘুরিয়া অবশেষে তাঁহারা এক ভূগপত্ৰাচ্ছাদিত ভিখারিণীর কুটীরে আশ্রয় লইলেন। দরিদ্রা সরল অন্তরে, হৃষ্টমনে যথাসাধ্য অতিথি-সৎকার করিল। অতিথিদের বিদায়কালে ঐ বৃদ্ধা ভক্তিভরে প্রণাম করিলে পর, সেই ছদ্মবেশী মহাত্মা তাহাকে আশীর্বাদ করিলেন,—“দেখ বাছা, তোকে আমি এই আশীর্বাদ করি, যেন ত্বরায় তোর এই শিশুটির মৃত্যু হয়।”

(২)

দ্বিতীয় ব্যক্তি প্রথম হইতেই কিছু চটিয়াছিল, কেবল প্রতিজ্ঞারক্ষার্থ কোন কথা কহে নাই। কিন্তু এক্ষণে সে আর স্থির থাকিতে না পারিয়া, বিলক্ষণ ক্রোধভরে সেই ছদ্মবেশী মহাত্মাকে কহিল, “এই বুঝি ঠাকুর তোমার ধর্মজ্ঞান? বুজুকি-ভগ্নামী যত জান বহিত নয়! ভালর ত কাল নেই! ক্ষিদের নাড়ী বাপস্তক’ছেলো,—তখন বড়-মানুষের দরজায় গলাধাক্কাত খেয়ে তাকে বর দেওয়া হলো কিনা,—‘তুমি আরও বড় হও!’ আর এ বেচারি—আহা, থাইয়ে জানুনাথলে,—এরে আশীর্বাদ করা হলো কিনা,—‘তোর ছেলেটা শীগুগির মরুক।’ যা’হোক ঠাকুর, এইপ্রস্তেই বুঝি আমাকে ব’লেছিলে যে, তুমি যা’করবে, তাতে কোন কথা কহিতে পারবো না?”

ইহাতে সেই হৃদয়দর্শী, সংযতেন্দ্রিয় মহাপুরুষ একটু হাসিয়া

কহিলেন,—“হাঁ, বাপু, আমি পূর্ষ হইতেই জানিতাম যে, তুমি এরূপ করিবে। মনে পড়ে কি ?—সেইজন্তই তোমাকে আমার অনুসরণ করিতে নিষেধ করিয়াছিলাম।”

এইরূপ দুই এক কথা পর দ্বিতীয় ব্যক্তি একটু নরম হইয়া কহিল,—“তা এক্ষণে আমার এ কথাটার অর্থ বুঝাইয়া দিন। আপনি কেন ঐ বড় মানুষকে আরও বড় হইতে আশীর্বাদ করিলেন,—আর এই ভিখারিণীকেই বা কেন এমন মর্মান্তিক অভিসম্পাদ করিলেন ?”

তখন সেই মহাপুরুষ কহিলেন,—“দেখ, ভগবান্ বাহাকে যাহা দিয়াছেন, তাহার অবশ্যই একটা সীমা আছে। আমার, ঐ ধনীকে অধিক সুখী হইতে আশীর্বাদ করিবার কারণ এই যে,—উহার যতটা সুখ, অল্প সময়েই নিঃশেষ হইয়া যাইবে। যেমন এক প্রদীপ তেল সাধারণতঃ ৩৪ ঘণ্টা কাল পুড়িতে পারে, কিন্তু দুই কিংবা ততোধিক বর্ত্তিকা সহযোগে তাহা অল্প সময়ে নির্বাণ হইয়া যায়; তদ্রূপ ঐ ধনীরও ঐ নখর সুখ, যদি দশ বৎসর সন্তোষ হইবার সম্ভাবনা থাকে, তবে আমার আশীর্বাদে ঐ পাষণ্ড নির্বাণোন্মুখ দীপশিখার ত্রায় বিকট হাসি হাসিয়া অল্প সময়েই চিরনির্বাণ প্রাপ্ত হইবে। আর, ঐ যে ধর্ম্মভীক দরিদ্রা নারী, কালে এই বৃদ্ধা,—উহার ঐ আপাতঃনয়নরঞ্জন—কুসুমচ্ছাদিত ভুঞ্জঙ্গ শিশু দ্বারা এ মহান্ ধর্ম্মপথ হইতে স্নদূরে বিচ্যুত হইয়া পড়িবে। আমি যোগবলে ইহা প্রত্যক্ষ দর্শন করিয়াই, এই অতীব শুভ আশীর্বাদ—ঐ শিশুর মৃত্যু কামনা করিয়াছি!”

সমভিযাহারী লোকটির তখন অবশ্য চৈতন্ত হইল। গুরু ভিন্ন ব্রাহ্ম জীবকে প্রতি হাতে আর কে শোধরাইয়া দিতে পারে ?



পূর্ণচন্দ্র

(১)

শালিবান শ্যালকোটের রাজা। ইচ্ছা তাঁহার প্রথম
মহিষী। রাজা বহুদিন অপুত্রক থাকেন। মহিষী ইচ্ছা, ভগ-
বান শিবসন্নিধানে অর্হর্নিশ পুত্র-কামনা করেন। বহু দিন পরে
জ্ঞৈক সিদ্ধ সন্ন্যাসী আসিয়া রাণীকে আশ্বাস দিলেন যে, শিব-
চতুর্দশী ব্রত পালন করিলে তিনি পুত্রবতী হইবেন। রাজমহিষীও
যথারীতি বর্ষব্যয় উক্ত মহাব্রত পালন করিতে লাগিলেন। কিন্তু
তথাপি তাঁহার অভীষ্ট সিদ্ধ হইল না। রাজারানী উভয়েই
সন্ন্যাসি-বাক্যে বীতশ্রদ্ধ হইলেন। কিছুদিন পরে আবার সেই
সিদ্ধ যোগি-পুরুষ উদ্যান-মধ্যে রাজা ও রাজমহিষীকে দেখা
দিলেন ; জলদগস্তীরস্বরে রাণীকে কহিলেন,—“তুমি দেব-বাক্যে
অবিশ্বাস করিয়াছ, ইহার মার্জনা নাই। অবশ্য সর্বমূলক্ষণ-
যুক্ত নুসন্তান তুমি লাভ করিবে বটে ;—কিন্তু বিধাতা বিমুখ,—
পুত্রলাভ করিয়াও, তোমায় অশেষ যন্ত্রণা ভোগ করিতে হইবে।”

তৎপরে রাজাকে কহিলেন,—“তোমারও ইহান্তে মার্জনা
নাই ; তুমিও দ্বাদশ বৎসর স্ত্রী ও পুত্রমুখ দেখিতে পাইবে না।
ইহার অত্রিা করিলে,তোমাকে অকালে জীবন হারাইতে হইবে।”

যথাসময়ে তাঁহারা এক সৰ্ব্বমূলক্ষণযুক্ত পুত্ররত্ন লাভ করিলেন। রাজার মঙ্গল কামনায়, রাজমহিষী পুত্রকে লইয়া দ্বাদশ বৎসর নির্জন-উদ্যানে অবস্থিতি করিতে লাগিলেন। এ দীর্ঘকালের মধ্যে রাজা একদিনও মহিষীকে দেখিতে পান নাই।

(২)

একদিন রাজা মৃগয়ার উদ্দেশে গমন করিতেছেন, পথে এক ভুবনমোহিনী মোহিনীমূর্তি তাঁহার নয়ন মন আকর্ষণ করিল। কামোন্মত্ত রাজা কিছুতেই সে রূপ-ভূষণ সংবরণ করিতে পারিলেন না। তাহাকে রাজধানীতে আনিয়া অতি গোপনে যথাশাস্ত্র বিবাহ করিলেন। কেবল মন্ত্রী মাত্র এই বিবাহের কথা জানিতে পারিলেন। রাজার এই বিবাহের কথা গোপন করিবার কারণ এই,—সেই সুন্দরী স্মৃতিত চামার-বংশসম্ভূতা। নীচ কুলে উদ্ধাহক্রিয়া সম্পন্ন হইয়াছে শুনিতে সাধারণে অবশ্যই রাজার অপযশ ঘোষণা করিবে। তাই তিনি এ বিবাহ গোপন রাখিলেন। শ্রীলকোটাধিপতির এই দ্বিতীয়া মহিষীর নাম—লুনা।

যথা সময়ে দ্বাদশ বৎসর উত্তীর্ণ হইল। এই সময়ের মধ্যে, মহিষী ইচ্ছা, ‘ঈশ্বর মঙ্গলময়’ এবং ‘সংসার অতি কুটিল’ বুঝাইয়া, পুত্রকে বড়ই ধর্মবিখ্যাসী করিয়া তুলেন। নির্দিষ্ট সময় পূর্ণ হইলে, মহিষী ইচ্ছা ও পুত্র পূর্ণচন্দ্র রাজপুরীতে আনীত হইলেন। রাজার আদেশ অনুসারে রাজদূত আসিয়া কুমার পূর্ণচন্দ্রকে রাজসমীপে লইয়া যাইতে চাহিল। মহিষী

ইচ্ছা পুত্রকে বাইতে অনুমতি দিলেন। সর্বমঙ্গলো অটল বিশ্বাসী পূর্ণচন্দ্র ও পিতৃদর্শন করিয়া, পিতার চরণ বন্দনা করিলেন।

এই সময়ে দ্বিতীয়া মহিষী লুনা ও কুমার পূর্ণচন্দ্রকে দেখিতে চাহিল। রাজা বিষম বিপদে পড়িলেন। এতদিনে তাঁহার গুপ্তবিবাহ সাধারণ্যে প্রকাশিত হইল। তিনি মহিষী ইচ্ছার নিকট ইহার জ্ঞাত মুক্তকণ্ঠে ক্ষমা প্রার্থনা করিলেন। পতিব্রতা সতী স্বামীর দোষ ত গ্রহণ করিলেনই না,—অধিকন্তু তিনি হৃষ্টচিত্তে পূর্ণচন্দ্রকে বিমাতার চরণ বন্দনা করিতে অনুমতি দিলেন।

এদিকে লুনা ও তাহার পিশাচ-হৃদয় পিতা জম্বু রাজপুত্রের বিরুদ্ধে নানা অহিত চেষ্টা করিতে লাগিল। দারুণ হিংসা-বৃত্তির উত্তেজনার তাহারা পূর্ণচন্দ্রের বিনাশোপায় বন্ধপরিকর হইল। সতীন-পুত্র জীবিত থাকিতে বিমাতার কিছুতেই মুখ নাই,—পিতার উপদেশে লুনা সম্যকরূপে এতাব হৃদয়ে উপলব্ধি করিল।

যথাসময়ে পূর্ণচন্দ্র বিমাতার চরণ বন্দনা করিতে আসিলেন। কিন্তু পূর্ণচন্দ্রের অলোক-সামান্য রূপমাদুরী দেখিয়া, পাপিষ্ঠা লুনার মনে পাপ-ইচ্ছা বলবতী হইল,—মাতা-পুত্র সম্বন্ধ “ভুলিয়া” সেই হৃৎতা পাপবৃত্তি চরিতার্থ করিতে উন্নতপ্রায় হইল। প্রথমে বিনয় নম্র বচনে—অমরোদ্যে, শেষে বলপূর্বক পূর্ণচন্দ্রকে আলিঙ্গন করিতে, সেই পাপীয়সী কৃতসঙ্কল্পা হইল। সর্বমঙ্গলো বিশ্বাসী নিকলক পূর্ণচন্দ্র সেই সর্ব মঙ্গলময়কে প্রাণের ব্যাকুলতার ডাকিতে লাগিলেন। সংসার-প্রবেশের প্রথম দিনে—প্রথম পদক্ষেপেই এই ভীষণ পাপের বিভীষিকাময় ভীষণ দৃশ্য দেখিয়া

তিনি অধীর হইলেন। সেই সৰ্ববিপদভঞ্জনকে ডাকিতে ডাকিতে “মা—মা” রবে, তিনি অতি দ্রুতপদে, সেই পাপ-কক্ষ হইতে নিজ্রাস্ত হইলেন।

(৩)

এইবার পূর্ণ মাত্রায় বিষ ধরিল। নিশ্চয়-প্রতিহিংসা-বৃত্তি এইবার সাংঘাতিকরূপে লুনার হৃদয় অধিকার করিল। কারণে কার্যের সংযোগ—অগ্নিতে ঘৃতাভূতি পড়িল। আঘাতিতা কাল ভুঞ্জিনীর ন্যায় লুনা অতি ভীষণ মূর্তিতে মাততায়ীকে দংশন করিবার সঙ্কল্প করিল। বেশ্যাসুলভ চাতুরীতে পাপিষ্ঠা লুনা রাজার নিকট ঠিক বিপরীত ভাবে এ ঘটনাটি বিবৃত করিল। অর্থাৎ, সেই সময়তান সদৃশ সতীনপুত্র তাহার সতীত্ব নষ্ট করিতে উদ্যত হইয়াছিল। অদূরদর্শী, সন্ধিগুচিত্ত, কামুক রাজার অন্তরে অতি সহজেই তাহা বিশ্বাস হইল। লুনার অভিপ্রায়ানুসারে পূর্ণচন্দ্রকে অন্ধকূপে ফেলিয়া বধ করাই যুক্তিসিদ্ধ হইল। মহিষী ইচ্ছা বিস্তর বাধা দিলেন, বিস্তর অহুনয়-বিনয় করিলেন ; ত্রায়সঙ্গত বিচার প্রার্থনা করিয়া পুত্রের নিকলঙ্ক চরিত্র অক্ষুণ্ণ রাখিতে যত্নবতী হইলেন। কিন্তু তাঁহার কোন চেষ্টাই ফলবতী হইল না।

এইবার ইচ্ছার ‘সৰ্বসাম্রাজ্যে’ বিশ্বাস টলিল। ‘তিনি সেই সন্ন্যাসী বাক্য বিশ্বাস্ত হইলেন। ইহাতে সেই তত্ত্বজ্ঞানী পূর্ণচন্দ্র মাতাকে বুঝাইলেন,—“মা কাঁদ কেন ? এ সংসার পরীক্ষার স্থল। জৈশ্বর অবশ্যই মঙ্গলময় ; তিনি সাহা করেন, মঙ্গলের জন্মই। অতএব মা, ভগবানের কার্যে বিশ্বাস হারাইও না।”

বস্তুতঃ, সেই অমায়ুষী বিশ্বাসবলে বলীয়ান্ পূর্ণচন্দ্রের হৃদয়, ইহাতেও ক্ষণকালের জন্য বিচলিত হইল না। তিনি মুক্তকণ্ঠে মঙ্গলময়ের মহিমা গান করিতে করিতে কূপ নিষ্কিপ্ত হইলেন।

ইহার অব্যবহিত পরেই, ভগবান্ গোরক্ষনাথ (শিবের অবতার) শিষ্য সেই স্থানে উপনীত হইলেন। তাঁহার জনৈক শিষ্য সেই কূপ হইতে জল আনিতে গিয়া অক্ষুট কাতরোক্তি শুনিতে পাইলেন। পরে সকলে বুঝিলেন, এই কূপ মধ্যে কোন দুর্ভাগ্য জীব পতিত হইয়াছে। গোরক্ষনাথের আদেশে পূর্ণচন্দ্রকে সেই কূপ হইতে উদ্ধোলন করা হইলে গোরক্ষনাথের রূপায় পূর্ণচন্দ্র আরোগ্যলাভ করিলেন। তাঁহার ঐকান্তিক ভক্তি ও চিন্তের একাগ্রতা দেখিয়া গোরক্ষনাথ তাঁহার প্রতি সদয় হইল। ভক্ত সংসারের অসারতা উপলব্ধি করিয়া, স্নকুমার যৌবনেই গুরু গোরক্ষনাথের নিকট যোগ-ধর্মে দীক্ষিত হইলেন।

(৪)

সেই সময়ে পঞ্চদশ স্বাধীনরাজ্যের রাণী সুনন্দা দেবী, কুমারী অবস্থায়, জনৈক সহচরীসমভিব্যাহারে ছদ্মবেশে নানা দেশ পর্য্যটন করিতেছিলেন। মনোমত স্বামী-লাভে বঞ্চিতা হইয়া, সুনন্দা এতাবৎকাল অবিবাহিত রহিয়াছেন। এখন, অন্তর্ধামী গোরক্ষনাথ, প্রিয় শিষ্য পূর্ণচন্দ্রকে পরীক্ষার্থ, কৌশল করিয়া সুনন্দার সহিত তাঁহার বিবাহ দিলেন। কিন্তু সত্য সত্যই, যাহার ভগবানের প্রতি প্রাণ টানিয়াছে, তাহাকে প্রতিনিবৃত্ত করে কার সাধ্য? কামিনী-কাঞ্চনের সম্পূর্ণ প্রলোভনেও,

কিছুতেই পূর্ণচন্দ্রের হৃদয় বিচলিত হইল না। তিনি কিছুদিনের জন্ত সংসারী হইলেন বটে ; কিন্তু সে সংসারী হওয়াও, যোগ-ধর্ম সাধনের প্রথম সোপান। অবশেষে কোন প্রকারে সুন্দরার নিকট হইতে বিদায় নইয়া, পরম জ্ঞানী পূর্ণচন্দ্র আবার গুরুপদ-সেবায় নিযুক্ত হইলেন। পতিপ্রাণা সতী সুন্দরা, স্বামী-সহবাসে বঞ্চিত হইয়া, হিন্দুস্ত্রীর অন্ত কর্তব্য সাধন করিলেন,—পূজনীয়া ঋশ্ঠাকুরাণীর চরণ-সেবা করিতে মনস্থ করিলেন। তিনি অবগত ছিলেন যে, রাজা শালিবান দ্বিতীয়া মহিষীর কুট-ঋণায় পুত্রকে অন্ধরূপে নিক্ষিপ্ত করিয়া, প্রথমা মহিষীকে কারারুদ্ধ করিয়াছেন। অভাগিনী মহিষী অন্ধ ও পাগলিনী হইয়া তথায় অতি কষ্টে কালান্তিপাত করিতেছেন। সুতরাং তিনি শ্যাল-কোটে আসিয়া, দূতদ্বারা রাজ-সকাশে জানাইলেন যে, হয় তিনি প্রথমা মহিষীকে কারাগার হইতে অব্যাহতি দিন,—নয় রাণী সুন্দরা দেবী সসৈন্তে তাঁহাকে যুদ্ধে আহ্বান করিতেছেন।

পূর্ব হইতেই নানা কারণে রাজ্য মধ্যে বিশৃঙ্খলা ঘটিয়াছিল ; সৈন্তগণ ছত্রভঙ্গ হইয়া পড়িয়াছিল। সুতরাং রাজা শালিবান সহজেই সন্ধি প্রার্থনা করিলেন। সুন্দরা দেবী তখন ছদ্মবেশে, স্বয়ং দাসী-ভাবে, সেই উদ্যান-বাটীতে ঋশ্ঠাকুরাণীর পদ-সেবা নিযুক্ত হইলেন।

(৫)

ই পাপের শেষ দৃষ্ট অতি ভয়ঙ্কর। হুরাকাজ্জার বশে সকলই সম্ভবে। গাপীয়সী লুনা, অতঃপর তাহার পিতার পরামর্শ মতে রাজাকে বিষ প্রদানে হত্যা করিতে সঙ্কল্প করিল। ইতি-

পূর্বে এই পাপিষ্ঠা গোরক্ষনাথের জনৈক শিষ্য—সেবাদাসের সহিত পরিণয়-সূত্রে আবদ্ধ হয়। সেবাদাস নানাবিধ বিষ প্রস্তুত করিতে জানিত। তন্মধ্যে একটি বিষের গুণ এই যে, তাহা পান করিলে, দুই, চারি, বা ছয় মাসে ক্রমশঃ শরীর ক্ষয়প্রাপ্ত হইয়া প্রাণ নষ্ট হয়। সেবাদাসের সহিত প্রণয়কালে লুনা একদিন সেই বিষবটিকা অপহরণ করিয়াছিল। এখন জন্মুর পরামর্শানুসারে পাপিষ্ঠা কৌশলে সেই বিষ রাজাকে খাওয়াইয়া দেয়। রাজাও সেই বিষপানে ক্রমশঃ জর্জরিত হইতে থাকেন। বিষ চুরীর বিষয় জানিতে পারিয়া সেবাদাস ক্রোধাক্ত হইয়া, তপ্ত লৌহ-শলাকায় লুনার পৃষ্ঠদেশে ইতিপূর্বে “চোর” নাম অঙ্কিত করিয়া দিয়াছিল। এখন রাজা শালিবান্ সেই বিষের আলায় জর্জরিত ! পিশাচীর চাতুরীতে পড়িয়া আজ তাঁহার প্রাণ কণ্ঠাগতপ্রায় ! দেশ-দেশান্তর হইতে কত বৈদ্য, কত চিকিৎসক আসিল, কিন্তু কেহই রোগের কারণ নির্ণয় করিতে পারিল না। রাজা, জীবনের আশা ত্যাগ করিলেন।

(৬)

ক্রমে ভগবান্ গোরক্ষনাথের মর্ত্যলীলা শেষ হইয়া আসিল। শিষ্য পূর্ণচন্দ্রের দ্বারা পৃথিবীতে ‘যোগ-ধর্ম’ প্রচার হইতেছে বুঝিয়া, তাঁহার কার্য্য তিনি শেষ করিলেন।—তিনি শিষ্যে জ্বালকোটে উপনীত হইয়া নগর-প্রান্তে অবস্থান করিতে লাগিলেন। অন্তর্য্যামী গোরক্ষনাথ প্রিয়শিষ্য পূর্ণচন্দ্রকে সমস্ত কৌশল বুঝাইয়া দিলেন। পূর্ণচন্দ্র শিষ্যে অবধূত-বেশে সমবেত রোগীদিগকে ঔষধ দান করিতে লাগিলেন। ঔষধের আশ্চর্য্যশ্রুতি

মুহূর্ত্তমধ্যে সকলেই সুস্থ হইতে লাগিল। অনতিদীর্ঘকাল মধ্যে এ সংবাদ রাজার কর্ণগোচর হইল। তিনি পারিষদাদি সমভি-
বাহারে অবধূতের নিকট উপস্থিত হইয়া ঔষধ সেবন করিলেন।
ঔষধের আশ্চর্য্যগুণে তৎক্ষণাৎ তাঁহার নবজীবন লাভ হইল।

এ সময়ে লুনা ও তাহার পিতা জম্বু তথায় উপস্থিত ছিল।
শালিবান লুনাকে অবধূতের নিকট পুত্র-বর চাহিতে অনুমতি
করিলেন। লুনাও পুত্রবর চাহিল। অবধূত তখন, প্রথম পুত্র পূর্ণ-
চন্দ্রের কথা রাজার স্মৃতিপথে উদয় করিয়া দিলেন। পর-
স্পরের কথা-প্রসঙ্গে ক্রমে সত্য বাহির হইয়া পড়িল। পূর্ণচন্দ্রের
নির্দোষিতা উপলব্ধি করিয়া, রাজা তখন “হা পুত্র—হা পুত্র”
রবে বিলাপ করিতে লাগিলেন। শেষে পিতা-পুত্রের মিলন
হইল। পাপিষ্ঠা লুনা নিজমুখে আত্মপাপ স্বীকার করিল ;
এবং সেবাদাসের উক্তিতে সমস্ত রহস্ত প্রকাশ হইয়া পড়িল।
চতুর্দিকে ‘জয় জয়’ ধ্বনি আকাশমার্গ ভেদ করিল। মহিষী
ইচ্ছা, পতিব্রতা সূন্দরা,—তখন সকলেই সেখানে উপস্থিত
হইলেন। পুত্র পূর্ণচন্দ্রের কল্যাণে মাতা ইচ্ছার নষ্টচক্ষুর উদ্ধার
হইল। উগ্ৰাদিনা ইচ্ছা আবার স্বাভাবিক অবস্থা প্রাপ্ত হই-
লেন। বহু বিঘ্ন বিপত্তির পর, এই অভাবনীয় আনন্দমিলনে
সকলেই সেই সর্ব্বমঙ্গলময় ভগবানের প্রতি জয়ধ্বনি করিয়া
হৃদয়ের কৃতজ্ঞতা জানাইতে লাগিলেন। পরিশেষে সেই চামার
পিতা-পুত্রী স্ব স্ব পাপের প্রতিকূল—অতি কঠোর প্রায়শ্চিত্ত
ভোগ করিতে লাগিল। ধর্ম্মের জয় হইল। *

* কবি শ্রীগিরিচন্দ্রের “পূর্ণচন্দ্র” হইতে সংলিখিত। পঞ্জাব অঞ্চলের
সম্ভাব্যবিশেষের সেই “পূর্ণ-ভকত”ই আমাদের এই “পূর্ণচন্দ্র”।



ভক্তি ও ভক্ত ।



ভগবদ্ভক্তি অপেক্ষা অপার্থিব রত্ন মানুষের আর কিছু নাই। এই অমূল্য নিধির রূপায় মানুষ দেবতার অপেক্ষাও অধিক শক্তিশালী হয়। ভগবানের প্রতি জীবনের যথাসর্বস্ব অর্পণের নাম ভক্তি। বাহিরে ভক্তির কোন রূপ নাই,—ভক্তি হৃদয়ে। তাই প্রকৃত ভক্তকে, যে সে চিনিতে পারে না। সেই ভক্ত-বংশল যে কা'র প্রাণে, কি ভাবে বিরাজ করেন, তাহা কেবল তিনি, আর তাঁর ভাগ্যবান সেবকেরাই বলিতে পারেন। উপস্থিত আধ্যাত্মিকটিতে সেই কথাটিই বুঝিতে চেষ্টা পাইব।



(১)

একদা দেবর্ষি নারদ বৈকুণ্ঠে ভগবান শ্রীহরির দর্শনাভিলাষে গমন করিতেছিলেন। পথিমধ্যে এক স্থানে দেখিলেন, এক প্রকাণ্ড বটবৃক্ষমূলে একটি সাধুপুরুষ অবস্থান করিতেছেন। তাঁহার পরিচ্ছদ ও বেশভূষা মহাজনোচিত;—কোপিন বসন পরিধান, সর্কাক্ষ বিভূতি-পরিলেপিত, মস্তকে দীর্ঘ জটাভূট পরিশোভিত। পবিত্র শার্দূল-চর্ম্মোপরি যোগাসনে উপবেশন করিয়া তিনি তন্ময়চিত্তে সেই সর্কাস্তর্য্যামীর ধ্যানে বিভোর,—সেই সচ্চিদানন্দ-প্রেমে আত্মহারা। ঋষিশ্রেষ্ঠ নারদ হৃষ্টচিত্তে

উক্ত মহাজনবেশধারী, সোম্যামূর্তি সন্ন্যাসীর সম্মুখে উপস্থিত হইলেন। সন্ন্যাসী কিছুক্ষণ পরে চক্ষু উন্মীলন করিয়া, বিনয়-নম্র-বচনে নারদকে কহিলেন,—“দেবর্ষে! আপনি সর্বজ্ঞ, ও পরম করুণাধার। সর্বস্থানেই আপনার গতিবিধি আছে। যদি এ দীনের প্রতি কৃপা করিয়া, একবার ভগবানের নিকট এ দীনের একটি প্রার্থনা জ্ঞাপন করেন, তবেই আমার সমস্ত কষ্টের সার্থক হয়। দেখুন, আমি সংসারাত্মন,—ধন জন, স্ত্রী পুত্র—সমুদয় ত্যাগ করিয়া কেবলই তাঁহারই ধ্যানে জীবন অতিবাহিত করিতেছি,—তাঁহারই চিন্তায় ঐহিক সুখ তুচ্ছ করিয়া সন্ন্যাসী হইয়াছি। অতএব যাহাতে তিনি সত্ত্বরই আমার প্রতি প্রসন্ন হন, আপনি সে বিষয়ে একটু মনোযোগী হইবেন এবং আমার হইয়া দুইটা কথা তাঁহাকে বলিবেন।”

দেবর্ষি নারদ উত্তর করিলেন,—“হাঁ, অবশ্য; তা’ত বটেই। তিনি পরম দয়ালু; তোমার এ ঐকান্তিক আত্মসমর্পণের ফল কি নিষ্ফল হইতে পারে? আমিও তাঁহার দর্শনাথ বৈকুণ্ঠে বাইতেছি। তোমার হইয়া আমি সাধ্যানুসারে তাঁহাকে বলিব। বোধ করি, তাহা হইলেই তোমার মনোবাঞ্ছা পূর্ণ হইতে পারে।”

সন্ন্যাসী, তাঁহার হইয়া ঠাকুরের কাছে সুপারিস করিতে, নারদকে কতই অনুনয়-বিনয় করিলেন; আকারে ইঙ্গিত কতই কৃতজ্ঞতা দেখাইলেন। নারদও তাঁহাকে যথাবিহিত আপ্যায়িত ও আশ্বস্ত করিয়া তথা হইতে প্রস্থান করিলেন।

কিছুদূর গমনের পর তিনি এক তিস্তিড়িবৃক্ষতলে এক অপ-বিদ্র, অনাচারী, কুংসিতমূর্তি দেখিতে পাইলেন। সেই লোকটা নারদকে দেখিবামাত্র, তাহার সেই স্বাভাবিক উগ্রকণ্ঠে

কৰ্কশস্বরে কহিল,—“বলি, তুমি না নারদ ঋষি ? তুমি ত বৈকুণ্ঠে
যাচ্ছ ? আচ্ছা, ঠাকুরকে জিজ্ঞাসা ক’রো দেখি, কত দিনে আমি
তঁাকে পাবো ?—কেমন, মনে থাকবে ত ?”

দেবর্ষি তাহার ভাবগতিক দেখিয়া পূৰ্ব হইতেই তাহার
তপস্তার দোড় বুঝিয়া লইয়াছিলেন। এক্ষণে ঈদৃশ প্রশ্ন শুনিয়া,
মনে মনে একটু অবজ্ঞার হাসি হাসিয়া প্রকাশ্যে কহিলেন,—
“আচ্ছা, তোমার কথাও বলবো।”

“বড় ‘আচ্ছা’ নয়। না ব’লে কিন্তু টেরটা পাবে !”

মহামুনি নারদ আর কোন উত্তর না করিয়া তথা হইতে
প্রস্থান করিলেন। মনে মনে কহিতে লাগিলেন,—“আহা,
ভগবানের ত আর খেয়ে-দেয়ে কাজ নাই, তিনি ঐ মূর্তির জন্যে
ভেবে ম’চ্ছেন আর কি !

(২)

যথাসময়ে দেবর্ষি বৈকুণ্ঠলোকে বৈকুণ্ঠপতির সন্নিধানে
উপস্থিত হইলেন ; এবং যথাবিহিত পরম্পরের স্বাগত কুশলবার্তা
জিজ্ঞাসাদির পর, নারদ পথিমধ্যে সেই বটবৃক্ষমূলস্থ, সন্ন্যাসীটির
কথা আত্মপূৰ্ব্বিক বর্ণন করিয়া কহিলেন,—“ঠাকুর ! আপনি কি
নিষ্ঠুর ! আহা, যে আপনার জন্যে সমস্ত ধন বিভব, স্ত্রী পুত্র
ত্যাগ ক’রে সন্ন্যাসী হ’য়েছে,—আপনার ধ্যানজ্ঞান যার
একমাত্র ব্রত, তার প্রতি আপনি একবার চেয়েও দেখুচেন না !
যা’হোক ঠাকুর, আপনি খুব দয়ালু !”

গোলকপতি নারায়ণ এ কথার কোন উত্তর না দিয়া অন্য-

ভাবে জিজ্ঞাসা করিলেন,—“আচ্ছা নারদ, পশ্চিমধ্যে তুমি আর কাহাকেও দেখেছ’ ?”

“কৈ, আর কাহাকে ত বড় একটা দেখি নাই।”

“একটু ভাল ক’রে ভেবে দেখ দেখি,—আর কেহ কোন কথা জিজ্ঞাসা ক’রেছিল কি না ?”

নারদ একটু ইতস্ততঃ করিলেন। ক্ষণপরে কহিলেন,—
“কৈ, আর ত কাহাকে দেখতে পাইনে।—তবে, হাঁ,—হাঁ,—
একটা গুণ্ডাকর্ত্তি ভণ্ড কিছু ব’লেছিল বটে; তা—তা—সে কথা
আপনার শুনে কাজ নাই।”

“আঃ,—বল নাই কেন হে !”

“ঠাকুর, সে কথা শুনে আর আপনার কি হবে? সেটা
কিছু নয়—কিছু নয়! সেটা একটা বিট্কেল, কিস্তিকিমাকার,
কদাচারী জানোয়ার-বিশেষ। সে কিনা আমার ব’লে,—
‘ওরে, তোর ঠাকুরকে জিজ্ঞাসা করিস্, আমি ক’দিনে তাঁকে
পাব।’—রাম রাম ! !”

“বলি, তার উপর অত চ’ট্চ কেন? সেত এ কথা জানতে
চেয়েছিল বটে !”

“আজ্ঞে হাঁ,—তা আপনার কাছে বলতে ব’লেছিল বটে।
কিন্তু সেটা যে আপনার কাছে বলবার মত একটা কথা, তা
আমি ভাবিনে। আর আমারও তা মনেও ছিল না। তবে হাঁ,
ঐ সম্যাসীটির বিষয় আমার কিছু বলবার ছিল বটে।”

“আচ্ছা দেখ, এখন তুমি এক কাজ কর। তুমি এখনই
আবার সেই পথে গিয়ে তাদের হুঁজনকেই বলগে,—যে, যে
গাছের তলায় আছে, তাকে সেই গাছের পাতার সংখ্যানুযায়ী

তত বৎসর পর্য্যন্ত তপস্যা কর্তে হবে, তবে আমাকে পাবে,—
তবে আমি তাদের দেখা দেবো।”

(৩)

নারদও নারায়ণের কথামত স্বরিতপদে পুনোক্ত স্থানে আসিয়া উপস্থিত হইলেন, এবং অগ্রে সেই সন্ন্যাসিবেশী মহাপুরুষের সন্নিহিত সাক্ষাৎ করিলেন। সন্ন্যাসী হঠাৎ নারদকে পাদ্য-অর্ঘ্যাদি দ্বারা পূজা করিয়া জিজ্ঞাসিলেন,—“মহাশয়, দাঁনের প্রার্থনা কি পূর্ণ হইয়াছে?”

নারদ একটু ক্ষুণ্ণস্বরে কাঁহলেন,—“হাঁ বাপু, ভগবান বলিয়াছেন যে, এই বটগাছের যত পাতা, তত বৎসর যদি তপস্তা করিতে পার, তবে তিনি দেখা দিবেন। এর কমে তিনি কিছুতেই রাজি নন।”

সন্ন্যাসী। বুঝেছি,—যথেষ্ট হ’য়েছে বাবা! আর আমার তাঁকে পেয়ে কাজ নেই! আমি চলেম। এতদিন অন্য বিষয়ে মন দিলে আমার ঢের কাজ দেখতো! এই দণ্ডবৎ বাবা!”

এই বলিয়া সেই মহাপুরুষ তন্মাপুঁটলি বাধিয়া তখনই তথা হইতে সরিয়া পড়িলেন।

মহর্ষি নারদও একটু বিস্মিত হইয়া, আপন মনে “তাইত, একি” ভাবিতে ভাবিতে তথা হইতে দ্বিতীয় ব্যক্তির উদ্দেশে সেই তেঁতুল বৃক্ষের নিকটে আসিলেন। সে ব্যক্তি নারদকে দেখিয়াই তাহার সেই স্বাভাবিক রূপস্বরে আগ্রহসহকারে কহিল,—
“কেমন হে ঋষি, তুমি ত বৈকুণ্ঠে গিয়েছিলে? আমার খবর কি? ঠাকুর কি ব’লেন, বল দেখি।”

“মহর্ষি নারদ কহিলেন, “ঠাকুর এই কথা বলেন যে, তুমি যদি, এই তেঁতুল গাছের যত পাতা তত বৎসর তপস্যা করিতে পার, তবে তাঁকে পাবে,—তবে তিনি তোমায় দেখা দিবেন ।”

“এঁয়া ! তাঁকে পা'ব ? এই ক'লে তিনি দেখা দেবেন ব'লে-ছেন ? এই বই ত নয় ! আচ্ছা, এই আমি আসন গেড়ে বস্লেম । তবে তাঁকে পা'ব একদিন ?—আঃ ! একদিন তবে তিনি দেখা দেবেন ? দয়াময় হে !—”

এই বলিতে বলিতে সেই হৃদয়ে ভক্ত, বাহ্যাকারে ‘ভেক’ হীন মহাত্মা আনন্দবিত্তোর প্রাণে কাঁদিয়া ফেলিলেন । প্রেমের পূর্ণোচ্ছ্বাস রোধ করিতে তাঁহার আর সামর্থ্য রহিল না । তাই কাঁদিতে কাঁদিতে গদগদস্বরে কহিলেন,—“আঃ তবে তিনি দেখা দেবেন ?—তাঁকে তবে আমি পাব ? দয়াময় হে !—”

(৪)

ধন্য ভক্তি,—ধন্য ভক্তির মহিমা,—আর ধন্য ভক্তহৃদয় ! এইবার ভক্তের চির আশা ফলবতী হইল ; দ্বিগুণ উৎসাহে সেই পরম প্রেমিক ভগবদ্ভক্ত যোগাসনে উপবেশন করিলেন । নারদ হতবুদ্ধিপ্রায় হইয়া, বৈকুণ্ঠে গিয়া বৈকুণ্ঠনাথকে কহিলেন,—“প্রভো ! এ আপনার কেমন লীলা ? অমন যে সাধু-বেশধারী ভক্ত,সে কিনা, বটগাছের অত বড় বড় পাতা দেখে তল্‌পী পুঁটলি গুটিয়ে পালালো ; আর, আমি যাকে পাষাণ মনে ক'রে অবজ্ঞা করেছিলাম, সেই কিনা, তেঁতুল গাছের অত ক্ষুদে ক্ষুদে পাতা দেখেও আনন্দে কেঁদে ফেলে ব'লে—‘আঃ ! তিনি

তবে দেখা দেবেন ! তাঁকে তবে আমি পাবো !’ প্রভু, এই জন্যই কি তোমার নাম লীলাময় ? হরি ! হরি ! কি অপূৰ্ণ লীলা ! তোমার লীলায়, বটের অত বড় বড় পাতা দেখে এক জন ওঠে ; আর তেঁতুলের অত ক্ষুদে ক্ষুদে পাতা দেখে একজন বসে ! বলিহারি, তোমার মহিমা, প্রভু !—এ অধমও আজ যথেষ্ট শিক্ষালাভ করিল !”

ভগবান কহিলেন,—“দেখ নারদ, লোকের বাহ্যিক ক্রিয়া-কাণ্ড দেখিয়া ভুলিও না। লোকে যদি অন্তরের সহিত কোন অনুষ্ঠান না করে, তবে আমি তার ত্রিসীমায়ও যাই না। মনে রেখ’, ভক্তির পাত্রাপাত্র নাই, ভক্তের মন বুঝিয়া আমি তাহার হৃদয়ে অধিষ্ঠান হই ! এইজন্ত কেহ কেহ মনকে নারায়ণ বলে। এখন যাও,—তুমি যাকে অতি-পাষাণ স্থির ক’রে রেখে-ছিলে, তাকে এখানে নিয়ে এস। তার জন্ত আমার এখানে স্বতন্ত্র স্থান প্রস্তুত হইরাছে।”

নারদ শ্রীভগবানকথিত মূল ভক্তিতত্ত্বের এই কণাংশ অবগত হইয়া কৃতার্থ ও ধন্ত হইলেন ।

সমাপ্ত ।





যমুনা ।

(১)

একটি বালক, আর একটি বালিকা । হু'য়ে বড় ভাব, বড় ভালবাসা । জীবনের সেই উষাকাল হইতে, রবির প্রভাত-কিরণের সহিত, এই বালক-বালিকার পরস্পরের প্রতি পরস্পরের স্নেহ-কিরণ উদ্ভাসিত হইতেছিল । কেহ দেখিত না, কেহ জানিত না, হু'জনাই হু'জনার সন্মুখ হইয়া উঠিতেছিল । মুহূর্ত্তের বিরহ কাহারও ভাল লাগিত না ; কেহ কাহারও ছাড়াছাড়ি হইয়া থাকিতে পারিত না ।

গঙ্গার ধারে, ছোট 'খেলাঘর' বাঁধিয়া, দুটিতে ক্রীড়া করিত, পুতুলের বিবাহ দিত, ফুল ভুলিত, চাঁদ দেখিত, সন্ধ্যার জ্যোৎস্নালোকে গঙ্গাবক্ষে ছোট ছোট তরঙ্গগুলি উঠিত, তাহাই দেখিত । কত কথা, কত গল্প, কত হাসি ! সেই গল্প ও হাসির মাঝে, কখন কখন নীরব হইয়া, হু'জনাই হু'জনার মুখ প্রতি চাহিয়া থাকিত । পরস্পর পরস্পরকে কত সুন্দর দেখিত ! নিম্নলি ভাবিত,—যমুনা কত সুন্দর ! বুঝি, সেই চন্দ্রকিরণোজ্জল হাস্যময়ী প্রকৃতির শোভা, সে সৌন্দর্য্যে ডুবিয়া যায় ! বুঝি, আপনার চিন্তাশূণ্য, সুখপূর্ণ, নিম্নলি ও সুন্দর হৃদয়টুকু, যমুনার সৌন্দর্য্যে নিম্নিত ! যমুনাও ভাবিত,—নিম্নলি কত সুন্দর !

তেমন সুন্দর, সে বুঝি, পৃথিবীতে আর দেখে নাই। বালিকা আপনার রূপের রাশি দেখিতে পাইত না,—শ্রামবর্ণ নির্ম্মলের রূপ, তাহার কাছে জগতে অভুল! তাহারা কেহ কাহাকে এ কথা বুঝাইতে পারিত না; কিন্তু বাল্যকাল হইতে পরস্পর এইরূপ ভাবিত।

তখন কেহ বুঝিত না; কিন্তু এইরূপে দুইটি বালক বালিকার বড় সুন্দর ভাব হইল। ক্ষুদ্র খেলাঘরের মাঝে বসিয়া, ক্ষুদ্র হৃদয় দুটির এমনই মিলন হইল। পুতুলের বিবাহ দিতে দিতে আপনারাও দিনের মধ্যে দশবার করিয়া বিবাহিত হইত! কে দেখিত? উপরে সুন্দর আকাশ, নিম্নে স্বচ্ছ-সলিলা গঙ্গা, গঙ্গাতীরে দু'একটি বৃক্ষ-বল্লরী,—তাহারাই দেখিত। বর, আপনিই পুরোহিত হইত, আপনিই সম্প্রদান করিত; ক'নে চক্ষু বুজিয়া, ঘোমটা দিয়া, আপনিই ক'নে সাজিত, আবার ক'নের মা হইয়া বরকে বরণ করিত! সংসারের সুখ-দুঃখ সেখানে ছিল না। শুধু কথা, শুধু হাসি, শুধু গান! নানা হুঃখে কাতর-প্রাণ হইয়া, কতবার তোমায় আমার শৈশবের সেই খেলাঘর পানে নিরীক্ষণ করি! হায়, এ জীবনে তাহা আর মিলিবে কি?

বালক-বালিকার উষাকাল খুব পরিষ্কার!—আকাশ নির্ম্মল, হৃদয় প্রফুল্ল! জীবন-মধ্যাহ্নে, এ প্রফুল্লতা থাকিবে কি?

(২)

মুন্ডেরের কষ্টহারিণী ঘাট। ঘাটের অনতিদূরে একটি দ্বিতল ঘাটীতে ধমুনার পিতা বাস করিতেন। তাঁহার আর অতি

সামান্য ছিল ; খরচও অল্প ছিল । পরিবারের মধ্যে যমুনা ও তাহার পিতা-মাতা, আর একটি পরিচারিকা ছিল । অন্য পুত্র সন্তান না হওয়ায়, যমুনা তাহার পিতা-মাতার বড় স্নেহ ও আদরের ধন ছিল । যমুনার অতুল রূপরাশি ও সরল হাসি-টুকু, তাঁহাদের বড় আনন্দের ছিল । নিবিড় কৃষ্ণবর্ণ, ঈষদ্রক্ত, অলকাগুচ্ছ নাচাইতে নাচাইতে, চঞ্চল হরিণ শিশুর আশ্রয়, যমুনা যখন তাহার পিতার কাছে ছুটিয়া আসিত, তখন তাঁহার আনন্দের আর সীমা থাকিত না । যত্ন করিয়া তিনি কত্নাকে লেখা পড়া শিখাইতেন ; কত্নাও রীতিমত লেখাপড়া শিখিতে লাগিল ।

নির্ম্মল বড় গরীবের ঘরের ছেলে । যমুনাদের বাতীর পার্শ্বে তাহাদের একখানি কুতীর ছিল । সেই কুতীর ও অট্টালিকার মাঝে, খুব উচ্চ এক প্রাচীর ছিল । বালকবালিকার হৃদয়ের মাঝে কিন্তু কোন ব্যবধান ছিল না । নির্ম্মল শৈশবেই পিতৃহীন হইল । এক মা ভিন্ন, সংসারে তাহার আর কেহ ছিল না । পিতৃসম্বন্ধিত বস্তুকিঞ্চিৎ অর্থ ছিল, তাহাতেই মোটা ভাত-কাপড়টা এক রকমে চলিয়া যাইত । মায়ের যত্নে, নির্ম্মল দৃঢ় অধ্যবসায়ের সহিত লেখাপড়া শিখিতে লাগিল ।

নির্ম্মলের তত রূপ ছিল না, কিন্তু হৃদয়ের গুণে তাহাকে বড় সুন্দর দেখাইত । সকলেই তাহার প্রশংসা করিত ; শুনিয়া হৃৎখিনী মায়ের চক্ষে জল আসিত । আর সে ক্ষুদ্র বালিকার ? নির্ম্মলের প্রশংসা তাহার কর্ণে অমৃত বর্ষণ করিত ।

বয়সের সঙ্গে সঙ্গে নির্ম্মলের প্রতি যমুনার, এবং যমুনার প্রতি নির্ম্মলের ভালবাসা খুব বাড়িতে লাগিল । প্রণয় বলিতে হয়

বল,—এখন হুই জনে অবশ্য তাহা বৃদ্ধিত। যমুনার বয়স দ্বাদশ বর্ষ, নির্মলের ষোড়শ।

প্রায়ই সন্ধ্যাকালে, মুন্সেরের গঙ্গাতীরে নির্মল ও যমুনা বেড়াইত। অধিক লোকসমাগম হইলে, বালক-বালিকা নিভুতে যাইত, কত গল্প করিত। কথা কি ফুরাইত? কোন গল্প কি পুরাতন হইত? বক্তা ও শ্রোতা, পরস্পর মুখের প্রতি চাহিলে, আর গল্প হইত না—হু’জনেই হাসিয়া ফেলিত। সেই জন্ত একজন গল্প বলিত—মুখখানি ভূমিপানে নত করিয়া; আর একজন সতৃষ্ণ-নয়নে অপরের মুখ প্রতি চাহিয়া থাকিত। সমস্ত আন্তরিক বৃত্তি, দর্শনেন্দ্রিয়ে পর্যাবসিত হইত; স্মরণ্য গল্পের দিকে মন থাকা অসম্ভব হইত।

কষ্টহারিণীর দোপানোপরি নির্মলের ক্রোড়ে মস্তক রাখিয়া, সন্ধ্যাকাশ পানে চাহিয়া মধুর কবিতাগুলি, যখন তদধিক মধুর কণ্ঠে যমুনা বলিতে থাকিত, তখন সন্ধ্যা-সমীরণ-চঞ্চল লহরীর মধুর শব্দের সহিত সেই মধুর-কণ্ঠ মিশিয়া নির্মলের হৃদয়ে সুখের প্রবাহ চালিয়া দিত।

“এত বড় আইবুড় মেয়ের, এমন করিয়া একটা ‘খেঁড়ে ছোঁড়ার’ সহিত বেড়ান কি ভাল দেখায়? উপভ্রাসে পড়ি বটে, এমন ঘটনা কিছু নূতন বা আশ্চর্যের নহে; কিন্তু তোমার-আমার ঘরের মেয়েছেলের কি এ সব ভাল দেখায়? ভালবাসা আছে, থাকুক; কিন্তু তাই বলিয়া আর অতটা হওয়া উচিত নহে,—সে বয়স গিয়াছে।”

একদিন কে, যমুনার পিতাকে এই কথা বলিল। তদবধি যমুনা আর বাটার বাহির হইতে পারিত না। এই সময় হইতে

হুই জনের দেখাসাক্ষাৎ বড় কম ঘটত। নিশ্চল, পাঠে নিযুক্ত থাকিত ; যমুনাও সংসারের হু'একথানা ছোট ছোট কাজে ব্যস্ত থাকিত। কেহ কাহাকে ভুলিয়াছিল কি ? যমুনা ভাবিত,— নিশ্চল তাহার জীবনের সর্বস্ব। নিশ্চল ভাবিত,— জগৎ বিস্তৃত হওয়া যায়, কিন্তু সেই শৈশব সঙ্গিনী, হৃদয়ের অমূল্য নিধি যমুনা ভুলিবার নহে ! হৃদয়-মন্দিরে যে দেবী-প্রতিমা প্রতিষ্ঠিতা হইয়াছে, সমস্ত জগতের বিনিময়েও তাহা বিস্মৃতি-গর্ভে বিসর্জিত হইতে পারে না।

এই ভাবে কিছুদিন গেল।

(৩)

যমুনা বয়ঃস্ফা হইয়াছে, অনুঢ়া রাখা আর ভাল দেখায় না ; সঞ্চক হইতে লাগিল। যমুনা, পিতা-মাতার বড় আদরের ধন, খুব সংপাত্রেই চেষ্টা হইতে লাগিল। সংপাত্র মিলিল বটে, কিন্তু যে পরিমাণ অর্থ দিলে সে পাত্রে কত্তাদান হইতে পারে, যমুনার পিতার সে সজ্জা ছিল না। তিনি অর্থপ্রদানে অসমর্থ হইলেন, হুতরাং পাত্রও হাত-ছাড়া হইল। টাকা নাই বলিয়া, লক্ষ্মীছাড়া পাত্রের হস্তে কত্তাকে সমর্পণ করিতে, কোন্ পিতা পারত-পক্ষে স্বীকৃত হন ?

সকলে জানিত এবং বুঝিলও যে, যমুনা ও নিশ্চল, পরস্পরকে বড় ভাল বাসে ; হু'জনের বিবাহ হইলে, হু'জনেই সুখী হইবে ; কিন্তু যমুনার পিতা বা মাতা, কাহারও সে ইচ্ছা ছিল না। নিশ্চল,—সচ্চরিত্র, শিক্ষিত ও বুদ্ধিমান ; কিন্তু নিঃস্ব। সহায়

নাই, সম্পদ নাই, কি দেখিয়া কতাদান করা যায় ? কাজেই তাহা হইল না। যমুনা সে কথা শুনিল।

নির্মলও তাহা শুনিল। কথাটা নূতন কি ? তা' নহে,—নির্মলও তাহা ভাবিত। তাহার মাতার বড় সাধ ছিল, যমুনাকে বধু করেন। কিন্তু অবস্থার হীনতায় সে আশা পূর্ণ হওয়া এক প্রকার অসম্ভব, তাহাও জানিতেন। নির্মলও সে সব বুঝিত। কিন্তু অবস্থা বিবেচনা করিয়া, কে কবে, ভালবাসায় জলাঞ্জলি দিতে পারিয়াছে ?

যাহা হইবার, তাহাই হইল। যমুনার বড়ই ভাবান্তর ঘটিল। নির্মলের স্নান মুখখানি, তাহার হৃদয়ের সকল অবস্থাই ব্যক্ত করিল। বালিকার বৃকে সে আঘাত লাগিল।

মায়ের প্রাণে লাগিল। কিন্তু পিতা বলিলেন,—“বালক-বালিকার এ প্রকার ভাব, বয়সের একটা পিপাসা মাত্র। পরস্পরকে যদি পৃথক রাখা যায় ও দেখা সাক্ষাতের সুবিধা না দেওয়া হয়, তবে এক দিন, দুই জনেরই হৃদয় হইতে এ ভাব অপমৃত হইতে পারিবে।”

এই ভাবিয়া তিনি নির্মলকে আর বাটীতে আসিতে দিতেন না, কিংবা কত্ভার সহিত দেখা করিতেও দিতেন না। কিন্তু তাহাতে হইল কি ? বাধা পাইয়া যেমন নদী স্রোত দ্বিগুণবেগে বাধা অতিক্রম করে, ইহাও সেইরূপ হইল। বস্তুতঃ আকর্ষণটা যেন দ্বিগুণতর বাড়িয়া উঠিল। জীবনের এত খানি পথ এমনি ভাবে আসিয়া, কে কাহাকে ভুলিতে পারিয়াছে ? দেখা করিতে দাও বা না দাও, হৃদয় হইতে এ স্মৃতি মুছিবার নহে। কালে সবই যায় সত্য, কিন্তু ইহার উপর কালের আধিপত্য কতটুকু ?

দেখা হইত না বটে, কিন্তু কোন মুহূর্তে কেহ কাহারও চিন্তাশূন্য থাকিত না। তাহাদের যে গভীর ভাবনা, তাহার আর সীমা ছিল না। কিন্তু এখন হইতে, ছ'জনাই ছ'জনার আশা ছাড়িল।

(৪)

বর মিলিল। সুবোধচন্দ্র নামে বিংশতিবর্ষীয় এক যুবা, যমুনার রূপে মোহিত হইয়া, বিনা পয়সায়,—এমন কি, ঘর হইতে সকল খরচপত্র করিয়া,—অধিকন্তু যমুনার পিতাকে কিছু নগদ দিয়া, বিবাহ করিতে সম্মত হইল। সুবোধ,—ধনীর সন্তান; লেখা-পড়ায় বদিত তত অনুরাগ নাই, তবে বুদ্ধিহীন নহে। পাত্রের রূপ আছে, ধন আছে, একটা ‘ঘরানা বরের’ ছেলেও বটে,—সুতরাং পিতা-মাতার বড়ই আনন্দ হইল এবং যমুনার বিবাহের সমস্ত ঠিক হইল।

ক’নে দেখা হইল। যমুনার রূপের রাশি সুবোধ দেখিল,—জগতে অতুল। সুবোধ, তাহাদেরই প্রতিবাগী; অনেকবার সুবোধ,—যমুনা ও নিম্নগকে দেখিয়াছে, তাহারাও সুবোধকে দেখিয়াছে। এক দিন—তখন যমুনার বয়স দশ বৎসর,—সাঁতার দিতে দিতে যমুনা, গঙ্গায় ভাসিয়া গিয়াছিল; ভাসিতে ভাসিতে গঙ্গার মাঝামাঝি একটা নিমজ্জিত পাহাড়ের উপর উঠিয়া বসিয়াছিল; নিম্নগ আপনার পৃষ্ঠের উপর যমুনাকে লইয়া আসিতে আসিতে ক্লান্ত হইয়া পড়িল। সুবোধ নে দৃষ্টি দেখিয়া তাহাদের দু’জনেকেই তুলিয়া আনিল। বালিকা ধীরে ধীরে তীরে উঠিয়া মনে মনে সুবোধকে ধন্যবাদ দিয়াছিল।

কি করুণ-নয়নে সে হৃদয়ের কৃতজ্ঞতা প্রকাশ করিয়াছিল ! সুবোধ সেদিন যমুনাকে কত সুন্দর দেখিয়াছিল। সুবোধের তখন বিবাহের কথা হইতেছিল। কিন্তু সেই গঙ্গাশ্রোতে ভাসমানা দশম-বর্ষীয়া বালিকা যমুনার স্বর্ণীয় রূপরাশি তাহার মনে জাগিতে ছিল। সুতরাং অন্তত্ৰ বিবাহ করিতে সুবোধের ইচ্ছা হইল না। কিন্তু সকলে এইরূপ বুঝিত যে, নির্মল ও যমুনায় যখন এত ভাব ও ভালবাসা, তখন উহারাই একদিন পরস্পর পরস্পরের বর ক'নে হইবে। সুবোধ এক প্রকার নিরাশও হইয়াছিল। আজ আবার প্রায় তিন বৎসর পরে, সেই যমুনার সহিত তাহার বিবাহের সম্বন্ধ স্থির হইল ! সুবোধের আর আনন্দের সীমা নাই।

ক'নে দেখার দিন, সুবোধের সেই পূর্ব স্মৃতি বড় উজ্জল-রূপে হৃদয়ে জাগিয়া উঠিল। যমুনার সেই গঙ্গায় ভাসিয়া যাওয়া আজ তিন বৎসরের কথা ;—এই তিন বৎসরে যমুনার রূপ আরও কত বাড়িয়াছে ! মুখখানি মলিন এবং প্রশান্ত চক্ষু দুটি অপ্রফুল্ল সহেও সুবোধ তাহা আরও সুন্দর দেখিল। বিবাহের দিন ধাৰ্য্য হইয়া গেল।

সুবোধ কি জানিত না যে, যমুনা নির্মলকে কত ভালবাসে ? জানিত বৈ কি ;—সকলেই জানিত। কিন্তু যমুনার পিতা মাতার জ্ঞান, সুবোধও ভাবিল যে, তাহার সহিত বিবাহ হইয়া গেলে, যমুনা নির্মলকে অবশ্যই ভুলিবে।

(৫)

একজন কেবল ভুলিল না। যমুনাদের যে পরিচারিকা ছিল, সেই কেবল বুঝিল অন্যরূপ। পরিচারিকার নাম ছিল লক্ষ্মী ;

বয়স ২৪।২৫ বৎসর, শ্রামাঙ্গী । লক্ষ্মী, ভদ্রঘরের মেয়ে, শৈশবে পিতৃ মাতৃহীনা হইয়া, দূর-সম্পর্কীয় কোন আত্মীয়ের নিকট থাকিত। তাহারা বিবাহ দেয়। বিবাহের কিছুদিন পরেই বিধবা হইয়া দারিদ্র্যের কণ্টকাকীর্ণ মুকুট মাথায় পরিয়া, লক্ষ্মী এই গৃহের পরিচারিকা হইল। সমস্ত দিন কাজকর্ম করিত, আহারান্তে, রাত্রে শয্যাগুহী, প্রতিরাত্রেই সে, কে জানে কেন, কাঁদিত। কাঁদিয়া কাঁদিয়া তাহার চক্ষু ফুলিত, মাথার বালিস জলে ভিজিয়া যাইত। তাহার হৃৎকণ্ডে সেই বৃক্ষিত; আর বৃক্ষিত, তাহার হৃদয়ের দেবতা।

লক্ষ্মীর স্মৃতি হৃৎকণ্ডের ভাগী ছিল—যমুনা। যমুনাকে সে, আপনার ভগিনীর মত ভালবাসিত; হৃৎকণ্ডে খুব প্রীতি ছিল। লক্ষ্মীর প্রকৃত পরিচয় কেবল যমুনাই জানিত। লক্ষ্মী সে কথা আর কাহাকেও বলে নাই,—যমুনাকেও বলিতে নিষেধ করিয়াছিল। হৃৎকণ্ডনাই হৃৎকণ্ডের ব্যথার ব্যথী, স্মৃতির স্মৃথী। কেহ কাহারও কাছে কোন কথা লুকাইত না। তাই লক্ষ্মী বুঝিয়াছিল,—যমুনা নির্মলকে ভুলিতে পারিবে না।—যদি স্মৃতিবোধের সহিত যমুনার বিবাহ হয়, তবে যমুনা স্মৃথী হইতে পারিবে না।

লক্ষ্মী, যমুনাকে সাস্তুনা করিত, আশাও দিত; কিন্তু যমুনার মন বৃক্ষিত না।

যখন স্মৃতিবোধ ও যমুনার বিবাহ ঠিক হইয়া গেল, তখন সকল আশাই নির্মূল হইল। যমুনা কাঁদিল, লক্ষ্মীও কাঁদিল। লক্ষ্মী ক' ভাবিল, বলিল,—“তুমি নিশ্চিন্ত হও, এ বিবাহ কখনই হইবে না।”

যমুনা একথা, এ সময় বিশ্বাস করিতে পারিল না,—মন

প্রবোধ মানিল না; লক্ষ্মীর ক্রোড়ে মুখ রাখিয়া, আরও কাঁদিত লাগিল।

আমরা বালক-বালিকার জীবনের সেই উৎসাহ খুব নিশ্চল দেখিয়াছিলাম। জীবন-মধ্যাহ্নে তাহাদের আকাশ মেঘাচ্ছন্ন হইল! কে জানে, এ মেঘ কখন অপসৃত হইবে কি না!

(৬)

নিশ্চলের বড় ভাবনা হইল; আর কি কোন আশা নাই? কাজ-কর্ম ভাল লাগে না, লেখা-পড়ায় মন নাই, কোন কিছুতেই স্পৃহাও নাই। পুত্রের এ অবস্থা দেখিয়া, মাতা চিন্তিতা হইলেন; কিন্তু তিনি আর করিবেন কি?

অতীতের কত কথা নিশ্চলের মনে পড়িল। সেই শৈশব কাল, সেই গঙ্গাতটে খেলাঘর, সেই ক্রীড়া, সেই গল্প, সেই পুতুলের বিয়ে, তার পর আপনাবিগের বিবাহ,—সে কতদিনের কত কথা নিশ্চলের স্মৃতিমাঝে জাগিয়া উঠিল। ছইজনের বিবাহ হইলে কোথায় বাড়া করিবে, কেমন থাকিবে, কত ভালবাসিবে,—একে একে তাহাহ মনে পড়িতে লাগিল। ভাবিতে ভাবিতে, নিশ্চল সুখ-শান্তি-হারা হইল।

সন্তানের হৃৎথে মায়ের প্রাণ কাঁদিল। মায়ের চক্ষে জল দেখিয়া, নিশ্চলও হৃৎখিত হইল। এবার সে মনে মনে বলিল,—“আর এমন করিব না,—যমুনাকে ভুলিব।”

কিন্তু চেষ্টা করিয়া কে কাহাকে ভুলিতে পারে? ভুলিবার চেষ্টাই ভুলিবার প্রধান অন্তরায়। নিশ্চলের মাতা নিশ্চলকে

কিছুদিন মাতুলালয়ে যাইতে বলিলেন । নিশ্চলও স্বীকৃত হইল ; কিন্তু যাইবার আগে যমুনার সহিত কি একবার দেখা হয় না ?

দেখা হইল, কিন্তু অতি অল্প সময়ের জন্ত । যমুনা কাঁদিল না ;—কিন্তু কাঁদিলে বুঝি ভাল হইত ।

কিছুক্ষণ উভয়ে উভয়ের মুখপানে চাহিয়া রহিল । সে মর্শ্ব-ভেদী কাতর দৃষ্টি, সে অন্তরের ব্যথা, সে নিরাশার দীর্ঘশ্বাস, বুঝিবার,—বুঝাইবার নহে ।

দেখিতে দেখিতে উভয়ের চক্ষু বাষ্পপূর্ণ হইল, সর্ব শরীর কাঁপিতে লাগিল । নিশ্চল রুদ্ধকণ্ঠে কহিল,—“যমুনা ! ইহকালে আমরা সুখী হইলাম না, পরকালে আমাদের সুখ আছে । জীবন অনন্ত, কালও অনন্ত । কোন জীবনে, কোন কালে কি তোমাকে পাইব না ? সেই আশায় বাঁচিয়া রহিলাম ।”

যমুনা কোন উত্তর করিল না,—উত্তর করিতে পারিল না ; মনে মনে কহিল,—“বুঝিয়াছি, আমার মৃত্যু সন্নিকট । নিশ্চল ! কেন তোমাকে এত ভাল বাসিয়াছিলাম ?”

নিশ্চল জানিল না, তাহার পশ্চাতে নিশ্চল শ্রির প্রতিমার মত যমুনা দাঁড়াইয়া রহিল । যতদূর দেখা গেল, যমুনা দাঁড়াইয়া দাঁড়াইয়া নিশ্চলকে দেখিতে লাগিল । যখন নিশ্চল চক্ষের অন্তর্হিত হইল, সহকারভ্রষ্ট মাধবীলতার ন্যায় যমুনা মুচ্ছিতা হইয়া পড়িল ।

(৭)

যমুনার মাতা ক্রমে সকলই বুঝিলেন । বুঝিলেন, কত্ভার সুখ আর হইবে না । তখন স্বামী জীতে ভাবিলেন । কিন্তু অনেক

বিলম্বে সে ভাবনা আসিয়াছিল। স্মৃতিরাং কোন ফল দর্শিল না। যমুনার পিতা বলিলেন,—“দূর হউক, আর ওকথা ভাবিবার প্রয়োজন নাই। আমি ত সৎপাত্র দেখিয়া কন্যাদান করি, তার পর মেয়ের অদৃষ্টে যা' থাকে। তুমি কি মনে কর, মেয়ে আমার 'কোর্টসিপ' করিয়া বিবাহ করিবে, আমি তাহাতেই মত দিব?”

“তা কে বলিতেছে? কিন্তু যখন ব্যাপার সেইরূপ দাঁড়াইয়াছে, তখন আর অন্য উপায় কি? আমি বলি, তবে এ সম্বন্ধ ভাবিয়া দাও; আমি ত বুঝাইতে বাধি রাখি নাই, যমুনার সঙ্গিনীরাও যমুনাকে কত বুঝাইয়াছে, কিন্তু সেত তাহা কানে নেয় না। শেষ কপালে কি আছে, কে জানে?”

“যা থাকে থাক্, ওকথা আর ভাবিও না। যুবক যুবতীর আবার ভালবাসা! চক্ষেই তাহার উৎপত্তি, চক্ষেই তাহার সমাপ্তি!—আমি অনেক দেখিয়াছি, তুমিও দেখিবে।”

যমুনা আর কঁাদে না, বুক বাধিয়াছে। নীরবে, নিভৃতে বুকটা কিন্তু এক বার হু হু করিয়া উঠিত। সে সময় বালিকা, কঁাদিতে কঁাদিতে দেবতার কাছে প্রার্থনা করিতে,—“হে দেব! আমায় বল দাও!

আর নির্মল?—হতভাগ্যের জীবন্তে সমাধি হইল। লক্ষভ্রষ্ট হইয়া, অবিরাম সে একটা মহাশূন্য অনুভব করিতে লাগিল।

নির্মল এক্ষণে মাতুলালয়ে। মধুপুরের সুন্দর পাহাড়শ্রেণী তাহার কাতর প্রাণে কখন কখন কিছু শান্তি দিতে পারিত। নির্মল দেখিত,—পাহাড়গুলির উপর স্থানে স্থানে শ্রামল ক্ষুদ্র ক্ষুদ্র চারাগাছ গুলি বড় সুন্দর। ক্রমকদিগের হু' একখানি ক্ষুদ্র ক্ষুদ্র কুটীর, পাহাড়ের পদপ্রান্তে পড়িয়া আছে। কোন কুটীরের

চালাখানি ঢাকিয়া, মাধবীবল্লরী গুলি বকে বকে জড়ুইয়া, অনেক প্রাসাদ অপেক্ষাও, সে কুটীরের সৌন্দর্য বাড়াইয়াছে। চন্দ্রকিরণ, পাহাড়ের উপর নিপতিত হওয়ায় বড় সুন্দর শোভা হইয়াছে।

নির্মল পাহাড়ের উপর বসিয়া এই সব দেখিতে দেখিতে, কিছু অন্তমনস্ক হইত। ভাবিত,—“আমি দরিদ্র বলিয়া, হৃদয়ের অমূল্য রত্ন লাভে বঞ্চিত হইলাম ! কেন, কখন কি ধন উপার্জন করিতে পারিব না ? না পারি, এই যে সুন্দর স্থান, সুন্দর কুটীর, এমনি স্থানে, এমনি একটি কুটীর বাঁধিয়া, কি তাহাকে লইয়া, থাকিতে পারিতাম না ? উপরে ঐ নির্মল আকাশ, এই নির্জ্বল স্থান, এমন পাহাড়শ্রেণী, এমন বৃক্ষরাজী, এই কুটীর-গুলি,—কেন, ইহা অপেক্ষা কি অট্টালিকা সুন্দর ? এই বিলাস-আড়ম্বরশূন্য, স্বার্থ-মলিনতা-হীন, সরল-হৃদয় দরিদ্র কৃষকগণের এ অবস্থা কি স্বর্ণিত ? যমুনাকে লইয়া এ পর্ণকুটীরে বাস করিলেও আমি স্বর্গস্থ অমুভব করিতাম। হায়, কোন্ পাপে, কার অভিশাপে, আমি সে দেবী-প্রতিমায় বঞ্চিত হইলাম ! দীননাথ ! জন্ম-জন্মান্তরেও কি সে ঐবজ্যোতি হৃদয়ে ধারণ করিতে পাইব না ?”

চক্ষে জল আসিল। নির্মল এমনি করিয়া কত রাত্রি অতি-বাহিত করিত। ভুলিতে কি পারিত ? প্রাতে শয্যা হইতে উঠিয়া একটি বাগানে ভ্রমণ করিত। দেখিত,—একটি কামিনী বৃক্ষতলে বসিয়া, বালক-বালিকাগণ ফুল তুলিয়া মালা গাঁথিতেছে। যে বাহাকে ভালবাসে, সে তাহার কণ্ঠে কুসুমহার পরাইতেছে ; বিনিময়ে কেহ কুসুমহারের স্থান কোমল স্নেহভরে তাহাকে

আলিঙ্গন করিয়া অব্যক্ত মধুর আলাপনে পরিতৃপ্ত করিতেছে ;
কেহ বা স্বেদাসক্তিতে মধুর কণ্ঠ তুলিয়া সকলকে মগ্নমুগ্ধ করিতেছে !
দেখিয়া, বাণেশ্বর সেই অতীত ইতিহাস নির্মলের স্মৃতিমাঝে
জাগিত, আর নির্মল নীরবে কাদিতে কাদিতে চক্ষু মুছিত !

(৮)

যেদিন যমুনা ও স্বেদাশ্রমের বিবাহ, সেদিনে কি বিঘ্নবশতঃ
বিবাহ রহিত হইল । সে দিনের পর সাত দিন গিয়াছে ।

আজ বিবাহ । স্বেদাশ্রম ধনীর সন্তান ; খুব সমারোহ,
খুব ধুমধাম পড়িয়া গিয়াছে । ক'নের বাড়ীতেও ধুম কম নহে ।
খরচটা ত যমুনার পিতার নহে,—বরেন্দ্রেরই সব । এত সমারোহ
হইলেও, যমুনার পিতা মাতা কিন্তু বড় প্রফুল্ল নহেন । শ্রাবণের
মেঘের মত কল্লার সে মলিন মুখখানি দেখিয়া, কাহারও তেমন
আনন্দ নাই । তাঁহার বুকিলেন,—কাজটা ভাল হইল না ।
কিন্তু ভাবিবার আর সে সময় নাই,—বর আসিয়াছে ।

যমুনা আগে বরং ভাবিত । বিবাহের দিন যত নিকটবর্তী
হইতে লাগিল, সে তত দৃঢ় হইল ; কিন্তু ভুলিতে পারিল না ।
প্রফুল্ল থাকিতে চেষ্টা করিত,—পারিত না । বাটীর পার্শ্বে
নির্মলদের সেই কুটীর খানি দেখিয়া, সেই বড় করুণ আঁখি দু'টি
জলে ভাসিয়া যাইত । নির্মল কোথায় গিয়াছে, কেমন আছে ;—
লোকে বলিত, সে পাগল হইয়া নিরুদ্দেশ হইয়াছে—যমুনা সেই
সব ভাবিত । তাহারই জন্ত নির্মল পাগল ? হায়, তাহার মায়ের
দশা তবে কি হইবে ? তিনি কি কিছু গুনিয়াছেন ? নির্মল কি
তবে মধুপুত্রে নাই ?

জলে চক্ষু ভাসিয়া ছিল, এখন জলে বুক ভাসিতে লাগিল। তখন সরলা বালিকা, যুক্তকরে—উর্ধ্বনেত্র হইয়া, সন্ধ্যাকাশ পানে চাহিয়া, কাহাকে কি জানাইল। হায়, দেবতাও কি বালিকার সে মৰ্ম্ম-কাতরতা শুনিবেন না ?

যমুনা এইরূপ করিত। আর ব্যথার ব্যথী লক্ষ্মী ?—সে দিনরাত কি ভাবিত, মাঝে মাঝে যমুনাকে সাধনা করিত। বিবাহের দিন প্রাতে লক্ষ্মী গুলিল,—নিশ্চল তাহার বৃদ্ধ মাতা-মহীকে লইয়া মুঞ্জে আসিবে ও তথা হইতে মাতাকে লইয়া, সকলে কাশীযাত্রা করিবে। সকলে বলিত, নিশ্চল পাগল হইয়াছে; কিন্তু তাহার মাতা সে কথায় বিশ্বাস করিতেন না। সেইদিন মধ্যাহ্নে নিশ্চল আসিল। কি জানি, লক্ষ্মী কেবলই সংবাদ লইতেছে,—নিশ্চল আসিয়াছে কি না। যখন নিশ্চলের সহিত সাক্ষাৎ হইল, তাহার বড় আনন্দ হইল। লক্ষ্মীর ক্রম বিশ্বাস জন্মিল,—যমুনার সহিত নিশ্চলেরই বিবাহ হইবে। কিন্তু পরদিন প্রাতে কাশীযাত্রা হইবে, সব ঠিক হইল। নিশ্চল, তাহার মাতা, দিদীমা ও এক গুরুপুত্র,—এই চারিজনই যাইবেন। নিশ্চল ভাবিল,—মুন্জের হইতে তাহার দোকান পাট জন্মের মত উঠিল।

মাতা ভাবিলেন,—“কাশীতে যাইয়া ছেলের একটি বিবাহ দিব।—ছেলে বয়সে এমন ভাবিতেও আছে ?”

অতি অল্প সময়ের জন্ত লক্ষ্মী আসিয়া নিশ্চলের সহিত দেখা করিল। নিশ্চল যমুনার অবস্থা বুঝিতে পারিল। লক্ষ্মী ভাবিয়াছিল, যমুনা যেরূপ নিরাশায় মৰ্ম্মাহত হইয়া পড়িয়াছে,—নিশ্চল পুরুষ মানুষ, বুকে আঘাত লাগিবে বটে, কিন্তু অতটা

হত্যা হইয়া পড়িবে না ; সুবোধের নিকট সকল কথা ব্যক্ত করিলে, না জানি কি হইতে পারে ! সে যদি গুনিতে পায় যে, কোমলা হরিণীর বুকে সে কি মহাশেল নিক্ষেপ করিতেছে, তাহা হইলে কি সে এমন কাজ করিতে পারিবে ?

লক্ষ্মীর শেষ আশা এই ! নিশ্চয়ের হৃদয়ে সে কথা স্থান পাইল না ! বিষাদপ্রতিমার সে স্নান ছবি তাহার নয়ন সমক্ষে জাগিতে লাগিল ! চাহিয়া চাহিয়া নিশ্চল উদ্ভ্রান্ত হৃদয়ে বলিয়া উঠিল,—“যমুনা, যমুনা ! তুমি আমার ! কাহার সাধা, তোমাকে গ্রহণ করে !”

কিন্তু হায়, বিধাতার মনে অন্তরূপ ছিল !

(৯)

এ দিকে বিবাহসভায় বর আসিয়াছে । লোকে লোকা-রণ্য । চারিদিকে আলো আর ফুল ; গান আর বাজনা । বৈশাখ মাসের শুক্লাদশমী তিথি ; জ্যোৎস্নালোকে চারিদিক প্রফুল্ল । আনন্দ-কোলাহলে বিবাহবাড়া পূর্ণ ।

এইবার কণ্ঠা সম্প্রদান হইবে, যমুনাকে বিবাহ স্থানে আনা হইল । অমনি চারিদিকে “ক’নে দেকি” “ক’নে দেখি” রব উঠিল । একজন যমুনার অবগুণ্ঠন মোচন করিয়া দিল । সকলে দেখিল,—সুন্দর রূপ, চাঁদপানা মুখ । কিন্তু কেহ হুঃখিত হইল, কেহ আশ্চর্য্য হইল,—যমুনার চক্ষে জল ! এমন শুভ দিনে, হায়, এঁকি অমঙ্গল !

এই সময়ে সকলে সবিস্ময়ে দেখিল,—উদ্ভ্রান্ত বেশে নিশ্চল

সেই সভা মাঝে উপস্থিত। মুখে কথা নাই, চক্ষে পলক নাই,—
কি এক গম্ভীর ও স্থির প্রতিজ্ঞাব্যঞ্জক ভাব। সকলে পাগল বলিয়া
জানিত; কেহ হুঃখ করিল, কেহ বা উপহাস করিল। নিশ্চল,
চিত্তার্পিত স্থির নেত্রে দাঁড়াইয়া দাঁড়াইয়া সব দেখিল, শেষে
কাঁদিয়া উঠিল। শৈশবসঙ্গিনী, হৃদয়ের অমূল্য নিধি আজ সে
হারাইতে বসিয়াছে। এ হারানিধি কি সে আর পাইবে?

এইবার সকলে হুঃখ করিল, হুঃ একজন সহৃদয় ব্যক্তির চক্ষে
জলও দেখা দিল। নিশ্চল উদ্ভ্রান্ত ভাবে বিকলকণ্ঠে কহিয়া
উঠিল,—“যমুনা! যমুনা! দেখ দেখ, এই আমার বিবাহ!”

দেখিতে না দেখিতে, চক্ষের পলক ফেলিতে না ফেলিতে,
শাগিত ছুরিকা লইয়া নিশ্চল আপন বক্ষে বসাইয়া দিল।
বিবাহ-সভায় রক্ত-গঙ্গা বহিতে লাগিল।

“সর্বনাশ” “সর্বনাশ” রবে চারিদিকে গোল পড়িল।
যমুনার পিতা ধূল্যবলুষ্ঠিত নিশ্চলের রক্তাক্ত দেহ আপনার
কোড়ে তুলিয়া লইলেন।

(১০)

কেহ বলিল,—“ধন্য ভোলবাসা!” কেহ বলিল,—“পাগল
হইয়া বুদ্ধিভ্রংশ হইয়াছিল, তাই এমন কাজ করিল।” নিশ্চল চক্ষু
মেলিল, ক্ষীণকণ্ঠে জল প্রার্থনা করিল। জল দেওয়া হইল।
শেষমুহূর্ত্ত নিকটবর্ত্তী হইয়া আসিল, যন্ত্রণা ক্রমে বাড়িতে লাগিল।
ক্ষীণ কাতরকণ্ঠে মন্দভাগ্য বলিল,—“জন্মের শোধ একবার
তাহাকে দেখাও,—একবার কাছে আসিতে দাও।”

ঋণগ্রাহিত নিবেদন করিলেন ; কিন্তু সকলেই অমরোদ করিতে লাগিল; মৃত্যুকালে একবার দেখাইতে হানি নাই ।

পিতার আজ্ঞাক্রমে যমুনা তথায় আনীতা হইল । অল্প অব-
শ্রুতন মোচন করিয়া, নির্মলকে তদবস্থায় দেখিল । চারিচক্ষের
মিলন হইল । যমুনা কাদিল না,—তাহার অন্তরের অন্তরে
যে অশ্রু প্রবাহিত হইল, বাহিরে তাহা প্রকাশ হইল না ।

সকলেই যমুনার পিতাকে ধিক্কার দিতে লাগিল । অতৃপ্ত-
লোচনে নির্মল, যমুনার মুখপানে চাহিয়া রহিল । ধীরে ধীরে
বলিল,—“যমুনা ! আমি চলিলাম । আশীর্বাদ করি, সুবো-
ধকে বিবাহ করিয়া তুমি সুখী হও । আমাদের জন্মের মত
ভুলিয়া যাও । আমি মরিতাম না, মুহূর্তের চাক্ষু্যে কেমন
হইয়া গেলাম ! এই শাপিত ছুরিকা অনেক দিন হইতেই
আমার হাতে ছিল । কিন্তু তোমার মুখ মনে পড়িলে আমার
আবার বাঁচিতে সাধ যাইত । তাই মরি মরি করিয়াও মরিতে
পারি নাই । বোধ হয় আজিও মরিতাম না । কিন্তু বুকের ভিতর
কেমন একটা অসহ্য যাতনা হওয়ার এমন কাজ করিলাম ।”

তার পর হতভাগ্য অতি কষ্টে, আরও অধিকতর যাতনা
জড়িত কষ্টে বলিল,—“হার' দুঃখিনী মা আমার ! এই অন্তিম
সময়ে তোমার কথা মনে জাগিল ! মাগো, তোমার বুকে শেল
দিয়া গেলাম ! দয়ামরি, পরমেশ্বর ! অধম সন্তানকে ক্ষমা
করিও,—শ্রীচরণে কোটা কোটা প্রণাম !”

নির্মলের সেই নিস্ত্রভ চক্ষে আবার জলধারা বহিল । আবার
অতি কষ্টে কহিল,—“যমুনা ! আজ তের বৎসর ধরিয়া তোমাকে
ভালবাসিয়াছি ; আপনার সহিত কত সংগ্রাম করিয়াছি ; শেষে

মরিয়া জুড়াইলাম ! হায়, আমার অর্থহীনতার আমাদের মিলন হইল না ! কিন্তু মনে রাখিও, উপরে দেবতা আছেন ; মনে রাখিও, সেই সর্বাস্তর্ঘ্যামী আমার অন্তর দেখিতেছেন ;—
 তিমি জানেন, তুমি আমার, আমি তোমার। আমাদের এ জগতের সম্বন্ধ ঘুচিল বটে,—কিন্তু দেবতার সৃষ্ট আর এক রাজ্য আছে,—যেখানে পরজন্মে তোমার আমার মিলনে কেহ বাদী হইতে পারিবে না। কাল পূর্ণ হইলে তুমি সেই লোকে গিয়া আমার সহিত মিলিত হইও।”

নির্মল হস্ত প্রসারণ করিল, যমুনা সে উত্তপ্ত হস্তের উপর আপনার হস্ত দিল। নির্মল সে হস্ত আপনার বুকের উপর রাখিয়া কাতরস্বরে কহিল,—“যমুনা ! বাল্যকালের সে খেলা মনে পড়ে কি ? সেই বিবাহ ?—আজও আমাদের বিবাহ !”

পুরোহিত বলিলেন,—“নির্মল ! তোমার মৃত হতভাগা আমি জীবনে দেখি নাই। আশীর্বাদ করি, পুনরূৎপাদিত হইবে।”

তখনও নির্মল ও যমুনা হাতে হাতে দাঁড়াইয়া আছে। ক্রমশঃ নির্মলের চক্ষু স্থির হইয়া আসিল ; জীবন-দীপ নিষ্কাশিত হইল।

যমুনা উচ্চৈঃস্বরে কঁাদিয়া উঠিল।

পুরোহিত বলিলেন,—“আজ আর কন্যা সম্প্রদান হইবে না।”

যমুনার পিতা কহিলেন,—“আর কন্যা-সম্প্রদানে কাজ নাই,—আজ হইতে আমার কন্যা বিধবা !

সমাপ্ত।



